

1 Samuel

Hannā Allāh se Bachchā Māngtī Hai

¹ Ifrāim ke pahāṛī ilāqe ke shahr Rāmātāym-sofīm yānī Rāmā meñ ek Ifrāimī rahtā thā jis kā nām Ilqānā bin Yarohām bin Ilīhū bin Tūkhū bin Sūf thā. ² Ilqānā kī do bīwiyān thiñ. Ek kā nām Hannā thā aur dūsrī kā Faninnā. Faninnā ke bachche the, lekin Hannā beaulād thi.

³ Ilqānā har sāl apne khāndān samet safr karke Sailā ke maqdis ke pās jātā tāki wahān Rabbul-afwāj ke huzūr qurbānī guzarāne aur us kī parastish kare. Un dinon meñ Elī Imām ke do betē Hufnī aur Fīnhās Sailā meñ imām kī khidmat anjām dete the. ⁴ Har sāl Ilqānā apnī qurbānī pesh karne ke bād qurbānī ke gosht ke ṭukṛē Faninnā aur us ke betē-betīyon meñ taqsim kartā. ⁵ Hannā ko bhī gosht miltā, lekin jahān dūsronī ko ek hissā milta wahān use do hisse milte the. Kyoñki Ilqānā us se bahut muhabbat rakhtā thā, agarche ab tak Rab kī marzī nahīn thi ki Hannā ke bachche paidā hon. ⁶ Faninnā kī Hannā se dushmanī thi, is lie wuh har sāl Hannā ke bānjhpan kā mazāq uṛā kar use tang kartī thi. ⁷ Sāl basāl aisā hī huā kartā thā. Jab bhī wuh Rab ke maqdis ke pās jāte to Faninnā Hannā ko itnā tang kartī ki wuh us kī bāteñ sun sun kar ro partī aur khā-pī na saktī. ⁸ Phir Ilqānā pūchhtā, “Hannā, tū kyoñ ro rahī hai? Tū khānā kyoñ nahīn khā rahī? Udās hone

kī kyā zarūrat? Maiṇ to hūṇ. Kyā yih das bęoṇ se kahīṇ behtar nahīṇ?”

⁹ Ek din jab wuh Sailā meṇ the to Hannā khāne-pīne ke bād duā karne ke lie uṭhī. Elī Imām Rab ke maqdis ke darwāze ke pās kursī par baiṭhā thā. ¹⁰ Hannā shadīd pareshānī ke ālam meṇ phūṭ phūṭ kar rone lagī. Rab se duā karte karte ¹¹ us ne qasam khāī, “Ai Rabbul-afwāj, merī burī hālat par nazar dāl kar mujhe yād kar! Apnī khādimā ko mat bhūlnā balki bętā atā farmā! Agar tū aisā kare to maiṇ use tujhe wāpas kar dūṅgī. Ai Rab, us kī pūrī zindagī tere lie makhsūs hogī! Is kā nishān yih hogā ki us ke bāl kabhī nahīṇ kaṭwāe jāeṇge.”

¹² Hannā barī der tak yon duā kartī rahī. Elī us ke muīnh par ġhaur karne lagā ¹³ to dekhā ki Hannā ke hoṇt to hil rahe hain lekin āwāz sunāī nahīṇ de rahī, kyoñki Hannā dil hī dil meṇ duā kar rahī thī. Lekin Elī ko aisā lag rahā thā ki wuh nashe meṇ dhut hai, ¹⁴ is lie us ne use jhiṛakte hue kahā, “Tū kab tak nashe meṇ dhut rahegi? Mai pīne se bāz ā!”

¹⁵ Hannā ne jawāb diyā, “Mere āqā, aisī koī bāt nahīṇ hai. Maiṇ ne na mai, na koī aur nashā-awar chīz chakhī hai. Bāt yih hai ki maiṇ barī ranjīdā hūṇ, is lie Rab ke huzūr apne dil kī āh-o-zārī unđel dī hai. * ¹⁶ Yih na samjheṇ ki maiṇ nikammī aurat hūṇ, balki maiṇ baṛe ġham aur aziyat meṇ duā kar rahī thī.”

¹⁷ Yih sun kar Elī ne jawāb diyā, “Salāmatī se apne ghar chalī jā! Isrāīl kā Khudā terī darķhāst

* ^{1:15} Lafzī tarjumā: apnī jān unđel dī hai.

pūrī kare.” ¹⁸ Hannā ne kahā, “Apnī khādimā par āp kī nazar-e-karm ho.” Phir us ne jā kar kuchh khāyā, aur us kā chehrā udās na rahā.

Samuel kī Paidāish aur Bachpan

¹⁹ Agle din pūrā khāndān subah-sawere uṭhā. Unhoṇ ne maqdis meṇ jā kar Rab kī parastish kī, phir Rāmā wāpas chale gae jahān un kā ghar thā. Aur Rab ne Hannā ko yād karke us kī duā sunī. ²⁰ Ilqānā aur Hannā ke betā paidā huā. Hannā ne us kā nām Samuel yānī ‘Us kā Nām Allāh Hai’ rakhā, kyoṇki us ne kahā, “Maiṇ ne use Rab se māngā.”

²¹ Agle sāl Ilqānā khāndān ke sāth māmūl ke mutābiq Sailā gayā tāki Rab ko sālānā qurbānī pesh kare aur apnī mannat pūrī kare. ²² Lekin Hannā na gaī. Us ne apne shauhar se kahā, “Jab bachchā dūdh pīnā chhoṛ degā tab hī maiṇ use le kar Rab ke huzūr pesh karūngī. Us waqt se wuh hameshā wahīn rahegā.” ²³ Ilqānā ne jawāb diyā, “Wuh kuchh kar jo tujhe munāsib lage. Bachche kā dūdh chhurāne tak yahān rah. Lekin Rab apnā kalām qāym rakhe.” Chunānche Hannā bachche ke dūdh chhurāne tak ghar meṇ rahī.

²⁴ Jab Samuel ne dūdh pīnā chhoṛ diyā to Hannā use Sailā meṇ Rab ke maqdis ke pās le gaī, go bachchā abhī chhotā thā. Qurbāniyon ke lie us ke pās tīn bail, maide ke taqrīban 16 kilog्रām aur mai kī mashk thī. ²⁵ Bail ko qurbāngāh par chaṛhāne ke bād Ilqānā aur Hannā bachche ko Elī ke pās le gae. ²⁶ Hannā ne kahā, “Mere āqā, āp kī hayāt kī qasam, maiṇ wuhī aurat

hūn jo kuchh sāl pahle yahān āp kī maujūdagī meñ khaṛī duā kar rahī thī. ²⁷ Us waqt maiñ ne iltamās kī thī ki Rab mujhe beṭā atā kare, aur Rab ne merī sunī hai. ²⁸ Chunānche ab maiñ apnā wādā pūrā karke beṭe ko Rab ko wāpas kar detī hūn. Umr-bhar wuh Rab ke lie makhsūs hogā.” Tab us ne Rab ke huzūr sijdā kiyā.

2

Hannā kā Gīt

¹ Wahān Hannā ne yih gīt gāyā,
“Merā dil Rab kī khushī manātā hai, kyoñki
us ne mujhe quwwat atā kī hai. Merā munh
dilerī se apne dushmanon ke khilaf bāt kartā hai,
kyoñki maiñ terī najāt ke bāis bāgh bāgh hūn.

² Rab jaisā quddūs koī nahīn hai, tere siwā
koī nahīn hai. Hamāre Khudā jaisī koī chaṭān
nahīn hai. ³ Dīngeñ mārne se bāz āo! Gustākh
bāteñ mat bako! Kyonki Rab aisā Khudā hai jo
sab kuchh jāntā hai, wuh tamām āmāl ko tol
kar parakhtā hai. ⁴ Ab baṛoñ kī kamāneñ tūṭ
gaī hain jabki girne wāle quwwat se kamarbastā
ho gae hain. ⁵ Jo pahle ser the wuh roṭī milne
ke lie mazdūrī karte hain jabki jo pahle bhūke
the wuh ser ho gae hain. Beaulād aurat ke sāt
bachche paidā hue hain jabki wāfir bachchoñ kī
mān murjhā rahī hai.

⁶ Rab ek ko marne detā aur dūsre ko zindā
hone detā hai. Wuh ek ko Pātāl meñ utarne
detā aur dūsre ko wahān se nikal āne detā hai.
⁷ Rab hī ḡharīb aur amīr banā detā hai, wuhī

past kartā aur wuhī sarfarāz kartā hai. ⁸ Wuh կհակ meñ dabe ādmī ko kharā kartā hai aur rākh meñ lete zarūratmand ko sarfarāz kartā hai, phir unheñ ra'isoñ ke sāth izzat kī kursī par biṭhā detā hai. Kyoñki duniyā kī buniyādeñ Rab kī haiñ, aur usī ne un par zamīn rakhī hai.

⁹ Wuh apne wafādār païrokāroñ ke pāñw mahfūz rakhegā jabki sharīr tārīkī meñ chup ho jaeñge. Kyoñki insān apnī tāqat se kāmyāb nahīñ hotā. ¹⁰ Jo Rab se laṛne kī jurrat karen wuh pāsh pāsh ho jaeñge. Rab āsmān se un ke կhilāf garaj kar duniyā kī intahā tak sab kī adālat karegā. Wuh apne bādshāh ko taqwiyat aur apne masah kie hue կhādim ko quwwat atā karegā.”

¹¹ Phir Ilqānā aur Hannā Rāmā meñ apne ghar wāpas chale gae. Lekin un kā betā Elī Īmām ke pās rahā aur maqdis meñ Rab kī կhidmat karne lagā.

Elī ke Beṭoñ kī Bedīn Zindagī

¹² Lekin Elī ke bete badmāsh the. Na wuh Rab ko jānte the, ¹³ na imām kī haisiyat se apne farāyz sahīh taur par adā karte the. Kyoñki jab bhī koī ādmī apnī qurbānī pesh karke rifāqatī khāne ke lie gosht ubāltā to Elī ke bete apne naukar ko wahān bhej dete. Yih naukar sihshākhā kāñṭā ¹⁴ deg meñ ḍāl kar gosht kā har wuh ṭukrā apne mālikoñ ke pās le jātā jo kāñṭe se lag jātā. Yihī un kā tamām Isrāiliyon ke sāth sulūk thā jo Sailā meñ qurbāniyān chaṛhāne āte the. ¹⁵ Na sirf yih balki kaī bār naukar

us waqt bhī ā jātā jab jānwar kī charbī abhī qurbāngāh par jalānī hotī thī. Phir wuh taqāzā kartā, “Mujhe imām ke lie kachchā gosht de do! Use ublā gosht manzūr nahīn balki sirf kachchā gosht, kyoñki wuh use bhūnanā chāhtā hai.” ¹⁶ Qurbānī pesh karne wālā etarāz kartā, “Pahle to Rab ke lie charbī jalānā hai, is ke bād hī jo jī chāhe le len.” Phir naukar badtamīzī kartā, “Nahīn, use abhī de do, warnā maiñ zabardastī le lūngā.” ¹⁷ In jawān imāmoñ kā yih gunāh Rab kī nazar meñ nihāyat sangīn thā, kyoñki wuh Rab kī qurbāniyān haqīr jānte the.

Mān-bāp Samuel se Milne Āte Hain

¹⁸ Lekin chhoṭā Samuel Rab ke huzūr khidmat kartā rahā. Use bhī dūsre imāmoñ kī tarah katān kā bālāposh diyā gayā thā. ¹⁹ Har sāl jab us kī mān khāwind ke sāth qurbānī pesh karne ke lie Sailā ātī to wuh nayā choğhā sī kar use de detī. ²⁰ Aur rawānā hone se pahle Elī Samuel ke mān-bāp ko barkat de kar Ilqānā se kahtā, “Hannā ne Rab se bachchā māng liyā aur jab milā to use Rab ko wāpas kar diyā. Ab Rab āp ko is bachche kī jagah mazīd bachche de.” Is ke bād wuh apne ghar chale jāte. ²¹ Aur wāqaī, Rab ne Hannā ko mazīd tīn betē aur do betīyān atā kiñ. Yih bachche ghar meñ rahe, lekin Samuel Rab ke huzūr khidmat karte karte jawān ho gayā.

Elī ke Beṭe Bāp kī Nahīn Sunte

²² Elī us waqt bahut būrhā ho chukā thā. Beṭoñ kā tamām Isrāīl ke sāth burā sulūk us ke kānoñ tak pahuñch gayā thā, balki yih bhī ki beṭe un auratoñ se nājāyz tālluqāt rakhte haiñ jo

mulāqāt ke khaime ke darwāze par khidmat kartī haiñ. ²³ Us ne unheñ samjhāyā bhī thā, “Āp aisī harkateñ kyoñ kar rahe haiñ? Mujhe tamām logoñ se āp ke sharīr kāmoñ kī khabreñ miltī rahtī haiñ. ²⁴ Beño, aisā mat karnā! Jo bāteñ āp ke bāre meñ Rab kī qaum meñ phail gaī haiñ wuh achchhī nahīñ. ²⁵ Dekheñ, agar insān kisī dūsre insān kā gunāh kare to ho saktā hai Allāh donoñ kā darmiyānī ban kar qusūrwār shakhs par rahm kare. Lekin agar koī Rab kā gunāh kare to phir kaun us kā darmiyānī ban kar use bachāegā?”

Lekin Elī ke beñoñ ne bāp kī na sunī, kyoñki Rab kī marzī thī ki unheñ sazā-e-maut mil jāe. ²⁶ Lekin Samuel un se farq thā. Jitnā wuh barā hotā gayā utnī us kī Rab aur insān ke sāmne qabūliyat bañhtī gaī.

Elī ke Gharāne ko Sazā Milne kī Peshgoī

²⁷ Ek din ek nabī Elī ke pās āyā aur kahā, “Rab farmātā hai, ‘Kyā jab terā bāp Hārūn aur us kā gharānā Misr ke bādshāh ke ghulām the to maiñ ne apne āp ko us par zāhir na kiyā? ²⁸ Go Isrāīl ke bārah qabilē the lekin maiñ ne muqarrar kiyā ki usī ke gharāne ke mard mere imām ban kar qurbāngāh ke sāmne khidmat karen, bañkūr jalāeñ aur mere huzūr imām kā bālāposh pahneñ. Sāth sāth maiñ ne unheñ qurbāngāh par jalne wālī qurbāniyoñ kā ek hissā milne kā haq de diyā. ²⁹ To phir tum log zabah aur ghallā kī wuh qurbāniyān haqīr kyoñ jānte ho jo mujhe hī pesh kī jātī haiñ aur jo maiñ ne apnī sukūnatgāh ke lie muqarrar kī thīn? Elī,

tū apne beṭoṇ kā mujh se zyādā ehtirām kartā hai. Tum to merī qaum Isrāīl kī har qurbānī ke behtarīn hisse khā khā kar moṭe ho gae ho.'

³⁰ Chunānche Rab jo Isrāīl kā Khudā hai farmātā hai, wādā to maiṇ ne kiyā thā ki Lāwī ke qabīle kā terā gharānā hameshā hī imām kī khidmat saranjām degā. Lekin ab maiṇ elān kartā hūn ki aisā kabhī nahīn hogā! Kyoñki jo merā ehtirām karte haiṇ un kā maiṇ ehtirām karūṅga, lekin jo mujhe haqīr jānte haiṇ unheṇ haqīr jānā jāegā. ³¹ Is lie sun! Aise din ā rahe haiṇ jab maiṇ terī aur tere gharāne kī tāqat yoṇ toṛ dālūṅgā ki ghar kā koī bhī buzurg nahīn pāyā jāegā. ³² Aur tū maqdīs meṇ musībat dekhegā hālānki maiṇ Isrāīl ke sāth bhalāī kartā rahūṅgā. Tere ghar meṇ kabhī bhī buzurg nahīn pāyā jāegā. ³³ Maiṇ tum meṇ se har ek ko to apnī khidmat se nikāl kar halāk nahīn karūṅga jab terī āñkheṇ dhundlī-sī paṛ jāeñgī aur terī jān halkān ho jāegī. Lekin terī tamām aulād ġhairtabaī maut maregī. ³⁴ Tere beṭe Hufnī aur Fīnhās donoṇ ek hī din halāk ho jāeñge. Is nishān se tujhe yaqīn āegā ki jo kuchh maiṇ ne farmāyā hai wuh sach hai.

³⁵ Tab maiṇ apne lie ek imām khaṛā karūṅga jo wafādār rahegā. Jo bhī merā dil aur merī jān chāhegī wuhī wuh karegā. Maiṇ us ke ghar kī mazbūt buniyādeṇ rakhūṅgā, aur wuh hameshā tak mere masah kie hue ḫādim ke huzūr ātā jātā rahegā. ³⁶ Us waqt tere ghar ke bache hue tamām afrād us imām ke sāmne jhuk jāeñge aur paise aur roṭī māṅg kar iltamās kareñge, mujhe

imām kī koī na koī zimmedārī deñ tāki roṭī kā ṭukṛā mil jāe.”

3

Allāh Samuel se Hamkalām Hotā Hai

¹ Chhoṭā Samuel Elī ke zer-e-nigarānī Rab ke huzūr khidmat kartā thā. Un dinoṇ meṇ Rab kī taraf se bahut kam paighām yā royāeṇ miltī thiṇ. ² Ek rāt Elī jis kī ānkheṇ itnī kamzor ho gaī thiṇ ki dekhnā taqrīban nāmumkin thā māmūl ke mutābiq so gayā thā. ³ Samuel bhī leṭ gayā thā. Wuh Rab ke maqdis meṇ so rahā thā jahān ahd kā sandūq paṛā thā. Shamādān ab tak Rab ke huzūr jal rahā thā ⁴⁻⁵ ki achānak Rab ne āwāz dī, “Samuel!” Samuel ne jawāb diyā, “Jī, maiṇ abhī ātā hūn.” Wuh bhāg kar Elī ke pās gayā aur kahā, “Jī janāb, maiṇ hāzir hūn. Āp ne mujhe bulāyā?” Elī bolā, “Nahīn, maiṇ ne tumheṇ nahīn bulāyā. Wāpas jā kar dubārā leṭ jāo.” Chunānche Samuel dubārā leṭ gayā.

⁶ Lekin Rab ne ek bār phir āwāz dī, “Samuel!” Laṛkā dubārā uṭhā aur Elī ke pās jā kar bolā, “Jī janāb, maiṇ hāzir hūn. Āp ne mujhe bulāyā?” Elī ne jawāb diyā, “Nahīn betā, maiṇ ne tumheṇ nahīn bulāyā. Dubārā so jāo.”

⁷ Us waqt Samuel Rab kī āwāz nahīn pahchān saktā thā, kyoṇki abhī use Rab kā koī paighām nahīn milā thā. ⁸ Chunānche Rab ne tīsrī bār āwāz dī, “Samuel!” Ek aur martabā Samuel uth khaṛā huā aur Elī ke pās jā kar bolā, “Jī janāb, maiṇ hāzir hūn. Āp ne mujhe bulāyā?” Yih sun kar Elī ne jān liyā ki Rab Samuel se hamkalām

ho rahā hai. ⁹ Is lie us ne laṛke ko batāyā, “Ab dubārā let jāo, lekin aglī dafā jab āwāz sunāī de to tumheṇ kahnā hai, ‘Ai Rab, farmā. Terā khādim sun rahā hai.’”

Samuel ek bār phir apne bistar par let gayā. ¹⁰ Rab ā kar wahān khaṛā huā aur pahle kī tarah pukārā, “Samuel! Samuel!” Laṛke ne jawāb diyā, “Ai Rab, farmā. Terā khādim sun rahā hai.”

¹¹ Phir Rab Samuel se hamkalām huā, “Dekh, maiñ Isrāīl meñ itnā haulnāk kām karūṅga ki jise bhī is kī khabar milegī us ke kān bajne lagenge. ¹² Us waqt maiñ shurū se le kar ākhir tak wuh tamām bāteṇ pūrī karūṅga jo maiñ ne Elī aur us ke gharāne ke bāre meñ kī haiñ. ¹³ Maiñ Elī ko āgāh kar chukā hūn ki us kā gharānā hameshā tak merī adālat kā nishānā banā rahegā. Kyoñki go use sāf mālūm thā ki us ke beṭe apnī āghalat harkatoñ se merā āghazab apne āp par lāenige to bhī us ne unheṇ karne diyā aur na rokā. ¹⁴ Maiñ ne qasam khāī hai ki Elī ke gharāne kā quṣūr na zabah aur na āghallā kī kisī qurbānī se dūr kiyā jā saktā hai balki is kā kaffārā kabhī bhī nahīn diyā jā sakegā!”

¹⁵ Is ke bād Samuel subah tak apne bistar par letā rahā. Phir wuh māmūl ke mutābiq uthā aur Rab ke ghar ke darwāze khol die. Wuh Elī ko apnī royā batāne se ḍartā thā, ¹⁶ lekin Elī ne use bulā kar kahā, “Samuel, mere beṭe!” Samuel ne jawāb diyā, “Jī, maiñ hāzir hūn.” ¹⁷ Elī ne pūchhā, “Rab ne tumheṇ kyā batāyā hai? Koī bhī bāt mujh se mat chhupānā! Allāh tumheṇ sakht sazā de agar tum ek lafz bhī mujh se poshīdā rakho.” ¹⁸ Phir Samuel ne use khul kar sab kuchh

batā diyā aur ek bāt bhī na chhupāī. Elī ne kahā, “Wuhī Rab hai. Jo kuchh us kī nazar meñ thīk hai use wuh kare.”

¹⁹ Samuel jawān hotā gayā, aur Rab us ke sāth thā. Us ne Samuel kī har bāt pūrī hone dī.

²⁰ Pūre Isrāīl ne Dān se le kar Bair-sabā tak jān liyā ki Rab ne apne nabī Samuel kī tasdīq kī hai.

²¹ Agle sāloñ meñ bhī Rab Sailā meñ apne kalām se Samuel par zāhir hotā rahā.

4

¹ Yoñ Samuel kā kalām Sailā se nikal kar pūre Isrāīl meñ phail gayā.

Filistī Ahd kā Sandūq Chhīn Lete Hain

Ek din Isrāīl kī Filistiyon ke sāth jang chhiṛ gai. Isrāīliyon ne laṛne ke lie nikal kar Abanazar ke pās apnī lashkargāh lagāī jabki Filistiyon ne Afīq ke pās apne dere dāle. ² Pahle Filistiyon ne Isrāīliyon par hamlā kiyā. Laṛte larṭe unhoñ ne Isrāīl ko shikast dī. Taqrīban 4,000 Isrāīlī maidān-e-jang meñ halāk hue.

³ Fauj lashkargāh meñ wāpas āī to Isrāīl ke buzurg sochné lage, “Rab ne Filistiyon ko ham par kyoñ fatah pāne dī? Āo, ham Rab ke ahd kā sandūq Sailā se le āen tāki wuh hamāre sāth chal kar hameñ dushman se bachāe.”

⁴ Chunāñche ahd kā sandūq jis ke ūpar Rabbul-afwāj karūbī farishton ke darmiyān takhtnashīn hai Sailā se lāyā gayā. Elī ke do beṭe Hufnī aur Fīnhās bhī sāth āe. ⁵ Jab ahd kā sandūq lashkargāh meñ pahuñchā to Isrāīlī nihāyat kħush ho kar buland āwāz se nāre

lagāne lage. Itnā shor mach gayā ki zamīn hil galī.

⁶ Yih sun kar Filistī chaunk uṭhe aur ek dūsre se pūchhne lage, “Yih kaisā shor hai jo Isrāīlī lashkargāh meñ ho rahā hai?” Jab patā chalā ki Rab ke ahd kā sandūq Isrāīlī lashkargāh meñ ā gayā hai ⁷ to wuh ghabrā kar chillāe, “Un kā dewatā un kī lashkargāh meñ ā gayā hai. Hāy, hamārā satyānās ho gayā hai! Pahle to aisā kabhī nahīn huā hai. ⁸ Ham par afsos! Kaun hameñ in tāqatwar dewatāoñ se bachāegā? Kyoñki inhīn ne registān meñ Misriyon ko har qism kī balā se mār kar halāk kar diyā thā. ⁹ Bhāiyo, ab diler ho aur mardānagī dikhāo, warnā ham usī tarah Ibrāniyon ke ġhulām ban jāēnge jaise wuh ab tak hamāre ġhulām the. Mardānagī dikhā kar laṛo!” ¹⁰ Āpas meñ aisī bāten karte karte Filistī laṛne ke lie nikle aur Isrāīl ko shikast dī. Har taraf qatl-e-ām nazar āyā, aur 30,000 piyāde Isrāīlī kām āe. Bāqī sab farār ho kar apne apne gharoñ meñ chhup gae. ¹¹ Elī ke do bete Hufnī aur Fīnhās bhī usī din halāk hue, aur Allāh ke ahd kā sandūq Filistiyon ke qabze meñ ā gayā.

Elī kī Maut

¹² Usī din Binyamīn ke qabile kā ek ādmī maidān-e-jang se bhāg kar Sailā pahuñch gayā. Us ke kapre phaṭe hue the aur sar par kħāk thī. ¹³⁻¹⁵ Elī saṛak ke kināre apnī kursī par baiṭhā thā. Wuh ab andhā ho chukā thā, kyoñki us kī umr 98 sāl thī. Wuh barī bechainī se rāste par dhyān de rahā thā tāki jang kī koī tāzā ķhabar

mil jāe, kyoñki use is bāt kī bařī fikr thī ki Allāh kā sandūq lashkargāh meñ hai.

Jab wuh ādmī shahr meñ dākhil huā aur logoñ ko sārā mājarā sunāyā to pūrā shahr chillāne lagā. Jab Elī ne shor sunā to us ne pūchhā, “Yih kyā shor hai?” Binyamīnī daur̄ kar Elī ke pās āyā aur bolā, ¹⁶ “Maiñ maidān-e-jang se āyā hūn. Āj hī maiñ wahān se farār huā.” Elī ne pūchhā, “Beṭā, kyā huā?” ¹⁷ Qāsid ne jawāb diyā, “Isrāīlī Filistiyon ke sāmne farār hue. Fauj ko har taraf shikast mānanī paṛī, aur āp ke donoñ beṭe Hufnī aur Fīnhās bhī māre gae hain. Afsos, Allāh kā sandūq bhī dushman ke qabze meñ ā gayā hai.”

¹⁸ Ahd ke sandūq kā zikr sunte hī Elī apnī kursī par se pīchhe kī taraf gir gayā. Chūñki wuh būrhā aur bhārī-bharkam thā is lie us kī gardan tūṭ gaī aur wuh wahīn maqdis ke darwāze ke pās hī mar gayā. Wuh 40 sāl Isrāīl kā qāzī rahā thā.

Fīnhās kī Bewā kī Maut

¹⁹ Us waqt Elī kī bahū yānī Fīnhās kī bīwī kā pāñw bhārī thā aur bachchā paidā hone wālā thā. Jab us ne sunā ki Allāh kā sandūq dushman ke hāth meñ ā gayā hai aur ki susar aur shauhar donoñ mar gae hain to use itnā sakht sadmā pahuñchā ki wuh shadid dard-e-zah meñ mutbalā ho gaī. Wuh jhuk gaī, aur bachchā paidā huā. ²⁰ Us kī jān nikalne lagī to dāiyōñ ne us kī hauslā-afzāi karke kahā, “Daro mat! Tumhāre beṭā paidā huā hai.” Lekin mān ne na jawāb diyā, na bāt par dhyān diyā. ²¹⁻²² Kyoñki wuh Allāh ke sandūq ke chhin jāne aur susar aur shauhar kī maut ke bāis nihāyat bedil ho

gaī thī. Us ne kahā, “Betē kā nām Yakabod yānī ‘Jalāl Kahān Rahā’ hai, kyoñki Allāh ke sandūq ke chhin jāne se Allāh kā jalāl Isrāil se jātā rahā hai.”

5

Filistiyon meñ Ahd kā Sandūq

¹ Filistī Allāh kā sandūq Aban-azar se Ashdūd Shahr meñ le gae. ² Wahān unhoñ ne use apne dewatā Dajūn ke mandir meñ but ke qarīb rakh diyā. ³ Agle din subah-sawere jab Ashdūd ke bāshinde mandir meñ dākhil hue to kyā dekhte hain ki Dajūn kā mujassamā muñh ke bal Rab ke sandūq ke sāmne hī paṛā hai. Unhoñ ne Dajūn ko uthā kar dubārā us kī jagah par khaṛā kiyā. ⁴ Lekin agle din jab subah-sawere āe to Dajūn dubārā muñh ke bal Rab ke sandūq ke sāmne paṛā huā thā. Lekin is martabā but kā sar aur hāth tūṭ kar dahliz par paṛe the. Sirf dhaṛ rah gayā thā. ⁵ Yihī wajah hai ki āj tak Dajūn kā koi bhī pujārī yā mehmān Ashdūd ke mandir kī dahliz par qadam nahīn rakhtā.

⁶ Phir Rab ne Ashdūd aur gird-o-nawāh ke dehāton par sakht dabāw dāl kar bāshindoñ ko pareshān kar diyā. Un meñ achānak aziyatnāk phoṛoñ kī wabā phail gaī. ⁷ Jab Ashdūd ke logoñ ne is kī wajah jān lī to wuh bole, “Lāzim hai ki Isrāil ke Khudā kā sandūq hamāre pās na rahe. Kyoñki us kā ham par aur hamāre dewatā Dajūn par dabāw nāqābil-e-bardāsht hai.”

⁸ Unhoñ ne tamām Filistī hukmrānoñ ko ikaṭṭhā karke pūchhā, “Ham Isrāil ke Khudā ke sandūq ke sāth kyā kareñ?”

Unhoń ne mashwarā diyā, “Use Jāt Shahr meń le jāeń.” ⁹ Lekin jab ahd kā sandūq Jāt meń chhoṛā gayā to Rab kā dabāw us shahr par bhī ā gayā. Barī afrā-tafrī paidā huī, kyońki chhoṭoń se le kar巴ron tak sab ko aziyatnāk phore nikal āe. ¹⁰ Tab unhoń ne ahd kā sandūq āge Aqrūn bhej diyā.

Lekin sandūq abhī pahuńchne wālā thā ki Aqrūn ke bāshinde chīkhne lage, “Wuh Isrāīl ke Қhudā kā sandūq hamāre pās lāe hain tāki hameń halāk kar deń!” ¹¹ Tamām Filistī hukmrānoń ko dubārā bulāyā gayā, aur aqrūniyoń ne taqāzā kiyā ki sandūq ko shahr se dūr kiyā jāe. Wuh bole, “Ise wahān wāpas bhejā jāe jahān se āyā hai, warnā yih hameń balki pūrī qaum ko halāk kar dālegā.” Kyońki shahr par Rab kā sakht dabāw hāwī ho gayā thā. Mohlak wabā ke bāis us meń қhauf-o-hirās kī lahar dauer gai. ¹² Jo marne se bachā use kam az kam phore nikal āe. Chāroń taraf logoń kī chīkh-pukār fizā meń buland huī.

6

Ahd kā Sandūq Isrāīl Wāpas Lāyā Jātā Hai

¹ Allāh kā sandūq ab sāt mahīne Filistiyoń ke pās rahā thā. ² Ākhirkār unhoń ne apne tamām pujāriyoń aur rammālon ko bulā kar un se mashwarā kiyā, “Ab ham Rab ke sandūq kā kyā kareń? Hameń batāeń ki ise kis tarah is ke apne mulk meń wāpas bhejeń.”

³ Pujāriyoń aur rammālon ne jawāb diyā, “Agar āp use wāpas bhejeń to waise mat bhejnā balki quſūr kī qurbānī sāth bhejnā. Tab āp ko

shifā milegī, aur āp jān leñge ki wuh āp ko sazā dene se kyoñ nahīn bāz āyā.”

⁴ Filistiyon ne pūchhā, “Ham use kis qism kī quşur kī qurbānī bhejeñ?”

Unhoñ ne jawāb diyā, “Filistiyon ke pāñch hukmrān hain, is lie sone ke pāñch phore aur pāñch chūhe banwāeñ, kyoñki āp sab is ek hī wabā kī zad meñ āe hue haiñ, khāh hukmrān hoñ, khāh riāyā. ⁵ Sone ke yih phore aur mulk ko tabāh karne wāle chūhe banā kar Isrāil ke dewatā kā ehtirām karen. Shāyad wuh yih dekh kar āp, āp ke dewatāoñ aur mulk ko sazā dene se bāz āe. ⁶ Āp kyoñ purāne zamāne ke Misriyon aur un ke bādshāh kī tarah aṛ jāeñ? Kyoñki us waqt Allāh ne Misriyon ko itni sakht musībat meñ dāl diyā ki ākhirkār unheñ Isrāiliyon ko jāne denā paṛā.

⁷ Ab bailgārī banā kar us ke āge do gāeñ joteñ. Aisī gāeñ hoñ jin ke dūdh pīne wāle bachche hoñ aur jin par ab tak juā na rakhā gayā ho. Gāyoñ ko bailgārī ke āge joteñ, lekin un ke bachchoñ ko sāth jāne na deñ balki unheñ kahīn band rakheñ. ⁸ Phir Rab kā sandūq bailgārī par rakhā jāe aur us ke sāth ek thailā jis meñ sone kī wuh chīzeñ hoñ jo āp quşur kī qurbānī ke taur par bhej rahe haiñ. Is ke bād gāyoñ ko khulā chhor deñ. ⁹ Ghaur kareñ ki wuh kaun-sā rāstā iķhtiyār kareñgī. Agar Isrāil ke Bait-shams kī taraf chaleñ to phir mālūm hogā ki Rab ham par yih baṛī musībat lāyā hai. Lekin agar wuh kahīn aur chaleñ to matlab hogā ki Isrāil ke dewatā ne hamen sazā nahīn dī balki sab kuchh ittafāq se huā hai.”

10 Filistiyon ne aisā hī kiyā. Unhoṇ ne do gāen naī bailgārī meñ jot kar un ke chhoṭe bachchoṇ ko kahīn band rakhā. **11** Phir unhoṇ ne ahd kā sandūq us thaile samet jis meñ sone ke chūhe aur phoṛe the bailgārī par rakhā.

12 Jab gāyoṇ ko chhoṛ diyā gayā to wuh ḍakrātī ḍakrātī sīdhī Bait-shams ke rāste par ā gaīn aur na dāīn, na bāīn taraf haṭīn. Filistiyon ke sardār Bait-shams kī sarhad tak un ke pīchhe chale.

13 Us waqt Bait-shams ke bāshinde nīche wādī meñ gandum kī fasal kāṭ rahe the. Ahd kā sandūq dekh kar wuh nihāyat khush hue.

14 Bailgārī ek khet tak pahuṇchī jis kā mālik Bait-shams kā rahne wālā Yashua thā. Wahān wuh ek bare patthar ke pās ruk gaī. Logoṇ ne bailgārī kī lakaṛī ṭukṛē ṭukṛē karke use jalā diyā aur gāyoṇ ko zabah karke Rab ko bhasm hone wālī qurbānī ke taur par pesh kiyā. **15** Lāwī ke qabīle ke kuchh mardoṇ ne Rab ke sandūq ko bailgārī se uṭhā kar sone kī chīzoṇ ke thaile samet patthar par rakh diyā. Us din Bait-shams ke logoṇ ne Rab ko bhasm hone wālī aur zabah kī qurbāniyān pesh kīn.

16 Yih sab kuchh dekhne ke bād Filistī sardār usī din Aqrūn wāpas chale gae. **17** Filistiyon ne apnā quṣūr dūr karne ke lie har ek shahr ke lie sone kā ek phoṛā banā liyā thā yānī Ashdūd, Ghazzā, Askqalūn, Jāt aur Aqrūn ke lie ek ek phoṛā. **18** Is ke alāwā unhoṇ ne har shahr aur us ke gird-o-nawāh kī ābādiyon ke lie sone kā ek ek chūhā banā liyā thā. Jis bare patthar par ahd kā sandūq rakhā gayā wuh āj tak Yashua Bait-shamsī ke khet meñ is bāt kī gawāhī detā hai.

Ahd kā Sandūq Qiriyat-yārīm Men

¹⁹ Lekin Rab ne Bait-shams ke bāshindoń ko sazā dī, kyoñki un meň se bāz ne ahd ke sandūq meň nazar dālī thī. Us waqt 70 afrād halāk hue. Rab kī yih sakht sazā dekh kar Bait-shams ke log mātam karne lage. ²⁰ Wuh bole, “Kaun is muqaddas Khudā ke huzūr qāym rah saktā hai? Yih hamāre bas kī bāt nahīn, lekin ham Rab kā sandūq kis ke pās bhejeñ?” ²¹ Ākhir meň unhoń ne Qiriyat-yārīm ke bāshindoń ko paighām bhejā, “Filistiyon ne Rab kā sandūq wāpas kar diyā hai. Ab āeñ aur use apne pās le jāeñ!”

7

¹ Yih sun kar Qiriyat-yārīm ke mard āe aur Rab kā sandūq apne shahr meň le gae. Wahān unhoń ne use Abīnadāb ke ghar meň rakh diyā jo pahārī par thā. Abīnadāb ke betē Iliyazar ko makhsūs kiyā gayā tāki wuh ahd ke sandūq kī pahrādārī kare.

Taubā kī Wajah se Isrāīlī Filistiyon par Fatah Pāte Hain

² Ahd kā sandūq 20 sāl ke tawīl arse tak Qiriyat-yārīm meň paṛā rahā. Is daurān tamām Isrāīl mātam kartā rahā, kyoñki lagtā thā ki Rab ne unheñ tark kar diyā hai. ³ Phir Samuel ne tamām Isrālliyoń se kahā, “Agar āp wāqaī Rab ke pās wāpas ānā chāhte hain to ajnabī mābūdoń aur Astārāt Dewī ke but dūr kar deñ. Pūre dil ke sāth Rab ke tābe ho kar usī kī khidmat karen. Phir hī wuh āp ko Filistiyon se bachāegā.”

⁴ Isrāīliyon ne us kī bāt mān lī. Wuh Bāl aur Astārāt ke buton ko phaink kar sirf Rab kī khidmat karne lage. ⁵ Tab Samuel ne elān kiyā, “Pūre Isrāīl ko Misfāh meñ jamā kareñ to maiñ wahān Rab se duā karke āp kī sifārish karūṅga.”

⁶ Chunāñche wuh sab Misfāh meñ jamā hue. Taubā kā izhār karke unhoñ ne kueñ se pānī nikāl kar Rab ke huzūr undel diyā. Sāth sāth unhoñ ne pūrā din rozā rakhā aur iqrār kiyā, “Ham ne Rab kā gunāh kiyā hai.” Wahān Misfāh meñ Samuel ne Isrāīliyon ke lie kachahrī lagāi.

⁷ Filistī hukmrānoñ ko patā chalā ki Isrāīlī Misfāh meñ jamā hue hain to wuh un se laṛne ke lie āe. Yih sun kar Isrāīlī saķht ghabrā gae ⁸ aur Samuel se minnat kī, “Duā karte raheñ! Rab hamāre Khudā se iltamās karne se na ruken taki wuh hameñ Filistiyoñ se bachāe.” ⁹ Tab Samuel ne bher kā dūdh pītā bachchā chun kar Rab ko bhasm hone wālī qurbānī ke taur par pesh kiyā. Sāth sāth wuh Rab se iltamās kartā rahā.

Aur Rab ne us kī sunī. ¹⁰ Samuel abhī qurbānī pesh kar rahā thā ki Filistī wahān pahuñch kar Isrāīliyon par hamlā karne ke lie taiyār hue. Lekin us din Rab ne zor se kaṛaktī huī āwāz se Filistiyoñ ko itnā dahshatzadā kar diyā ki wuh darham-barham ho gae aur Isrāīlī āsānī se unheñ shikast de sake. ¹¹ Isrāīliyoñ ne Misfāh se nikal kar Bait-kār ke nīche tak dushman kā tāqqub kiyā. Rāste meñ bahut-se Filistī halāk hue.

¹² Is fatah kī yād meñ Samuel ne Misfāh aur Shen ke darmiyān ek baṛā patthar nasab kar diyā. Us ne patthar kā nām Aban-azar yānī

‘Madad kā Patthar’ rakhā. Kyoñki us ne kahā, “Yahāñ tak Rab ne hamārī madad kī hai.” ¹³ Is tarah Filistiyoñ ko maǵhlūb kiyā gayā, aur wuh dubārā Isrāīl ke ilāqe meñ na ghuse. Jab tak Samuel jitā rahā Filistiyoñ par Rab kā sakht dabāw rahā. ¹⁴ Aur Aqrūn se le kar Jāt tak jitnī Isrāīlī ābādiyāñ Filistiyoñ ke hāth meñ ā gaī thīn wuh sab un kī zamīnoñ samet dubārā Isrāīl ke qabze meñ ā gaīn. Amoriyoñ ke sāth bhī sulah ho gaī.

¹⁵ Samuel apne jīte-jī Isrāīl kā qāzī aur rāhnumā rahā. ¹⁶ Har sāl wuh Baitel, Jiljāl aur Misfāh kā daurā kartā, kyoñki in tīn jaghoñ par wuh Isrāīliyoñ ke lie kachahrī lagāyā kartā thā. ¹⁷ Is ke bād wuh dubārā Rāmā apne ghar wāpas ā jātā jahāñ mustaqil kachahrī thī. Wahāñ us ne Rab ke lie qurbāngāh bhī banāī thī.

8

Isrāīl Bādshāh kā Taqāzā Kartā Hai

¹ Jab Samuel būrhā huā to us ne apne do beþoñ ko Isrāīl ke qāzī muqarrar kiyā. ² Baré kā nām Yoel thā aur chhoṭe kā Abiyāh. Donoñ Bair-sabā meñ logoñ kī kachahrī lagāte the. ³ Lekin wuh bāp ke namūne par nahīn chalte balki rishwat khā kar ǵhalat faisle karte the.

⁴ Phir Isrāīl ke buzurg mil kar Samuel ke pās āe, jo Rāmā meñ thā. ⁵ Unhoñ ne kahā, “Dekhen, āp būrhe ho gae haiñ aur āp ke beþe āp ke namūne par nahīn chalte. Ab ham par bādshāh muqarrar kareñ tāki wuh hamārī us

tarah rāhnumāī kare jis tarah dīgar aqwām meñ dastūr hai.”

⁶ Jab buzurgoṇ ne rāhnumāī ke lie bādshāh kā taqāzā kiyā to Samuel nihāyat nākhush huā. Chunānche us ne Rab se hidāyat māngī. ⁷ Rab ne jawāb diyā, “Jo kuchh bhī wuh tujh se māngte hain unheñ de de. Is se wuh tujhe radd nahīn kar rahe balki mujhe, kyoñki wuh nahīn chāhte ki maiñ un kā Bādshāh rahūn. ⁸ Jab se maiñ unheñ Misr se nikāl lāyā wuh mujhe chhoṛ kar dīgar mābūdoṇ kī khidmat karte āe hain. Aur ab wuh tujh se bhī yihī sulūk kar rahe hain. ⁹ Un kī bāt mān le, lekin sanjīdagī se unheñ un par hukūmat karne wāle bādshāh ke huqūq se āgāh kar.”

Bādshāh ke Huqūq

¹⁰ Samuel ne bādshāh kā taqāzā karne wāloṇ ko sab kuchh kah sunāyā jo Rab ne use batāyā thā. ¹¹ Wuh bolā, “Jo bādshāh āp par hukūmat karegā us ke yih huqūq hoṅge: Wuh āp ke betoṇ kī bhartī karke unheñ apne rathoṇ aur ghorōṇ ko sañbhālne kī zimmedārī degā. Unheñ us ke rathoṇ ke āge āge daurnā paṛegā. ¹² Kuchh us kī fauj ke janral aur kaptān baneṅge, kuchh us ke khetoṇ meñ hal chalāne aur fasleñ kātne par majbūr ho jāeṅge, aur bāz ko us ke hathiyār aur rath kā sāmān banānā paṛegā. ¹³ Bādshāh āp kī betiyoṇ ko āp se chhīn legā tāki wuh us ke lie khānā pakāeñ, roṭī banāeñ aur khushbū taiyār karen. ¹⁴ Wuh āp ke khetoṇ aur āp ke angūr aur zaitūn ke bāghoṇ kā behtarīn hissā chun kar apne mulāzimoṇ ko de degā. ¹⁵ Bādshāh

āp ke anāj aur angūr kā daswān̄ hissā le kar apne afsaron̄ aur mulāzimoṇ̄ ko de degā. ¹⁶ Āp ke naukar-naukarāniyān̄, āp ke moṭe-tāze bail aur gadhe usī ke istemāl meṇ̄ āeṅge. ¹⁷ Wuh āp kī bheṛ-bakriyoṇ̄ kā daswān̄ hissā talab karegā, aur āp khud us ke ḡhulām hoṅge.

¹⁸ Tab āp pachhtā kar kaheṅge, ‘Ham ne bādshāh kā taqāzā kyoṇ kiyā?’ Lekin jab āp Rab ke huzūr chikhte-chillāte madad chāheṅge to wuh āp kī nahīn̄ sunegā.”

¹⁹ Lekin logoṇ̄ ne Samuel kī bāt na mānī balki kahā, “Nahīn̄, to bhī ham bādshāh chāhte haiṇ̄, ²⁰ kyoṇki phir hī ham dīgar qaumoṇ̄ kī mānind hoṅge. Phir hamārā bādshāh hamārī rāhnumāī karegā aur jang meṇ̄ hamāre āge āge chal kar dushman se laṛegā.” ²¹ Samuel ne Rab ke huzūr yih bāteṇ̄ dohrāin̄. ²² Rab ne jawāb diyā, “Un kā taqāzā pūrā kar, un par bādshāh muqarrar kar!”

Phir Samuel ne Isrāīl ke mardoiṇ̄ se kahā, “Har ek apne apne shahr wāpas chalā jāe.”

9

Sāūl Bāp kī Gadhiyān̄ Talāsh Kartā Hai

¹ Binyamīn ke qabāylī ilāqe meṇ̄ ek Binyamīnī banām Qīs rahtā thā jis kā achchhā-khāsā asar-o-rasūkh thā. Bāp kā nām Abiyel bin Saror bin Bakūrat bin Afīkh thā. ² Qīs kā betā Sāūl jawān aur khūbsūrat thā balki Isrāīl meṇ̄ koi aur itnā khūbsūrat nahīn̄ thā. Sāth sāth wuh itnā lambā thā ki bāqī sab log sirf us ke kandhoṇ̄ tak āte the.

³ Ek din Sāūl ke bāp Qīs kī gadhiyān̄ gum ho gaīn̄. Yih dekh kar us ne apne betē Sāūl ko hukm

diyā, “Naukar ko apne sāth le kar gadhiyon ko dhūnd lāeñ.” ⁴ Donoñ ādmī Ifrāīm ke pahārī ilāqe aur Salīsā ke ilāqe meñ se guzare, lekin besūd. Phir unhoñ ne Sālīm ke ilāqe meñ khoj lagāyā, lekin wahān bhī gadhiyān na milīn. Is ke bād wuh Binyamīn ke ilāqe meñ ghūmte phire, lekin befāydā. ⁵ Chalte chalte wuh Sūf ke qarīb pahuñch gae. Sāūl ne naukar se kahā, “Āo, ham ghar wāpas chaleñ, aisā na ho ki wālid gadhiyon kī nahīn balki hamārī fikr kareñ.”

⁶ Lekin naukar ne kahā, “Is shahr meñ ek mard-e-Khudā hai. Log us kī barī izzat karte hain, kyonki jo kuchh bhī wuh kahtā hai wuh pūrā ho jātā hai. Kyoñ na ham us ke pās jāeñ? Shāyad wuh hamen batāe ki gadhiyon ko kahān dhūndnā chāhie.”

⁷ Sāūl ne pūchhā, “Lekin ham use kyā deñ? Hamārā khānā ķhatm ho gayā hai, aur hamāre pās us ke lie tohfā nahīn hai.”

⁸ Naukar ne jawāb diyā, “Koī bāt nahīn, mere pās chāndī kā chhoṭā sikkā * hai. Yih maiñ mard-e-Khudā ko de dūngā tāki batāe ki ham kis taraf dhūndeñ.”

⁹⁻¹¹ Sāūl ne kahā, “Thīk hai, chaleñ.” Wuh shahr kī taraf chal pare tāki mard-e-Khudā se bāt kareñ. Jab pahārī dhalān par shahr kī taraf chaṛh rahe the to kuchh laṛkiyān pānī bharne ke lie niklīn. Ādmiyon ne un se pūchhā, “Kyā ġhaibbīn shahr meñ hai?” (Purāne zamāne meñ nabī ġhaibbīn kahlātā thā. Agar koī Allāh se

* **9:8** Lafzī tarjumā: chāndī ke sikke kī ek chauthāī.

kuchh mälüm karnā chāhtā to kahtā, “Āo, ham ġhaibbīn ke pās chaleñ.”)

12-13 Laṛkiyon ne jawāb diyā, “Jī, wuh abhī abhī pahuñchā hai, kyoñki shahr ke log āj pahārī par qurbāniyān chaṛhā kar īd manā rahe hain. Agar jaldī kareñ to pahārī par chaṛhnī se pahle us se mulāqāt ho jāegī. Us waqt tak ziyāfat shurū nahīn hogī jab tak ġhaibbīn pahuñch na jāe. Kyoñki use pahle khāne ko barkat denā hai, phir hī mehmānoñ ko khānā khāne kī ijāzat hai. Ab jāeñ, kyoñki isī waqt āp us se bāt kar sakte hain.”

14 Chunāñche Sāūl aur naukar shahr kī taraf baṛhe. Shahr ke darwāze par hī Samuel se mulāqāt ho gaī jo wahān se nikal kar qurbāngāh kī pahārī par chaṛhnī ko thā.

Samuel Sāūl kī Mehmān-nawāzī Kartā Hai

15 Rab Samuel ko ek din pahle paighām de chukā thā, **16** “Kal maiñ isī waqt Mulk-e-Binyamīn kā ek ādmī tere pās bhej dūngā. Use masah karke merī qaum Isrāīl par bādshāh muqarrar kar. Wuh merī qaum ko Filistiyon se bachāegā. Kyoñki maiñ ne apnī qaum kī musībat par dhyān diyā hai, aur madad ke lie us kī chīkheñ mujh tak pahuñch gaī hain.” **17** Ab jab Samuel ne shahr ke darwāze se nikalte hue Sāūl ko dekhā to Rab Samuel se hamkalām huā, “Dekh, yihī wuh ādmī hai jis kā zikr maiñ ne kal kiyā thā. Yihī merī qaum par hukūmat karegā.”

18 Wahīn shahr ke darwāze par Sāūl Samuel se muķhātib huā, “Mehrbānī karke mujhe batāie ki ġhaibbīn kā ghar kahān hai?” **19** Samuel ne jawāb diyā, “Main hī ġhaibbīn hūn. Āeñ, us

pahārī par chaleñ jis par ziyāfat ho rahī hai, kyoñki āj āp mere mehmān haiñ. Kal maiñ subah-sawere āp ko āp ke dil kī bāt batā dūngā. **20** Jahāñ tak tīn din se gumshudā gadhiyon kā tälluq hai, un kī fikr na kareñ. Wuh to mil gaī haiñ. Waise āp aur āp ke bāp ke gharāne ko Isrāil kī har qīmtī chīz hāsil hai.” **21** Sāūl ne pūchhā, “Yih kis tarah? Maiñ to Isrāil ke sab se chhoṭe qabile Binyamīn kā hūn, aur merā khāndān qabile mein sab se chhoṭā hai.”

22 Samuel Sāūl ko naukar samet us hāl mein le gayā jis men ziyāfat ho rahī thī. Taqrīban 30 mehmān the, lekin Samuel ne donoñ ādmiyon ko sab se izzat kī jagah par biṭhā diyā. **23** Khānsāme ko us ne hukm diyā, “Ab gosht kā wuh ṭukṛā le āo jo maiñ ne tumheñ de kar kahā thā ki use alag rakhnā hai.” **24** Khānsāme ne qurbānī kī rān lā kar use Sāūl ke sāmne rakh diyā. Samuel bolā, “Yih āp ke lie mahfūz rakhā gayā hai. Ab khāeñ, kyoñki dūsroñ ko dāwat dete waqt maiñ ne yih gosht āp ke lie aur is mauqe ke lie alag kar liyā thā.” Chunāñche Sāūl ne us din Samuel ke sāth khānā khāyā.

25 Ziyāfat ke bād wuh pahārī se utar kar shahr wāpas ēe, aur Samuel apne ghar kī chhat par Sāūl se bātchit karne lagā. **26** Agle din jab pau phaṭne lagī to Samuel ne nīche se Sāūl ko jo chhat par so rahā thā āwāz dī, “Uthen! Maiñ āp ko rukhsat karūn.” Sāūl jāg uṭhā aur wuh mil kar rawānā hue. **27** Jab wuh shahr ke kināre par pahuñche to Samuel ne Sāūl se kahā, “Apne naukar ko āge bhejeñ.” Jab naukar chalā gayā to Samuel bolā, “Thahar jāeñ, kyoñki mujhe āp

ko Allāh kā ek paighām sunānā hai.”

10

Sāūl ko Masah Kiyā Jatā Hai

¹ Phir Samuel ne kuppī le kar Sāūl ke sar par zaitūn kā tel undel diyā aur use bosā de kar kahā, “Rab ne āp ko apnī khās milkiyat par rāhnumā muqarrar kiyā hai. ² Mere pās se chale jāne ke bād jab āp Binyamīn kī sarhad ke shahr Zilzak̄h ke qarīb Rākhil kī qabr ke pās se guzareinge to āp kī mulāqāt do ādmīyon se hogī. Wuh āp se kahēnge, ‘Jo gadhiyān āp dhūndne gae wuh mil gaī hain. Aur ab āp ke bāp gadhiyon kī nahīn balki āp kī fikr kar rahe hain. Wuh kah rahe hain ki maiñ kis tarah apne bete kā patā karūn?’

³ Āp āge jā kar Tabūr ke balūt ke daraqht ke pās pahuñcheinge. Wahān tīn ādmī āp se milenge jo Allāh kī ibādat karne ke lie Baitel jā rahe hōnge. Ek ke pās tīn chhotī bakriyān, dūsre ke pās tīn rotiyān aur tīsre ke pās mai kī mashk hogī. ⁴ Wuh āp ko salām kah kar do rotiyān deinge. Un kī yih rotiyān qabūl karen.

⁵ Is ke bād āp Allāh ke Jibiyā jāeinge jahān Filistiyon kī chaukī hai. Shahr meñ dākhil hote waqt āp kī mulāqāt nabiyon ke ek julūs se hogī jo us waqt pahārī kī qurbāngāh se utar rahā hogā. Un ke āge āge sitār, daf, bānsriyān aur sarod bajāne wāle chaleinge, aur wuh nabuwwat kī hālat meñ hōnge. ⁶ Rab kā Rūh āp par bhī nāzil hogā, aur āp un ke sāth nabuwwat karenge. Us waqt āp farq shakhs meñ tabdīl ho jāeinge.

⁷ Jab yih tamām nishān wujūd meñ āeñge to wuh kuchh karen̄ jo āp ke zahan meñ ā jāe, kyoñki Allāh āp ke sāth hogā. ⁸ Phir mere āge Jiljāl chale jāeñ. Maiñ bhī āñgā aur wahān bhasm hone wālī aur salāmatī kī qurbāniyān pesh karūñga. Lekin āp ko sāt din merā intazār karnā hai. Phir maiñ ā kar āp ko batā dūngā ki āge kyā karnā hai.”

⁹ Sāūl rawānā hone ke lie Samuel ke pās se muñā to Allāh ne us kā dil tabdīl kar diyā. Jin nishānoñ kī bhī peshgoī Samuel ne kī thī wuh usī din pūrī huī. ¹⁰ Jab Sāūl aur us kā naukar Jibiyā pahuñche to wahān un kī mulāqāt mazkūrā nabiyoñ ke julūs se huī. Allāh kā Rūh Sāūl par nāzil huā, aur wuh un ke darmiyān nabuwwat karne lagā. ¹¹ Kuchh log wahān the jo bachpan se us se wāqif the. Sāūl ko yoñ nabiyoñ ke darmiyān nabuwwat karte hue dekh kar wuh āpas meñ kahne lage, “Qīs ke beñe ke sāth kyā huā? Kyā Sāūl ko bhī nabiyoñ meñ shumār kiyā jātā hai?” ¹² Ek maqāmī ādmī ne jawāb diyā, “Kaun in kā bāp hai?” Bād meñ yih muhāwarā ban gayā, “Kyā Sāūl ko bhī nabiyoñ meñ shumār kiyā jātā hai?”

¹³ Nabuwwat karne ke iñkititām par Sāūl pahārī par charh gayā jahān qurbāngāh thī. ¹⁴ Jab Sāūl naukar samet wahān pahuñchā to us ke chachā ne pūchhā, “Āp kahān the?” Sāūl ne jawāb diyā, “Ham gumshudā gadhiyoñ ko ñhūñdne ke lie nikle the. Lekin jab wuh na milīñ to ham Samuel ke pās gae.” ¹⁵ Chachā bolā, “Achchhā? Us ne āp ko kyā batāyā?” ¹⁶ Sāūl ne

jawāb diyā, “Khair, us ne kahā ki gadhiyān mil gaī hain.” Lekin jo kuchh Samuel ne bādshāh banane ke bāre meñ batāyā thā us kā zikr us ne na kiyā.

Sāūl Bādshāh Ban Jātā Hai

¹⁷ Kuchh der ke bād Samuel ne awām ko bulā kar Misfāh meñ Rab ke huzūr jamā kiyā. ¹⁸ Us ne kahā, “Rab Isrāīl kā Khudā farmātā hai, ‘Maiñ Isrāīl ko Misr se nikāl lāyā. Maiñ ne tumheñ Misriyon aur un tamām sultanatoñ se bachāyā jo tum par zulm kar rahī thīn. ¹⁹ Lekin go maiñ ne tumheñ tumhārī tamām musībaton aur tangiyoñ se chhuṭkārā diyā to bhī tum ne apne Khudā ko mustarad kar diyā. Kyonki tum ne isrār kiyā ki ham par bādshāh muqarrar karo! Ab apne apne qabiloñ aur ķhāndānoñ kī tartīb ke mutābiq Rab ke huzūr khaṛe ho jāo.’”

²⁰ Yih kah kar Samuel ne tamām qabiloñ ko Rab ke huzūr pesh kiyā. Qurā dālā gayā to Binyamīn ke qabile ko chunā gayā. ²¹ Phir Samuel ne Binyamīn ke qabile ke sāre ķhāndānoñ ko Rab ke huzūr pesh kiyā. Matrī ke ķhāndān ko chunā gayā. Yoñ qurā dālte dālte Sāūl bin Qīs ko chunā gayā. Lekin jab Sāūl ko dhūndā gayā to wuh ġhāyb thā.

²² Unhoñ ne Rab se dariyāft kiyā, “Kyā Sāūl yahān pahuñch chukā hai?” Rab ne jawāb diyā, “Wuh sāmān ke bīch meñ chhup gayā hai.” ²³ Kuchh log daur kar use sāmān meñ se nikāl kar awām ke pās le āe. Jab wuh logoñ meñ kharā huā to itnā lambā thā ki bāqī sab log sirf us ke kandhoñ tak āte the.

²⁴ Samuel ne kahā, “Yih ādmī dekho jise Rab ne chun liyā hai. Awām men us jaisā koī nahīn hai!” Tamām log ķushī ke māre “Bādshāh zindābād!” Kā nārā lagāte rahe. ²⁵ Samuel ne bādshāh ke huqūq tafsīl se sunāe. Us ne sab kuchh kitāb men likh diyā aur use Rab ke maqdīs men mahfūz rakhā. Phir us ne awām ko ruķhsat kar diyā.

²⁶ Sāūl bhī apne ghar chalā gayā jo Jibiyā men thā. Kuchh faujī us ke sāth chale jin ke dilon ko Allāh ne chhū diyā thā. ²⁷ Lekin aise sharīr log bhī the jinhol ne us kā mazāq urā kar pūchhā, “Bhalā yih kis tarah hamen bachā saktā hai?” Wuh use haqīr jānte the aur use tohfe pesh karne ke lie bhī taiyār na hue. Lekin Sāūl un kī bāten nazarandāz karke ķāmosh hī rahā.

11

Sāūl Ammoniyon par Fatah Pātā Hai

¹ Kuchh der ke bād Ammonī bādshāh Nāhas ne apnī fauj le kar Yabīs-jiliyād kā muhāsarā kiyā. Yabīs ke tamām afrād ne us se guzārish kī, “Hamare sāth muāhadā karen to ham āindā āp ke tābe rahēnge.” ² Nāhas ne jawāb diyā, “Thīk hai, lekin is shart par ki maiñ har ek kī dahnī āñkh nikāl kar tamām Isrāīl kī be'izzatī karūngā!” ³ Yabīs ke buzurgoñ ne darkhāst kī, “Hamen ek hafte kī muhlat dījie tāki ham apne qāsidoñ ko Isrāīl kī har jagah bhejeñ. Agar koī hamen bachāne ke lie na āe to ham hathiyār ḥāl kar shahr ko āp ke hawāle kar deñge.”

⁴ Qāsid Sāūl ke shahr Jibiyā bhī pahuñch gae. Jab maqāmī logoñ ne un kā paighām sunā to

pūrā shahr phūt̄ phūt̄ kar rone lagā. ⁵ Us waqt Sāūl apne bailoṇ ko kheton se wāpas lā rahā thā. Us ne pūchhā, “Kyā huā hai? Log kyon ro rahe haiṇ?” Use qāsidoṇ kā paighām sunāyā gayā.

⁶ Tab Sāūl par Allāh kā Rūh nāzil huā, aur use sakht ġhussā āyā. ⁷ Us ne bailoṇ kā joṛā le kar unheṇ ṭukṛे ṭukṛे kar diyā. Phir qāsidoṇ ko yih ṭukṛे pakaṛā kar us ne unheṇ yih paighām de kar Isrāīl kī har jagah bhej diyā, “Jo Sāūl aur Samuel ke pīchhe chal kar Ammoniyoṇ se larne nahīn jāegā us ke bail isī tarah ṭukṛे ṭukṛe kar die jāēnge!”

Yih ķhabar sun kar logoṇ par Rab kī dahshat tārī ho gaī, aur sab ke sab ek dil ho kar Ammoniyoṇ se larne ke lie nikle. ⁸ Bazaq ke qarīb Sāūl ne fauj kā jāyzā liyā. Yahūdāh ke 30,000 afrād the aur bāqī qabiloṇ ke 3,00,000.

⁹ Unhoṇ ne Yabīs-jiliyād ke qāsidoṇ ko wāpas bhej kar batāyā, “Kal dopahar se pahle pahle āp ko bachā liyā jāegā.” Wahān ke bāshinde yih ķhabar sun kar bahut khush hue. ¹⁰ Unhoṇ ne Ammoniyoṇ ko ittalā di, “Kal ham hathiyār ḍāl kar shahr ke darwāze khol deñge. Phir wuh kuchh kareṇ jo āp ko ṭhīk lage.”

¹¹ Agle din subah-sawere Sāūl ne fauj ko tīn hissoṇ meṇ taqsim kiyā. Sūraj ke tulū hone se pahle pahle unhoṇ ne tīn simton se dushman kī lashkargāh par hamlā kiyā. Dopahar tak unhoṇ ne Ammoniyoṇ ko mār mār kar ķhatm kar diyā. Jo thore-bahut log bach gae wuh yoṇ titar-bitar ho gae ki do bhī ikaṭṭhe na rahe.

Sāūl kī Dubārā Tasdīq

¹² Fatah ke bād log Samuel ke pās ā kar kahne lage, “Wuh log kahān haiñ jin̄hoñ ne etarāz kiyā ki Sāūl ham par hukūmat kare? Unheñ le āen̄ tāki ham unheñ mār deñ.” ¹³ Lekin Sāūl ne unheñ rok diyā. Us ne kahā, “Nahīn, āj to ham kisī bhī bhāī ko sazā-e-maut nahīn deñge, kyoñki is din Rab ne Isrāīl ko rihāī bakhs̄ī hai!” ¹⁴ Phir Samuel ne elān kiyā, “Āo, ham Jiljāl jā kar dubārā is kī tasdīq karen̄ ki Sāūl hamārā bādshāh hai.” ¹⁵ Chunāñche tamām logoñ ne Jiljāl jā kar Rab ke huzūr is kī tasdīq kī ki Sāūl hamārā bādshāh hai. Is ke bād unhoñ ne Rab ke huzūr salāmatī kī qurbāniyāñ pesh karke barā jashn manāyā.

12

Samuel kī Alwidāī Taqrīr

¹ Tab Samuel tamām Isrāīl se mukhātib huā, “Maiñ ne āp kī har bāt mān kar āp par bādshāh muqarrar kiyā hai. ² Ab yihī āp ke āge āge chal kar āp kī rāhnumāī karegā. Maiñ khud būrhā hūn̄, aur mere bāl safed ho gae hain̄ jabki mere bete āp ke darmiyān hī rahte hain̄. Maiñ jawānī se le kar āj tak āp kī rāhnumāī kartā āyā hūn̄. ³ Ab maiñ hāzir hūn̄. Agar mujh se koī ghaltī huī hai to Rab aur us ke masah kie hue bādshāh ke sāmne is kī gawāhī deñ. Kyā maiñ ne kisī kā bail yā gadhā lūt liyā? Kyā maiñ ne kisī se ġhalat fāydā uthāyā yā kisī par zulm kiyā? Kyā maiñ ne kabhī kisī se rishwat le kar ġhalat faisla kiyā hai? Agar aisā huā to mujhe batāeñ! Phir maiñ sab kuchh wāpas kar dūngā.”

⁴ Ijtimā ne jawāb diyā, “Na āp ne ham se ġhalat fāydā uthāyā, na ham par zulm kiyā hai. Āp ne kabhī bhī rishwat nahīn lī.” ⁵ Samuel bolā, “Āj Rab aur us kā masah kiyā huā bādshāh gawāh hain ki āp ko mujh par ilzām lagāne kā koi sabab na milā.” Awām ne kahā, “Jī, aisā hī hai.” ⁶ Samuel ne bāt jārī rakhī, “Rab khud Mūsā aur Hārūn ko Isrāil ke rāhnumā banā kar āp ke bāpdādā ko Misr se nikāl lāyā. ⁷ Ab yahān Rab ke takht-e-adālat ke sāmne khaṛe ho jāen to main āp ko un tamām bhalaiyon kī yād dilāūngā jo Rab ne āp aur āp ke bāpdādā se kī hain.

⁸ Āp kā bāp Yāqūb Misr āyā. Jab Misrī us kī aulād ko dabāne lage to unhoṇ ne chīkhte-chillāte Rab se madad māngī. Tab us ne Mūsā aur Hārūn ko bhej diyā tāki wuh pūrī qaum ko Misr se nikāl kar yahān is mulk mein lāen. ⁹ Lekin jald hī wuh Rab apne Khudā ko bhūl gae. Is lie us ne unheṇ dushman ke hawāle kar diyā. Kabhī Hasūr Shahr ke bādshāh kā kamāndar Sīsarā un se larā, kabhī Filistī aur kabhī Moāb kā bādshāh. ¹⁰ Har dafā āp ke bāpdādā ne chīkhte-chillāte Rab se madad māngī aur iqrār kiyā, ‘Ham ne gunāh kiyā hai, kyoñki ham ne Rab ko tark karke Bāl aur Astārāt ke butoṇ kī pūjā kī hai. Lekin ab hameṇ dushmanoṇ se bachā! Phir ham sirf terī hī khidmat karenge.’ ¹¹ Aur har bār Rab ne kisī na kisī ko bhej diyā, kabhī Jidāūn, kabhī Baraq, kabhī Iftāh aur kabhī Samuel ko. Un ādmīyoṇ kī mārifat Allāh ne āp ko irdgird ke tamām dushmanoṇ se bachāyā, aur mulk mein amn-o-amān qāym ho gayā.

¹² Lekin jab Ammonī bādshāh Nāhas āp se

larne āyā to āp mere pās ā kar taqāzā karne lage ki hamārā apnā bādshāh ho jo ham par hukūmat kare, hälānki āp jānte the ki Rab hamārā Khudā hamārā Bādshāh hai. ¹³ Ab wuh bādshāh dekheň jise āp māng rahe the! Rab ne āp ki khāhish pūrī karke use āp par muqarrar kiyā hai. ¹⁴ Chunāñche Rab kā khauf māneň, us kī khidmat kareň aur us kī suneň. Sarkash ho kar us ke ahkām kī khilāfwarzī mat karnā. Agar āp aur āp kā bādshāh Rab se wafādār raheňge to wuh āp ke sāth hogā. ¹⁵ Lekin agar āp us ke tābe na raheň aur sarkash ho kar us ke ahkām kī khilāfwarzī kareň to wuh āp kī mukhālafat karegā, jis tarah us ne āp ke bāpdādā kī bhī mukhālafat kī.

¹⁶ Ab khaṛe ho kar dekheň ki Rab kyā karne wālā hai. Wuh āp kī āñkhoň ke sāmne hī barā mojizā karegā. ¹⁷ Is waqt gandum kī kaṭāī kā mausam hai. Go in dinoň meň bārish nahīn hotī, lekin main duā karūṅga to Rab garajte bādal aur bārish bhejegā. Tab āp jān leñe ki āp ne bādshāh kā taqāzā karte hue Rab ke nazdīk kitnī burī bāt kī hai.”

¹⁸ Samuel ne pukār kar Rab se duā kī, aur us din Rab ne garajte bādal aur bārish bhej dī. Yih dekh kar ijtimā sakht ghabrā kar Samuel aur Rab se ḫarne lagā. ¹⁹ Sab ne Samuel se iltamās kī, “Rab apne Khudā se duā karke hamārī sifārish kareň tāki ham mar na jāeň. Kyoñki bādshāh kā taqāzā karne se ham ne apne gunāhoň meň izāfā kiyā hai.”

²⁰ Samuel ne logoň ko tasallī de kar kahā, “Mat ḫareň. Beshak āp se ġhaltī huī hai, lekin āindā

ਖਾਇਲ rakheਨ ki ਅਪ Rab se dੁਰ na ho jਾਏ balki pੂਰੇ dil se us kਿ khidmat karen. ²¹ Bemānī butoਨ ke pਿਚਹੇ mat paਣਨਾ. Na wuh fਾਯਦੇ kਾ bਾਇਸ haiਨ, na ਅਪ ko bachਾ sakte haiਨ. Un kਿ koਇ haisiyat nahਿਨ hai. ²² Rab apne azਿਮ nਾਮ kਿ khਾਤਿਰ apnੀ qaum ko nahਿਨ chhoਖੇਗਾ, kyoਂki us ne ਅਪ ko apnੀ qaum banਾਨੇ kਾ faisla kiyਾ hai. ²³ Jahਾਨ tak merਾ talluq hai, mainਿ is meਨ Rab kਾ gunਾਹ nahਿਨ karੁਂਗਾ ki ਅਪ kਿ sifਾਰਿਸ਼ karne se bਾਝ ਆਉਂ. Aur ਆਂਦਾ bhਿ mainਿ ਅਪ ko achchhe aur saਹਿਹ rਾਵੇ kਿ tਾਲਿਮ detਾ rahੁਂਗਾ. ²⁴ Lekin dhyਾਨ se Rab kਾ khauf mਾਨੇਂ aur pੂਰੇ dil aur wafਾਦਾਰੀ se us kਿ khidmat karen. Yਾਦ rahe ki us ne ਅਪ ke lie kitne azਿਮ kਾਮ kie haiਨ. ²⁵ Lekin agar ਅਪ ਘਲਾਤ kਾਮ karne par tule raeਨ to ਅਪ apne bਾਦਸ਼ਾਹ samet duniyਾ meਨ se mit ਜਾਏਂਗੇ.”

13

Filistiyon se Jang

¹ Sਾਂਕੁ 30 sਾਂ kਾ thਾ jab taਕhtnashਿn huਾ. Do sਾਲ hukumat karne ke bਾਦ ² us ne apnੀ fauj ke lie 3,000 Isrਾਇਲੀ chun lie. Jang larne ke qabil bਾਂਗ ਆਂਦਿਆਂ ko us ne fਾਰਿਗ਼ kar diya. 2,000 faujiyon kਿ dyੂਤੀ Mikmਾਸ aur Baitel ke pahਾਂਦੀ ilਾਕੇ meਨ lagਾਂਦੀ gaਂ jahਾਨ Sਾਂਕੁ ਖੁਦ thਾ. Bਾਂਗ 1,000 afrਾਦ Yੂਨatan ke pਾਸ Binyamਿn ke shahr Jibiyਾ meਨ the.

³ Ek din Yੂਨatan ne Jibiyਾ kਿ Filistੀ chaukੀ par hamlਾ karke use shikast dਿ. Jald hਿ yih ਖਬਰ dੁਥੇ Filistiyon tak pahuਂਚ gaਂ. Sਾਂਕੁ ne mulk ke kone kone meਨ qਾਸਿਦ bhej die, aur wuh narsingਾ bajਾਤੇ bajਾਤੇ logoਨ ko Yੂਨatan kਿ

fatah sunāte gae. ⁴ Tamām Isrāīl men қhabar phail gaī, “Sāūl ne Jibiyā kī Filistī chaukī ko tabāh kar diyā hai, aur ab Isrāīl Filistiyon kī қhās nafrat kā nishānā ban gayā hai.” Sāūl ne tamām mardon ko Filistiyon se laṛne ke lie Jiljāl men bulāyā.

⁵ Filistī bhī Isrāīliyon se laṛne ke lie jamā hue. Un ke 30,000 rath, 6,000 ghursawār aur sāhil kī ret jaise beshumār piyādā faujī the. Unhoṇ ne Bait-āwan ke mashriq men Mikmās ke qarīb apne қhaime lagāe. ⁶ Isrāīliyon ne dekhā ki ham bare қhatre men ā gae hain, aur dushman ham par bahut dabāw dāl rahā hai to pareshānī ke ālam men kuchh ғhāron aur darāron men aur kuchh pattharon ke darmiyān yā qabron aur hauzon men chhup gae. ⁷ Kuchh itne dar gae ki wuh Dariyā-e-Yardan ko pār karke Jad aur Jiliyād ke ilāqe men chale gae.

Sāūl kī Besabṛī

Sāūl ab tak Jiljāl men thā, lekin jo ādmī us ke sāth rahe the wuh қhauf ke māre thartharā rahe the. ⁸ Samuel ne Sāūl ko hidāyat dī thī ki sāt din merā intazār karen. Lekin sāt din guzar gae. Aur Samuel na āyā. Sāūl ke faujī muntashir hone lage ⁹ to Sāūl ne hukm diyā, “Bhasm hone wālī aur salāmatī kī qurbāniyān le āo.” Phir us ne қhud qurbāniyān pesh kin.

¹⁰ Wuh abhī is kām se fārigħ hī huā thā ki Samuel pahuñch gayā. Sāūl use қhushāmdid kahne ke lie niklā. ¹¹ Lekin Samuel ne pūchhā, “Āp ne kyā kiyā?”

Sāūl ne jawāb diyā, “Log muntashir ho rahe the, aur āp waqt par na āe. Jab maiñ ne dekhā ki Filistī Mikmās ke qarīb jamā ho rahe hain ¹² to maiñ ne sochā, ‘Filistī yahān Jiljāl meñ ā kar mujh par hamlā karne ko hain, hālānki maiñ ne abhī Rab se duā nahīn kī ki wuh ham par mehrbānī kare.’ Is lie maiñ ne jurrat karke ӯhud qurbāniyān pesh kīn.”

¹³ Samuel bolā, “Yih kaisī ahmaqānā harkat thi! Āp ne Rab apne ӯhudā kā hukm na mānā. Rab to āp aur āp kī aulād ko hameshā ke lie Isrāīl par muqarrar karnā chāhtā thā. ¹⁴ Lekin ab āp kī bādshāhat qāym nahīn rahegī. Chūnki āp ne us kī na sunī is lie Rab ne kisī aur ko chun kar apnī qaum kā rāhnumā muqarrar kiyā hai, ek aise ādmī ko jo us kī soch rakhegā.”

¹⁵ Phir Samuel Jiljāl se chalā gayā.

Jang kī Taiyāriyān

Bache hue Isrāīlī Sāūl ke pīchhe dushman se larne gae. Wuh Jiljāl se rawānā ho kar Jibiyā pahuñch gae. Jab Sāūl ne wahān fauj kā jāyzā liyā to bas 600 afrād rah gae the. ¹⁶ Sāūl, Yūnatan aur un kī fauj Binyamīn ke shahr Jibiyā men tīk gae jabki Filistī Mikmās ke pās khaimāzan the. ¹⁷ Kuchh der ke bād Filistiyon ke tīn daste mulk ko lūtne ke lie nikle. Ek Suāl ke ilāqe ke shahr Ufrā kī taraf chal paṛā, ¹⁸ dūsrā Bait-haurūn kī taraf aur tīsrā us pahāṛī silsile kī taraf jahān se Wādī-e-Zaboīm aur registān dekhā jā saktā hai.

¹⁹ Un dinoñ men pūre Mulk-e-Isrāīl men lohār nahīn thā, kyoñki Filistī nahīn chāhte the ki

Isrāīlī talwāreñ yā neze banāeñ. ²⁰ Apne haloñ, kudālon, kulhāriyoñ yā darāntiyoñ ko tez karwāne ke lie tamām Isrāīliyoñ ko Filistiyon ke pās jānā partā thā. ²¹ Filistī haloñ, kudālon, kānþoñ aur kulhāriyoñ ko tez karne ke lie aur āñkuson kī nok thīk karne ke lie chāndī ke sikke kī do tihāi lete the. ²² Natīje meñ us din Sāūl aur Yūnatan ke siwā kisī bhī Isrāīlī ke pās talwār yā nezā nahīn thā.

Yūnatan Filistiyon par Hamlā Kartā Hai

²³ Filistiyon ne Mikmās ke darre par qabzā karke wahān chaukī qāym kī thī.

14

¹ Ek din Yūnatan ne apne jawān silāhbardār se kahā, “Āo, ham parlī taraf jāeñ jahān Filistī fauj kī chaukī hai.” Lekin us ne apne bāp ko ittalā na dī,

² Sāūl us waqt anār ke daraķht ke sāy meñ baiṭhā thā jo Jibiyā ke qarīb ke Mijron meñ thā. 600 mard us ke pās the. ³ Akhiyāh Imām bhī sāth thā jo imām kā bālāposh pahne hue thā. Akhiyāh Yakabod ke bhāī Akhītūb kā beṭā thā. Us kā dādā Fīnhās aur pardādā Elī thā, jo purāne zamāne meñ Sailā meñ Rab kā imām thā. Kisī ko bhī mālūm na thā ki Yūnatan chalā gayā hai.

⁴⁻⁵ Filistī chaukī tak pahuinchne ke lie Yūnatan ne ek tang rāstā ikhtiyār kiyā jo do karāroñ ke darmiyān se guzartā thā. Pahle kā nām Bosīs thā, aur wuh shimāl meñ Mikmās ke muqābil thā. Dūsre kā nām Sanā thā, aur wuh junūb meñ Jibā ke muqābil thā. ⁶ Yūnatan ne apne jawān silāhbardār se kahā, “Āo, ham parlī taraf jāeñ

jahān in nāmakhtūnoñ kī chaukī hai. Shāyad Rab hamārī madad kare, kyoñki us ke nazdīk koñ farq nahīn ki ham zyādā hoñ yā kam.” ⁷ Us kā silāhbardār bolā, “Jo kuchh āp ṭhīk samajhte hain, wuhī karen. Zarūr jāeñ. Jo kuchh bhī āp kahenge, maiñ hāzir hūn.” ⁸ Yūnatan bolā, “Thīk hai. Phir ham yoñ dushmanoñ kī taraf baṛhte jāeñge, ki ham unheñ sāf nazar āeñ. ⁹ Agar wuh hameñ dekh kar pukāreñ, ‘Ruk jāo, warnā ham tumheñ mār deñge!’ To ham apne mansūbe se bāz ā kar un ke pās nahīn jāeñge. ¹⁰ Lekin agar wuh pukāreñ, ‘Āo, hamāre pās ā jāo!’ To ham zarūr un ke pās chaṛh jāeñge. Kyoñki yih is kā nishān hogā ki Rab unheñ hamāre qabze meñ kar degā.”

¹¹ Chunāñche wuh chalte chalte Filistī chaukī ko nazar āe. Filistī shor machāne lage, “Dekho, Isrāīlī apne chhupne ke biloñ se nikal rahe hain!” ¹² Chaukī ke faujiyon ne donoñ ko chaileñj kiyā, “Āo, hamāre pās āo to ham tumheñ sabaq sikhāeñge.” Yih sun kar Yūnatan ne apne silāhbardār ko āwāz dī, “Āo, mere pīchhe chalo! Rab ne unheñ Isrāīl ke hawāle kar diyā hai.” ¹³ Donoñ apne hāthoñ aur païron ke bal chaṛhte chaṛhte chaukī tak jā pahuñche. Jab Yūnatan āge āge chal kar Filistiyon ke pās pahuñch gayā to wuh us ke sāmne girte gae. Sāth sāth silāhbardār pīchhe se logoñ ko mārtā gayā.

¹⁴ Is pahle hamle ke daurān unhoñ ne taqrīban 20 ādmīyoñ ko mār dālā. Un kī lāsheñ ādh ekaṛ zamīn par bikhrī paṛī thīn. ¹⁵ Achānak pūrī fauj meñ dahshat phail gaī, na sirf lashkargāh balki

khule maidān meñ bhī. Chaukī ke mard aur lūṭne wāle daste bhī thartharāne lage. Sāth sāth zalzalā āyā. Rab ne tamām Filistī faujiyon ke dilon meñ dahshat paidā kī.

Rab Filistiyon par Fatah Detā Hai

¹⁶ Sāūl ke jo pahredār Jibiyā se dushman kī harkatoṇ par ġhaur kar rahe the unhoṇ ne achānak dekhā ki Filistī fauj meñ halchal mach gai hai, afrā-tafri kabhī is taraf, kabhī us taraf bāṛh rahī hai. ¹⁷ Sāūl ne fauran hukm diyā, “Faujiyon ko gin kar mālūm karo ki kaun chalā gayā hai.” Mālūm huā ki Yūnatan aur us kā silāhbardār maujūd nahīn haiṇ. ¹⁸ Sāūl ne Akhiyāh ko hukm diyā, “Ahd kā sandūq le āeṇ.” Kyoṇki wuh un dinoṇ meñ Isrāīlī kaimp meñ thā. ¹⁹ Lekin Sāūl abhī Akhiyāh se bāt kar rahā thā ki Filistī lashkargāh meñ hangāmā aur shor bahut zyādā bāṛh gayā. Sāūl ne imām se kahā, “Koī bāt nahīn, rahne deṇ.” ²⁰ Wuh apne 600 afrād ko le kar fauran dushman par tūṭ parā. Jab un tak pahuṇch gae to mālūm huā ki Filistī ek dūsre ko qatl kar rahe haiṇ, aur har taraf hangāmā hī hangāmā hai.

²¹ Filistiyon ne kāfī Isrāīliyon ko apnī fauj meñ shāmil kar liyā thā. Ab yih log Filistiyon ko chhoṛ kar Sāūl aur Yūnatan ke pichhe ho lie. ²² In ke alāwā jo Isrāīlī Ifrāīm ke pahāṛī ilāqe meñ idhar-udhar chhup gae the, jab unheṇ khabar milī ki Filistī bhāg rahe haiṇ to wuh bhī un kā tāqqub karne lage. ²³ Larṭe larṭe maidān-e-jang Bait-āwan tak phail gayā. Is tarah Rab ne us din Isrāīliyon ko bachā liyā.

Sāūl kī Besoche-samjhe Lānat

²⁴ Us din Isrāīlī sakht laṛāī ke bāis baṛī musībat meñ the. Is lie Sāūl ne qasam khā kar kahā, “Us par lānat jo shām se pahle khānā khāe. Pahle maiñ apne dushman se intaqām lūṅgā, phir hī sab khā-pī sakte haiñ.” Is wajah se kisi ne roṭī ko hāth tak na lagāyā. ²⁵ Pūrī fauj jangal meñ dākhlil huī to wahān zamīn par shahd ke chhatte the. ²⁶ Tamām log jab un ke pās se guzare to dekhā ki un se shahd ṭapak rahā hai. Lekin kisi ne thoṛā bhī le kar khāne kī jurrat na kī, kyoñki sab Sāūl kī lānat se darte the.

²⁷ Yūnatan ko lānat kā ilm na thā, is lie us ne apnī lāthī kā sirā kisi chhatte meñ dāl kar use chāt liyā. Us kī āñkheñ fauran chamak uṭhīn, aur wuh tāzādam ho gayā. ²⁸ Kisi ne dekh kar Yūnatan ko batāyā, “Āp ke bāp ne fauj se qasam khilā kar elān kiyā hai ki us par lānat jo is din kuchh khāe. Isī wajah se ham sab itne niḍhāl ho gae haiñ.” ²⁹ Yūnatan ne jawāb diyā, “Mere bāp ne mulk ko musībat meñ dāl diyā hai! Dekho, is thore-se shahd ko chakhne se merī āñkheñ kitnī chamak uṭhīn aur maiñ kitnā tāzādam ho gayā. ³⁰ Behtar hotā ki hamāre log dushman se lūṭe hue māl meñ se kuchh na kuchh khā lete. Lekin is hālat meñ ham Filistiyon ko kis tarah zyādā nuqsān pahuñchā sakte haiñ?”

³¹ Us din Isrāīlī Filistiyon ko Mikmās se mār mār kar Aiyālon tak pahuñch gae. Lekin shām ke waqt wuh nihāyat niḍhāl ho gae the. ³² Phir wuh lūṭe hue rewarōn par ṭūṭ pare. Unhōn ne jaldī jaldī bher-bakriyon, gāy-bailon aur bachhron ko zabah kiyā. Bhūk kī shiddat kī

wajah se unhoṇ ne ḡhūn ko sahīh taur se nikalne na diyā balki jānwaroṇ ko zamīn par chhoṛ kar gosht ko ḡhūn samet khāne lage.

³³ Kisī ne Sāūl ko ittalā dī, “Dekheṇ, log Rab kā gunāh kar rahe haiṇ, kyoṇki wuh gosht khā rahe haiṇ jis meṇ ab tak ḡhūn hai.” Yih sun kar Sāūl pukār uṭhā, “Āp Rab se wafādār nahīn rahe!” Phir us ne sāth wāle ādmiyoṇ ko hukm diyā, “Koī barā patthar lūṛhkā kar idhar le āeṇ!

³⁴ Phir tamām ādmiyoṇ ke pās jā kar unheṇ batā denā, ‘Apne jānwaroṇ ko mere pās le āeṇ tāki unheṇ patthar par zabah karke khāeṇ. Warnā āp ḡhūnlūḍā gosht khā kar Rab kā gunāh kareṇge.’”

Sab mān gae. Us shām wuh Sāūl ke pās āe aur apne jānwaroṇ ko patthar par zabah kiyā. ³⁵ Wahāṇ Sāūl ne pahlī dafā Rab kī tāzīm meṇ qurbāngāh banāī.

³⁶ Phir us ne elān kiyā, “Āeṇ, ham abhī isī rāt Filistiyōṇ kā tāqquq karke un meṇ lūt-mār kā silsilā jārī rakheṇ tāki ek bhī na bache.” Faujiyoṇ ne jawāb diyā, “Thīk hai, wuh kuchh kareṇ jo āp ko munāsib lage.” Lekin imām bolā, “Pahle ham Allāh se hidāyat leṇ.” ³⁷ Chunāñche Sāūl ne Allāh se pūchhā, “Kyā ham Filistiyōṇ kā tāqquq jārī rakheṇ? Kyā tū unheṇ Isrāīl ke hawāle kar degā?” Lekin is martabā Allāh ne jawāb na diyā.

³⁸ Yih dekh kar Sāūl ne fauj ke tamām rāhnumāoṇ ko bulā kar kahā, “Kisī ne gunāh kiyā hai. Mālūm karne kī koshish kareṇ ki kaun quṣūrwār hai. ³⁹ Rab kī hayāt kī qasam jo Isrāīl

kā Najātdahindā hai, qusūrwār ko fauran sazā-e-maut dī jāegī, kħāh wuh merā beṭā Yūnatan kyoñ na ho.” Lekin sab kħāmosh rahe.

⁴⁰ Tab Sāūl ne dubārā elān kiyā, “Pūrī fauj ek taraf kharī ho jāe aur Yūnatan aur maiñ dūsrī taraf.” Logon ne jawāb diyā, “Jo āp ko munāsib lage wuh kareñ.” ⁴¹ Phir Sāūl ne Rab Isrāīl ke Khudā se duā kī, “Ai Rab, hameñ dikhā ki kaun qusūrwār hai!”

Jab qurā ḥālā gayā to Yūnatan aur Sāūl ke guroh ko qusūrwār qarār diyā gayā aur bāqī fauj ko bequsūr. ⁴² Phir Sāūl ne hukm diyā, “Ab qurā ḥāl kar patā kareñ ki maiñ qusūrwār hūn yā Yūnatan.” Jab qurā ḥālā gayā to Yūnatan qusūrwār ṭahrā. ⁴³ Sāūl ne pūchhā, “Batāeñ, āp ne kyā kiyā?” Yūnatan ne jawāb diyā, “Main ne sirf thorā-sā shahd chakh liyā jo merī lāṭhī ke sire par lagā thā. Lekin maiñ marne ke lie taiyār hūn.” ⁴⁴ Sāūl ne kahā, “Yūnatan, Allāh mujhe sakht sazā de agar maiñ āp ko is ke lie sazā-e-maut na dūn.” ⁴⁵ Lekin faujiyon ne etarāz kiyā, “Yih kaisī bāt hai? Yūnatan hī ne apne zabardast hamle se Isrāīl ko āj bachā liyā hai. Use kis tarah sazā-e-maut dī jā saktī hai? Kabhī nahīn! Allāh kī hayāt kī qasam, us kā ek bāl bhī bīkā nahīn hogā, kyoñki āj us ne Allāh kī madad se fatah pāī hai.” Yoñ faujiyon ne Yūnatan ko maut se bachā liyā.

⁴⁶ Tab Sāūl ne Filistiyon kā tāqqub karnā chhoṛ diyā aur apne ghar chalā gayā. Filistī bhī apne mulk meñ wāpas chale gae.

Sāūl kī Jangeñ

⁴⁷ Jab Sāūl takhtnashīn huā to wuh mulk ke irdgird ke tamām dushmanoṇ se laṛā. In meṇ Moāb, Ammon, Adom, Zobāh ke bādshāh aur Filistī shāmil the. Aur jahān bhī jang chhīrī wahān us ne fatah pāī. ⁴⁸ Wuh nihāyat bahādur thā. Us ne Amālīqiyōṇ ko bhī shikast dī aur yoṇ Isrāīl ko un tamām dushmanoṇ se bachā liyā jo bār bār mulk kī lūṭ-mār karte the.

Sāūl kā Khāndān

⁴⁹ Sāūl ke tīn betē the, Yūnatan, Iswī aur Malkīshua. Us kī barī betī Mīrab aur chhoṭī betī Mīkal thī. ⁵⁰ Bīwī kā nām Akhīnūsam bint Akhīmāz thā. Sāūl kī fauj kā kamāndar Abinair thā, jo Sāūl ke chachā Nair kā betā thā. ⁵¹ Sāūl kā bāp Qīs aur Abinair kā bāp Nair sage bhāī the jin kā bāp Abiyel thā.

⁵² Sāūl ke jīte-jī Filistiyōṇ se sakht jang jārī rahī. Is lie jab bhī koī bahādur aur laṛne ke qābil ādmī nazar āyā to Sāūl ne use apnī fauj meṇ bhartī kar liyā.

15

Tamām Amālīqiyōṇ ko Halāk Karne kā Hukm

¹ Ek din Samuel ne Sāūl ke pās ā kar us se bāt kī, “Rab hī ne mujhe āp ko masah karke Isrāīl par muqarrar karne kā hukm diyā thā. Ab Rab kā paighām sun leñ! ² Rabbul-afwāj farmātā hai, ‘Maiñ Amālīqiyōṇ kā merī qaum ke sāth sulūk nahīn bhūl saktā. Us waqt jab Isrāīlī Misr se nikal kar Kanān kī taraf safr kar rahe the to Amālīqiyōṇ ne rāstā band kar diyā thā. ³ Ab waqt ā gayā hai ki tū un par hamlā kare. Sab

kuchh tabāh karke mere hawāle kar de. Kuchh bhī bachne na de, balki tamām mardoñ, auratoñ, bachchoñ shirkhāroñ samet, gāy-bailoñ, bher-bakriyoñ, ūnþoñ aur gadhoñ ko maut ke ghāt utār de.’”

⁴ Sāūl ne apne faujiyoñ ko bulā kar Talāym meñ un kā jāyzā liyā. Kul 2,00,000 piyāde faujī the, nīz Yahūdāh ke 10,000 afrād. ⁵ Amālīqiyōñ ke shahr ke pās pahuñch kar Sāūl wādī meñ tāk meñ baiñh gayā. ⁶ Lekin pahle us ne Qīniyoñ ko khabar bhejī, “Amālīqiyōñ se alag ho kar un ke pās se chale jāeñ, warnā āp un ke sāth halāk ho jāeñge. Kyoñki jab Isrāīlī Misr se nikal kar registān meñ safr kar rahe the to āp ne un par mehrbānī kī thī.” Yih khabar milte hī Qīnī Amālīqiyōñ se alag ho kar chale gae. ⁷ Tab Sāūl ne Amālīqiyōñ par hamlā karke unheñ Hawīlā se le kar Misr kī mashriqī sarhad Shūr tak shikast dī. ⁸ Pūrī qaum ko talwār se mārā gayā, sirf un kā bādshāh Ajāj zindā pakarā gayā. ⁹ Sāūl aur us ke faujiyoñ ne use zindā chhoṛ diyā. Isī tarah sab se achchhī bher-bakriyoñ, gāy-bailoñ, moṭe-tāze bachhroñ aur chīdā bher ke bachchoñ ko bhī chhoṛ diyā gayā. Jo bhī achchhā thā bach gayā, kyoñki Isrāīliyoñ kā dil nahīn kartā thā ki tandurust aur moṭe-tāze jānwaroñ ko halāk kareñ. Unhoñ ne sirf un tamām kamzor jānwaroñ ko khatm kiyā jin kī qadar-o-qīmat na thī.

Farmāñbardārī Qurbāniyoñ se Aham Hai

¹⁰ Phir Rab Samuel se hamkalām huā,
¹¹ “Mujhe dukh hai ki maiñ ne Sāūl ko bādshāh banā liyā hai, kyoñki us ne mujh se dūr ho kar

merā hukm nahīn mānā.” Samuel ko itnā ghussā āyā ki wuh pūrī rāt buland āwāz se Rab se fariyād kartā rahā. ¹² Agle din wuh uth kar Sāūl se milne gayā. Kisī ne use batāyā, “Sāūl Karmil chalā gayā. Wahān apne lie yādgār khaṛā karke wuh āge Jiljāl chalā gayā hai.” ¹³ Jab Samuel Jiljāl pahuinchā to Sāūl ne kahā, “Mubārak ho! Maiñ ne Rab kā hukm pūrā kar diyā hai.” ¹⁴ Samuel ne pūchhā, “Jānwaroṇ kā yih shor kahān se ā rahā hai? Bher-bakriyān mamyā rahī aur gāybail dakrā rahe haiñ.” ¹⁵ Sāūl ne jawāb diyā, “Yih Amālīqiyon ke hān se lāe gae haiñ. Faujiyon ne sab se achchhe gāy-bailoṇ aur bher-bakriyoṇ ko zindā chhoṛ diyā tāki unheñ Rab āp ke Khudā ke huzūr qurbān kareñ. Lekin ham ne bāqī sab ko Rab ke hawāle karke mār diyā.”

¹⁶ Samuel bolā, “Khāmosh! Pahle wuh bāt sun leñ jo Rab ne mujhe pichhlī rāt farmāī.” Sāūl ne jawāb diyā, “Batāeñ.” ¹⁷ Samuel ne kahā, “Jab āp tamām qaum ke rāhnumā ban gae to ehsās-e-kamtarī kā shikār the. To bhī Rab ne āp ko masah karke Isrāīl kā bādshāh banā diyā. ¹⁸ Aur us ne āp ko bhej kar hukm diyā, ‘Jā aur Amālīqiyon ko pūre taur par halāk karke mere hawāle kar. Us waqt tak in sharīr logoṇ se larṭā rah jab tak wuh sab ke sab miṭ na jāeñ.’ ¹⁹ Ab mujhe batāeñ ki āp ne Rab kī kyoṇ na sunī? Āp lūte hue māl par kyoṇ tūt pare? Yih to Rab ke nazdīk gunāh hai.”

²⁰ Sāūl ne etarāz kiyā, “Lekin maiñ ne zarūr Rab kī sunī. Jis maqsad ke lie Rab ne mujhe bhejā wuh maiñ ne pūrā kar diyā hai, kyoñki maiñ Amālīq ke bādshāh Ajāj ko giriftār karke

yahān le āyā aur bāqī sab ko maut ke ghāṭ utār kar Rab ke hawāle kar diyā. ²¹ Mere faujī lūṭe hue māl meñ se sirf sab se achchhī bherbakriyān aur gāy-bail chun kar le āe, kyoñki wuh unheñ yahān Jiljāl meñ Rab āp ke Khudā ke huzūr qurbān karnā chāhte the.”

²² Lekin Samuel ne jawāb diyā, “Rab ko kyā bāt zyādā pasand hai, āp kī bhasm hone wālī aur zabah kī qurbāniyān yā yih ki āp us kī sunte haiñ? Sunanā qurbānī se kahīn behtar aur dhyān denā mendhe kī charbī se kahīn umdā hai. ²³ Sarkashī ghaibdānī ke gunāh ke barābar hai aur ġhurūr butparastī ke gunāh se kam nahīn hotā. Āp ne Rab kā hukm radd kiyā hai, is lie us ne āp ko radd karke bādshāh kā ohdā āp se chhīn liyā hai.”

²⁴ Tab Sāūl ne iqrār kiyā, “Mujh se gunāh huā hai. Maiñ ne āp kī hidāyat aur Rab ke hukm kī khilāfwarzī kī hai. Maiñ ne logoñ se dar kar un kī bāt mān lī. ²⁵ Lekin ab mehrbānī karke mujhe muāf karen aur mere sāth wāpas āen tāki maiñ āp kī maujūdagī meñ Rab kī parastish kar sakūn.” ²⁶ Lekin Samuel ne jawāb diyā, “Maiñ āp ke sāth wāpas nahīn chalūngā. Āp ne Rab kā kalām radd kiyā hai, is lie Rab ne āp ko radd karke bādshāh kā ohdā āp se chhīn liyā hai.”

²⁷ Samuel muṛ kar wahān se chalne lagā, lekin Sāūl ne us ke choghe kā dāman itne zor se pakar liyā ki wuh phaṭ kar us ke hāth meñ rah gayā. ²⁸ Samuel bolā, “Jis tarah kaprā phaṭ kar āp ke hāth meñ rah gayā bilkul usī tarah Rab ne āj hī Isrāīl par āp kā ikhtiyār āp se chhīn kar kisi aur ko de diyā hai, aise shakhs ko jo āp se kahīn

behtar hai. ²⁹ Jo Isrāīl kī shān-o-shaukat hai wuh na jhūṭ boltā, na kabhī apnī soch ko badaltā hai, kyoñki wuh insān nahīn ki ek bāt kah kar bād meñ use badle.”

³⁰ Sāūl ne dubārā minnat kī, “Beshak maiñ ne gunāh kiyā hai. Lekin barāh-e-karm kam az kam merī qaum ke buzurgoṇ aur Isrāīl ke sāmne to merī izzat karen. Mere sāth wāpas āeñ tāki maiñ āp kī maujūdagī meñ Rab āp ke Khudā kī parastish kar sakūn.”

³¹ Tab Samuel mān gayā aur Sāūl ke sāth dūsroñ ke pās wāpas āyā. Sāūl ne Rab kī parastish kī, ³² phir Samuel ne elān kiyā, “Amālīq ke bādshāh Ajāj ko mere pās le āo!” Ajāj itmīnān se Samuel ke pās āyā, kyoñki us ne sochā, “Beshak maut kā khatrā ṭal gayā hai.” ³³ Lekin Samuel bolā, “Terī talwār se beshumār māeñ apne bachchoṇ se mahrūm ho gaī hain. Ab terī mān bhī beaulād ho jāegī.” Yih kah kar Samuel ne wahīn Jiljāl meñ Rab ke huzūr Ajāj ko talwār se ṭukṛē ṭukṛē kar diyā.

³⁴ Phir wuh Rāmā wāpas chalā gayā, aur Sāūl apne ghar gayā jo Jibiyā meñ thā. ³⁵ Is ke bād Samuel jīte-jī Sāūl se kabhī na milā, kyoñki wuh Sāūl kā mātam kartā rahā. Lekin Rab ko dukh thā ki maiñ ne Sāūl ko Isrāīl par kyoñ muqarrar kiyā.

16

Nae Bādshāh Dāūd ko Muqarrar Kiyā Jātā Hai

¹ Ek din Rab Samuel se hamkalām huā, “Tū kab tak Sāūl kā mātam karegā? Maiñ ne to use radd karke bādshāh kā ohdā us se le liyā hai. Ab

mendhe kā sīng zaitūn ke tel se bhar kar Bait-laham chalā jā. Wahān ek ādmī se mil jis kā nām Yassī hai. Kyoñki maiñ ne us ke beþoñ meñ se ek ko chun liyā hai ki wuh nayā bādshāh ban jāe.”

² Lekin Samuel ne etarāz kiyā, “Maiñ kis tarah jā saktā hūn? Sāul yih sun kar mujhe mār dālegā.” Rab ne jawāb diyā, “Ek jawān gāy apne sāth le kar logoñ ko batā de ki maiñ ise Rab ke huzūr qurbān karne ke lie āyā hūn. ³ Yassī ko dāwat de ki wuh qurbānī kī ziyāfat meñ sharīk ho jāe. Āge maiñ tujhe batāūngā ki kyā karnā hai. Maiñ tujhe dikhāūngā ki kis beþe ko mere lie masah karke chun lenā hai.”

⁴ Samuel mān gayā. Jab wuh Bait-laham pahuñch gayā to log chaunk uþhe. Larazte larazte shahr ke buzurg us se milne āe aur pūchhā, “Khairiyat to hai ki āp hamāre pās ā gae haiñ?” ⁵ Samuel ne unheñ tasallī de kar kahā, “Khairiyat hai. Maiñ Rab ke huzūr qurbānī pesh karne ke lie āyā hūn. Apne āp ko Rab ke lie maþhsūs-o-muqaddas kareñ aur phir mere sāth qurbānī kī ziyāfat meñ sharīk ho jāeñ.” Samuel ne Yassī aur us ke beþoñ ko bhī dāwat dī aur unheñ apne āp ko maþhsūs-o-muqaddas karne ko kahā.

⁶ Jab Yassī apne beþoñ samet qurbānī kī ziyāfat ke lie āyā to Samuel kī nazar Iliyāb par parī. Us ne sochā, “Beshak yih wuh hai jise Rab masah karke bādshāh banānā chāhtā hai.” ⁷ Lekin Rab ne farmāyā, “Is kī shakl-o-sūrat aur lambe qad se muta'assir na ho, kyoñki yih mujhe nāmanzūr hai. Maiñ insān kī nazar se nahīn dekhtā. Kyoñki insān zāhirī sūrat par ghaur karke faisla

kartā hai jabki Rab ko har ek kā dil sāf sāf nazar ātā hai.”

⁸ Phir Yassī ne apne dūsre beṭe Abīnadāb ko bulā kar Samuel ke sāmne se guzarne diyā. Samuel bolā, “Nahīn, Rab ne ise bhī nahīn chunā.” ⁹ Is ke bād Yassī ne tīsre beṭe Sammā ko pesh kiyā. Lekin yih bhī nahīn chunā gayā thā. ¹⁰ Yoñ Yassī ne apne sāt beṭoñ ko ek ek karke Samuel ke sāmne se guzarne diyā. In meñ se koī Rab kā chunā huā bādshāh na niklā. ¹¹ Ākhirkār Samuel ne pūchhā, “In ke alāwā koī aur beṭā to nahīn hai?” Yassī ne jawāb diyā, “Sab se chhoṭā beṭā abhī bāqī rah gayā hai, lekin wuh bāhar khetoñ meñ bher-bakriyoñ kī nigarānī kar rahā hai.” Samuel ne kahā, “Use fauran bulā leñ. Us ke āne tak ham khāne ke lie nahīn baiṭheinge.”

¹² Chunāñche Yassī chhoṭe ko bulā kar andar le āyā. Yih beṭā gorā thā. Us kī ānkheñ khūbsūrat aur shakl-o-sūrat qābil-e-tārif thī. Rab ne Samuel ko batāyā, “Yihī hai. Uṭh kar ise masah kar.” ¹³ Samuel ne tel se bharā huā mendhe kā sīng le kar use Dāūd ke sar par undel diyā. Sab bhāī maujūd the. Usī waqt Rab kā Rūh Dāūd par nāzil huā aur us kī sārī umr us par ṭaharrā rahā. Phir Samuel Rāmā wāpas chalā gayā.

Dāūd Sāūl ko Badrūh se Ārām Dilātā Hai

¹⁴ Lekin Rab ke Rūh ne Sāūl ko chhor diyā thā. Is ke bajāe Rab kī taraf se ek burī rūh use dahshatzadā karne lagī. ¹⁵ Ek din Sāūl ke mulāzimoñ ne us se kahā, “Allāh kī taraf se ek burī rūh āp ke dil meñ dahshat paidā kar rahī hai. ¹⁶ Hamārā āqā apne khādimoñ ko hukm de

ki wuh kisī ko ḏhūnd lāeñ jo sarod bajā sake. Jab bhī Allāh kī taraf se yih burī rūh āp par āe to wuh apnā sāz bajā kar āp ko sukūn dilāegā.”

¹⁷ Sāūl ne jawāb diyā, “Thīk hai, aisā hī karo. Kisī ko bulā lāo jo sāz bajāne men māhir ho.”

¹⁸ Ek mulāzim bolā, “Maiñ ne ek ādmī ko dekhā hai jo khūb bajā saktā hai. Wuh Bait-laham ke rahne wāle Yassī kā betā hai. Wuh na sirf mahārat se sarod bajā saktā hai balki baṛā jangjū bhī hai. Yih bhī us kī ek khūbī hai ki wuh har mauqe par samajhdārī se bāt kar saktā hai. Aur wuh khūbsūrat bhī hai. Rab us ke sāth hai.”

¹⁹ Sāūl ne fauran apne qāsidoñ ko Yassī ke pās bhej kar use ittalā dī, “Apne bete Dāūd ko jo bher-bakriyoñ ko sañbhāltā hai mere pās bhej denā.” ²⁰ Yih sun kar Yassī ne roṭī, mai kā mashkīzā aur ek jawān bakrī gadhe par lād kar Dāūd ke hawāle kar dī aur use Sāūl ke darbār men bhej diyā.

²¹ Is tarah Dāūd Sāūl kī khidmat men hāzir ho gayā. Wuh bādshāh ko bahut pasand āyā balki Sāūl ko itnā pyārā lagā ki use apnā silāhbardār banā liyā. ²² Sāūl ne Yassī ko ittalā bhejī, “Dāūd mujhe bahut pasand āyā hai, is lie use mustaqil taur par merī khidmat karne kī ijazat deñ.” ²³ Aur jab bhī burī rūh Sāūl par ātī to Dāūd apnā sarod bajāne lagtā. Tab Sāūl ko sukūn miltā aur burī rūh us par se dūr ho jātī.

¹ Ek din Filistiyon ne apnī fauj ko Yahūdāh ke shahr Sokā ke qarīb jamā kiyā. Wuh Ifasdammīm meñ khaimāzan hue jo Sokā aur Azīqā ke darmiyān hai. ² Jawāb meñ Sāūl ne apnī fauj ko bulā kar Wādī-e-Ailā meñ jamā kiyā. Wahān Isrāīl ke mard jang ke lie tartīb se khaṛe hue. ³ Yoñ Filistī ek pahāṛī par khaṛe the aur Isrāīlī dūsrī pahāṛī par. Un ke bīch meñ wādī thī.

⁴ Phir Filistī safon se Jāt Shahr kā pahalwān nikal kar Isrāīliyon ke sāmne khaṛā huā. Us kā nām Jālūt thā aur wuh 9 fuṭ se zyādā lambā thā. ⁵ Us ne hifāzat ke lie pītal kī kaī chīzeñ pahan rakhi thīñ: sar par ḥod, dhaṛ par zirābaktar jo 57 kilogrām waznī thā ⁶ aur pindliyon par baktar. Kandhoñ par pītal kī shamshīr laṭkī huī thī. ⁷ Jo nezā wuh pakar kar chal rahā thā us kā dastā khaḍdī ke shahtīr jaisā moṭā aur lambā thā, aur us ke lohe kī nok kā wazn 7 kilogrām se zyādā thā. Jālūt ke āge āge ek ādmī us kī ḫhāl uṭhāe chal rahā thā.

⁸ Jālūt Isrāīlī safon ke sāmne ruk kar garjā, “Tum sab kyoñ laṛne ke lie saf-ārā ho gae ho? Kyā maiñ Filistī nahīn hūn jabki tum sirf Sāūl ke naukar-chākar ho? Chalo, ek ādmī ko chun kar use yahān nīche mere pās bhej do. ⁹ Agar wuh mujh se laṛ sake aur mujhe mār de to ham tumhāre ḡhulām ban jāeñge. Lekin agar maiñ us par ḡhālib ā kar use mār ḫalūn to tum hamāre ḡhulām ban jāoge. ¹⁰ Āj maiñ Isrāīlī safon kī badnāmī karke unheñ chaileñj kartā hūn ki mujhe ek ādmī do jo mere sāth laṛe.” ¹¹ Jālūt kī yih bāteñ sun kar Sāūl aur tamām

Isrāīlī ghabrā gae. Aur un par dahshat tārī ho gaī.

Dāūd Bhāiyoṇ se Milne ke lie Fauj ke pās Jātā Hai

¹² Us waqt Dāūd kā bāp Yassī kāfī būṛhā ho chukā thā. Us ke kul 8 beṭe the, aur wuh Ifrātā ke ilāqe ke Bait-laham meñ rahtā thā. ¹³ Lekin us ke tīn sab se bare beṭe Filistiyōṇ se larne ke lie Sāūl kī fauj meñ bhartī ho gae the. Sab se bare kā nām Iliyāb, dūsre kā Abīnadāb aur tīsre kā Sammā thā. ¹⁴⁻¹⁵ Dāūd to sab se chhotā bhāī thā. Wuh dūsron kī tarah pūrā waqt Sāūl ke pās na guzār sakā, kyonki use bāp kī bher-bakriyoṇ ko saṁbhālne kī zimmedārī dī gaī thī. Is lie wuh ātā jātā rahā. Chunāñche wuh maujūd nahīn thā ¹⁶ jab Jālūt 40 din subh-o-shām Isrāīliyoṇ kī safon ke sāmne khaṛe ho kar unheñ chaileñj kartā rahā.

¹⁷ Ek din Yassī ne Dāūd se kahā, “Beṭā, apne bhāiyoṇ ke pās kaimp meñ jā kar un kā patā karo. Bhune hue anāj ke yih 16 kilogrām aur yih das rotiyān apne sāth le kar jaldī jaldī udhar pahuñch jāo. ¹⁸ Panīr kī yih das tikkiyān un ke kaptān ko de denā. Bhāiyoṇ kā hāl mālūm karke un kī koī chīz wāpas le āo tāki mujhe tasallī ho jāe ki wuh tħik hain. ¹⁹ Wuh Wādī-e-Ailā meñ Sāūl aur Isrāīlī fauj ke sāth Filistiyōṇ se lar rahe hain.” ²⁰ Agle din subah-sawere Dāūd ne rewar̄ ko kisī aur ke sapurd karke sāmān uṭhāyā aur Yassī kī hidāyat ke mutābiq chalā gayā. Jab wuh kaimp ke pās pahuñch gayā to Isrāīlī faujī nāre lagā lagā kar maidān-e-jang ke lie nikal rahe the. ²¹ Wuh larne ke lie tartīb se khaṛe ho

gae. Aur dūsrī taraf Filistī safeñ bhī tayār huīn.
 22 Yih dekh kar Dāūd ne apnī chīzeñ us ādmī ke pās chhoṛ dīn jo lashkar ke sāmān kī nigarānī kar rahā thā, phir bhāg kar maidān-e-jang meñ bhāiyon se milne chalā gayā.

Wuh abhī un kā hāl pūchh hī rahā thā ²³ ki Jātī Jālūt māmūl ke mutābiq Filistiyoñ kī safoñ se nikal kar Isrāiliyoñ ke sāmne wuhī tanz kī bāteñ bakne lagā. Dāūd ne bhī us kī bāteñ sunīn. ²⁴ Jālūt ko dekhte hī Isrāiliyoñ ke rōngte khaṛe ho gae. Aur wuh bhāg kar ²⁵ āpas meñ kahne lage, “Kyā āp ne is ādmī ko hamārī taraf baṛhte hue dekhā? Suneñ ki wuh kis tarah hamārī badnāmī karke hamen chaileñj kar rahā hai. Bādshāh ne elān kiyā hai ki jo shakhs ise mār de use baṛā ajr milegā. Shahzādī se us kī shādī hogī, aur aindā us ke bāp ke khāndān ko ṭaiks nahīn denā paregā.”

²⁶ Dāūd ne sāth wāle faujiyoñ se pūchhā, “Kyā kah rahe haiñ? Us ādmī ko kyā inām milegā jo is Filistī ko mār kar hamārī qaum kī ruswāī dūr karegā? Yih nāmaṅktūn Filistī kaun hai ki zindā Khudā kī fauj kī badnāmī karke use chaileñj kare!” ²⁷ Logoñ ne dubārā Dāūd ko batāyā ki bādshāh us ādmī ko kyā degā jo Jālūt ko mār dālegā.

²⁸ Jab Dāūd ke baṛe bhāī Iliyāb ne Dāūd kī bāteñ sunīn to use ghussā āyā aur wuh use jhiṛakne lagā, “Tū kyon āyā hai? Bayābān meñ apnī chand ek bheṛ-bakriyoñ ko kis ke pās chhoṛ āyā hai? Maiñ terī shokhī aur dil kī sharārat khūb jāntā hūn. Tū sirf jang kā tamāshā dekhne āyā hai!” ²⁹ Dāūd ne pūchhā, “Ab mujh se kyā

ghaltī huī? Maiñ ne to sirf sawāl pūchhā.”
30 Wuh us se muṛ kar kisī aur ke pās gayā aur wuhī bāt pūchhne lagā. Wuhī jawāb milā.

Hathiyār kā Chunāo

31 Dāūd kī yih bāteñ sun kar kisī ne Sāūl ko ittalā dī. Sāūl ne use fauran bulāyā. **32** Dāūd ne bādshāh se kahā, “Kisī ko is Filistī kī wajah se himmat nahīn hārnā chāhie. Maiñ us se larūngā.” **33** Sāūl bolā, “Āp? Āp jaisā laṛkā kis tarah us kā muqābalā kar saktā hai? Āp to abhī bachche se ho jabki wuh tajrabākār jangjū hai jo jawānī se hathiyār istemāl kartā āyā hai.”

34 Lekin Dāūd ne isrār kiyā, “Maiñ apne bāp kī bher-bakriyoñ kī nigarānī kartā hūn. Jab kabhī koī sherbabar yā rīchh rewar kā jānwar chhīn kar bhāg jātā **35** to maiñ us ke pīchhe jātā aur use mār mār kar bheṛ ko us ke muñh se chhurā letā thā. Agar sher yā rīchh jawāb meñ mujh par hamlā kartā to maiñ us ke sar ke bāloñ ko pakaṛ kar use mār detā thā. **36** Is tarah āp ke khādim ne kaī sheroñ aur rīchhoñ ko mār dālā hai. Yih nāmaṅktūn bhī un kī tarah halāk ho jāegā, kyoñki us ne zindā Khudā kī fauj kī badnāmī karke use chaileñj kiyā hai. **37** Jis Rab ne mujhe sher aur rīchh ke panje se bachā liyā hai wuh mujhe is Filistī ke hāth se bhī bachāegā.”

Sāūl bolā, “Thīk hai, jāeñ aur Rab āp ke sāth ho.” **38** Us ne Dāūd ko apnā zirābaktar aur pītal kā khod pahnāyā. **39** Phir Dāūd ne Sāūl kī talwār bāndh kar chalne kī koshish kī. Lekin use bahut mushkil lag rahā thā. Us ne Sāūl se kahā, “Maiñ yih chīzeñ pahan kar nahīn lar̄ saktā, kyoñki

maiñ in kā ādī nahīn hūn.” Unheñ utār kar ⁴⁰ us ne nadī se pāñch chikne chikne patthar chun kar unheñ apnī charwāhe kī thailī meñ dāl liyā. Phir charwāhe kī apnī lāthī aur falākhan pakar kar wuh Filistī se larne ke lie Isrāīlī safon se niklā.

Dāūd kī Fatah

⁴¹ Jälüt Dāūd kī jānib baṛhā. Ḑhāl ko uṭhāne wālā us ke āge āge chal rahā thā. ⁴² Us ne hiqāratāmez nazaroṇ se Dāūd kā jāyzā liyā, kyoñki wuh gorā aur khūbsūrat naujawān thā. ⁴³ Wuh garjā, “Kyā maiñ kuttā hūn ki tū lāthī le kar merā muqābalā karne āyā hai?” Apne dewatāoṇ ke nām le kar wuh Dāūd par lānat bhej kar ⁴⁴ chillāyā, “Idhar ā tāki maiñ terā gosht parindoṇ aur janglī jānwaroṇ ko khilāūn.”

⁴⁵ Dāūd ne jawāb diyā, “Āp talwār, nezā aur shamshīr le kar merā muqābalā karne āe haiñ, lekin maiñ Rabbul-afwāj kā nām le kar ātā hūn, usī kā nām jo Isrāīlī fauj kā Khudā hai. Kyoñki āp ne usī ko chaileñj kiyā hai. ⁴⁶ Āj hī Rab āp ko mere hāth meñ kar degā, aur maiñ āp kā sar qalam kar dūngā. Isī din maiñ Filistī faujiyon kī lāsheñ parindoṇ aur janglī jānwaroṇ ko khilā dūngā. Tab tamām duniyā jān legī ki Isrāīl kā Khudā hai. ⁴⁷ Sab jo yahāñ maujūd haiñ jān lenge ki Rab ko hamēñ bachāne ke lie talwār yā neze kī zarūrat nahīn hotī. Wuh khud hī jang kar rahā hai, aur wuhī āp ko hamāre qabze meñ kar degā.”

⁴⁸ Jälüt Dāūd par hamlā karne ke lie āge baṛhā, aur Dāūd bhī us kī taraf daurā. ⁴⁹ Chalte chalte us ne apnī thailī se patthar nikālā aur use

falākhan meṇ rakh kar zor se chalāyā. Patthar urtā urtā Filistī ke māthe par jā lagā. Wuh khopari meṇ dhańs gayā, aur pahalwān muñh ke bal gir gayā. ⁵⁰⁻⁵¹ Yoñ Dāūd falākhan aur patthar se Filistī par ghālib āyā. Us ke hāth meṇ talwār nahīn thī. Tab us ne Jälüt kī taraf daur kar usī kī talwār miyān se khīñch kar Filistī kā sar kāt dālā.

Jab Filistiyon ne dekhā ki hamārā pahalwān halāk ho gayā hai to wuh bhāg nikle. ⁵² Isrāīl aur Yahūdāh ke mard fatah ke nāre lagā lagā kar Filistiyon par tūt paṛe. Un kā tāqqub karte karte wuh Jāt aur Aqrūn ke darwāzoñ tak pahuñch gae. Jo rāstā Shāraim se Jāt aur Aqrūn tak jātā hai us par har taraf Filistiyon kī lāsheñ nazar āīn. ⁵³ Phir Isrāīliyon ne wāpas ā kar Filistiyon kī chhoṛī huī lashkargāh ko lüt liyā.

⁵⁴ Bād meṇ Dāūd Jälüt kā sar Yarūshalam ko le āyā. Filistī ke hathiyār us ne apne Ḳhaime meṇ rakh lie.

Sāūl Dāūd ke Khāndān kā Patā Kartā Hai

⁵⁵ Jab Dāūd Jälüt se laṛne gayā to Sāūl ne fauj ke kamāndar Abinair se pūchhā, “Is jawān ādmī kā bāp kaun hai?” Abinair ne jawāb diyā, “Āp kī hayāt kī qasam, mujhe mālūm nahīn.”

⁵⁶ Bādshāh bolā, “Phir patā karen!” ⁵⁷ Jab Dāūd Filistī kā sar qalam karke wāpas āyā to Abinair use bādshāh ke pās lāyā. Dāūd abhī Jälüt kā sar uṭhāe phir rahā thā. ⁵⁸ Sāūl ne pūchhā, “Āp kā bāp kaun hai?” Dāūd ne jawāb diyā, “Maiñ Baitlaham ke rahne wāle āp ke khādim Yassī kā betā hūn.”

18

Dāūd aur Yūnatan kī Dostī

¹ Is guftgū ke bād Dāūd kī mulāqāt bādshāh ke bete Yūnatan se huī. Un meñ fauran gahrī dostī paidā ho gaī, aur Yūnatan Dāūd ko apnī jān ke barābar azīz rakhne lagā. ² Us din se Sāūl ne Dāūd ko apne darbār meñ rakh liyā aur use bāp ke ghar wāpas jāne na diyā. ³ Aur Yūnatan ne Dāūd se ahd bāndhā, kyoñki wuh Dāūd ko apnī jān ke barābar azīz rakhtā thā. ⁴ Ahd kī tasdiq ke lie Yūnatan ne apnā choğhā utār kar use apne zirābaktar, talwār, kamān aur peṭī samet Dāūd ko de diyā.

⁵ Jahān bhī Sāūl ne Dāūd ko laṛne ke lie bhejā wahān wuh kāmyāb huā. Yih dekh kar Sāūl ne use fauj kā baṛā afsar banā diyā. Yih bāt awām aur Sāūl ke afsaroṇ ko pasand āī.

Sāūl Dāūd se Hasad Kartā Hai

⁶ Jab Dāūd Filistiyoṇ ko shikast dene se wāpas āyā to tamām shahroṇ se auraten nikal kar Sāūl Bādshāh se milne āīn. Daf aur sāz bajāte hue wuh Ḳhushī ke gīt gā gā kar nāchne lagīn. ⁷ Aur nāchte nāchte wuh gātī rahīn, “Sāūl ne to hazār halāk kie jabki Dāūd ne das hazār.”

⁸ Sāūl baṛe ḡhusse meñ ā gayā, kyoñki auratoṇ kā gīt use nihāyat burā lagā. Us ne sochā, “Un kī nazar meñ Dāūd ne das hazār halāk kie jabki maiñ ne sirf hazār. Ab sirf yih bāt rah gaī hai ki use bādshāh muqarrar kiyā jāe.” ⁹ Us waqt se Sāūl Dāūd ko shak kī nazar se dekhne lagā. ¹⁰⁻¹¹ Agle din Allāh ne dubārā Sāūl par burī rūh āne dī, aur wuh ghar ke andar wajd kī hālat meñ

ā gayā. Dāūd māmūl ke mutābiq sāz bajāne lagā tāki bādshāh ko sukūn mile. Sāūl ke hāth meñ nezā thā. Achānak us ne use phaiñk kar Dāūd ko dīwār ke sāth chhed dālne kī koshish kī. Lekin Dāūd ek taraf haṭ kar bach niklā. Ek aur dafā aisā huā, lekin Dāūd phir bach gayā.

¹² Yih dekh kar Sāūl Dāūd se ḥarne lagā, kyoñki us ne jān liyā ki Rab mujhe chhoṭ kar Dāūd kā hāmī ban gayā hai. ¹³ Ākhirkār us ne Dāūd ko darbār se dūr karke hazār faujiyon par muqarrar kar diyā. In ādmīyon ke sāth Dāūd mukhtalif jangoñ ke lie nikaltā rahā. ¹⁴ Aur jo kuchh bhī wuh kartā us meñ kāmyāb rahtā, kyoñki Rab us ke sāth thā. ¹⁵ Jab Sāūl ne dekhā ki Dāūd ko kitnī zyādā kāmyābī huī hai to wuh us se mazīd ḫar gayā. ¹⁶ Lekin Isrāīl aur Yahūdāh ke bāqī log Dāūd se bahut muhabbat rakhte the, kyoñki wuh har jang meñ nikalte waqt se le kar ghar wāpas āte waqt tak un ke āge āge chaltā thā.

Dāūd Sāūl kā Dāmād Ban Jātā Hai

¹⁷ Ek din Sāūl ne Dāūd se bāt kī, “Maiñ apnī barī betī Mīrab kā rishtā āp ke sāth bāndhnā chāhtā hūn. Lekin pahle sābit kareñ ki āp achchhe faujī haiñ, jo Rab kī jangoñ meñ khūb hissā le.” Lekin dil hī dil meñ Sāūl ne sochā, “Khud to maiñ Dāūd par hāth nahīn uthāūngā, behtar hai ki wuh Filistiyon ke hāthoñ mārā jāe.” ¹⁸ Lekin Dāūd ne etarāz kiyā, “Maiñ kaun hūn ki bādshāh kā dāmād banūn? Isrāīl meñ to mere khāndān aur ābāī kunbe kī koī haisiyat nahīn.”

¹⁹ To bhī shādī kī taiyāriyān kī gaīn. Lekin jab muqarrarā waqt ā gayā to Sāūl ne Mīrab kī shādī

ek aur ādmī banām Adriyel Mahūlātī se karwā dī.

20 Itne mein Sāūl kī chhotī betī Mikal Dāūd se muhabbat karne lagī. Jab Sāūl ko is kī ƙhabar milī to wuh khush huā. **21** Us ne sochā, “Ab maiñ betī kā rishtā us ke sāth bāndh kar use yoñ phaṇsā dūngā ki wuh Filistiyon se laṛte laṛte mar jāegā.” Dāūd se us ne kahā, “Āj āp ko merā dāmād banane kā dubārā mauqā milegā.”

22 Phir us ne apne mulāzimoñ ko hukm diyā ki wuh chupke se Dāūd ko batāeñ, “Suneñ, āp bādshāh ko pasand haiñ, aur us ke tamām afsar bhī āp ko pyār karte haiñ. Āp zarūr bādshāh kī peshkash qabūl karke us kā dāmād ban jāeñ.” **23** Lekin Dāūd ne etarāz kiyā, “Kyā āp kī dānist mein bādshāh kā dāmād bananā chhotī-sī bāt hai? Maiñ to ghanib ādmī hūn, aur merī koī haisiyat nahīn.”

24 Mulāzimoñ ne bādshāh ke pās wāpas jā kar use Dāūd ke alfāz batāe. **25** Sāūl ne unheñ phir Dāūd ke pās bhej kar use ittalā dī, “Bādshāh mahr ke lie paise nahīn māngtā balki yih ki āp un ke dushmanoñ se badlā le kar 100 Filistiyon ko qatl kar deñ. Sabūt ke taur par āp ko un kā ƙhatnā karke jild kā kaṭā huā hissā bādshāh ke pās lānā paregā.” Shart kā maqsad yih thā ki Dāūd Filistiyon ke hāthoñ mārā jāe.

26 Jab Dāūd ko yih ƙhabar milī to use Sāūl kī peshkash pasand āī. Muqarrarā waqt se pahle **27** us ne apne ādmiyoñ ke sāth nikal kar 200 Filistiyon ko mār diyā. Lāshoñ kā ƙhatnā karke wuh jild ke kul 200 ṭukre bādshāh ke pās lāyā

tāki bādshāh kā dāmād bane. Yih dekh kar Sāūl ne us kī shādī Mikal se karwā dī.

²⁸ Sāūl ko mānanā parā ki Rab Dāūd ke sāth hai aur ki merī betī Mīkal use bahut pyār kartī hai. ²⁹ Tab wuh Dāūd se aur bhī ḥarne lagā. Is ke bād wuh jīte-jī Dāūd kā dushman banā rahā. ³⁰ Un dinoṇ meṇ Filistī sardār Isrāīl se lāṛte rahe. Lekin jab bhī wuh jang ke lie nikle to Dāūd Sāūl ke bāqī afsaroṇ kī nisbat zyādā kāmyāb hotā thā. Natīje meṇ us kī shohrat pūre mulk meṇ phail gaī.

19

Yūnatan Dāūd kī Sifārish Kartā Hai

¹ Ab Sāūl ne apne bete Yūnatan aur tamām mulāzimoṇ ko sāf batāyā ki Dāūd ko halāk karnā hai. Lekin Dāūd Yūnatan ko bahut pyārā thā, ² is lie us ne use āgāh kiyā, “Merā bāp āp ko mār dene ke mawāqe ḫhūnd rahā hai. Kal subah khābardār raheṇ. Kahīn chhup kar merā intazār karen. ³ Phir maiṇ apne bāp ke sāth shahr se nikal kar āp ke qarīb se guzarūṅga. Wahānī main un se āp kā muāmalā chher kar mālūm karūṅga ki wuh kyā irādā rakhte hain. Jo kuchh bhī wuh kaheṇge maiṇ āp ko batā dūṅgā.”

⁴ Aglī subah jab Yūnatan ne apne bāp se bāt kī to us ne Dāūd kī sifārish karke kahā, “Bādshāh apne khādim Dāūd kā gunāh na karen, kyoṇki us ne āp kā gunāh nahīn kiyā balki hameshā āp ke lie fāydāmand rahā hai. ⁵ Usī ne apnī jān ko khatre meṇ dāl kar Filistī ko mār dālā, aur Rab ne us ke wasīle se tamām Isrāīl ko barī najāt baḵhshī. Us waqt āp khud bhī sab kuchh

dekh kar ɭhush hue. To phir āp gunāh karke us jaise bequsūr ādmī ko kyoñ bilāwajah marwānā chāhte hain?”

⁶ Yūnatan kī bāteñ sun kar Sāūl mān gayā. Us ne wādā kiyā, “Rab kī hayāt kī qasam, Dāūd ko mārā nahīn jāegā.” ⁷ Bād meñ Yūnatan ne Dāūd ko bulā kar use sab kuchh batāyā, phir use Sāūl ke pās lāyā. Tab Dāūd pahle kī tarah bādshāh kī khidmat karne lagā.

Sāūl kā Dāūd par Dūsrā Hamlā

⁸ Ek bār phir jang chhiṛ gaī, aur Dāūd nikal kar Filistiyoñ se laṛā. Is dafā bhī us ne unheñ yoñ shikast dī ki wuh farār ho gae. ⁹ Lekin ek din jab Sāūl apnā nezā pakare ghar meñ baiṭhā thā to Allāh kī bhejī huī burī rūh us par ghālib āī. Us waqt Dāūd sarod bajā rahā thā. ¹⁰ Achānak Sāūl ne neze ko phaiñk kar Dāūd ko dīwār ke sāth chhed dālne kī koshish kī. Lekin wuh ek taraf haṭ gayā aur nezā us ke qarīb se guzar kar dīwār men dhañs gayā. Dāūd bhāg gayā aur us rāt Sāūl ke hāth se bach gayā.

¹¹ Sāūl ne fauran apne ādmiyoñ ko Dāūd ke ghar ke pās bhej diyā taki wuh makān kī pahrādārī karke Dāūd ko subah ke waqt qatl kar deñ. Lekin Dāūd kī bīwī Mīkal ne us ko āgāh kar diyā, “Āj rāt ko hī yahāñ se chale jāeñ, warnā āp nahīn bacheroge balki kal subah hī mār die jāeñge.” ¹² Chunāñche Dāūd ghar kī khirkī meñ se niklā, aur Mīkal ne utarne meñ us kī madad kī. Tab Dāūd bhāg kar bach gayā.

¹³ Mīkal ne Dāūd kī chārpāī par but rakh kar us ke sar par bakriyoñ ke bāl lagā die aur bāqī hisse

par kambal bichhā diyā. ¹⁴ Jab Sāūl ke ādmī Dāūd ko pakaṛne ke lie āe to Mīkal ne kahā, “Wuh bīmār hai.” ¹⁵ Faujiyon ne Sāūl ko ittalā dī to us ne unheṇ hukm diyā, “Use chārpāī samet hī mere pās le āo tāki use mār dūn.”

¹⁶ Jab wuh Dāūd ko le jāne ke lie āe to kyā dekhte hain ki us kī chārpāī par but paṛā hai jis ke sar par bakriyon ke bāl lage hain. ¹⁷ Sāūl ne apnī betī ko bahut jhiṛkā, “Tū ne mujhe is tarah dhokā de kar mere dushman kī farār hone meṇ madad kyon kī? Terī hī wajah se wuh bach gayā.” Mīkal ne jawāb diyā, “Us ne mujhe dhamkī dī ki maiṇ tujhe qatl kar dūngā agar tū farār hone meṇ merī madad na kare.”

Dāūd Rāmā meṇ Samuel ke pās

¹⁸ Is tarah Dāūd bach niklā. Wuh Rāmā meṇ Samuel ke pās farār huā aur use sab kuchh sunāyā jo Sāūl ne us ke sāth kiyā thā. Phir donoṇ mil kar Nayot chale gae. Wahān wuh ṭhahre. ¹⁹ Sāūl ko ittalā dī gaī, “Dāūd Rāmā ke Nayot meṇ ṭhahrā huā hai.” ²⁰ Us ne fauran apne ādmiyon ko use pakaṛne ke lie bhej diyā. Jab wuh pahuṇche to dekhā ki nabiyon kā pūrā guroh wahān nabuwwat kar rahā hai, aur Samuel khud un kī rāhnumāī kar rahā hai. Unheṇ dekhte hī Allāh kā Rūh Sāūl ke ādmiyon par nāzil huā, aur wuh bhī nabuwwat karne lage. ²¹ Sāūl ko is bāt kī khabar milī to us ne mazīd ādmiyon ko Rāmā bhej diyā. Lekin wuh bhī wahān pahuṇchte hī nabuwwat karne lage. Sāūl ne tīsrī bār ādmiyon ko bhej diyā, lekin yihī kuchh un ke sāth bhī huā.

²² Ākhir meṇ Sāūl khud Rāmā ke lie rawānā huā. Čalte chalte wuh sīkū ke bare hauz par

pahuñchā. Wahān us ne logoñ se pūchhā, “Dāūd aur Samuel kahān haiñ?” Unhoñ ne jawāb diyā, “Rāmā kī abādī Nayot meñ.”

²³ Sāūl abhī Nayot nahīn pahuñchā thā ki Allāh kā Rūh us par bhī nāzil huā, aur wuh nabuwwat karte karte Nayot pahuñch gayā. ²⁴ Wahān wuh apne kapron ko utār kar Samuel ke sāmne nabuwwat kartā rahā. Nabuwwat karte karte wuh zamīn par leñ gayā aur wahān pūre din aur pūrī rāt parā rahā. Isī wajah se yih qaul mashhūr huā, “Kyā Sāūl ko bhī nabiyon meñ shumār kiyā jātā hai?”

20

Dāūd aur Yūnatan Ahd Bāndhte Haiñ

¹ Ab Dāūd Rāmā ke Nayot se bhī bhāg gayā. Chupke se wuh Yūnatan ke pās āyā aur pūchhā, “Mujh se kyā ghaltī huī hai? Merā kyā quśūr hai? Mujh se āp ke bāp ke khilāf kyā jurm sarzad huā hai ki wuh mujhe qatł karnā chāhte haiñ?”

² Yūnatan ne etarāz kiyā, “Yih kabhī nahīn ho saktā! Āp nahīn mareñge. Merā bāp to mujhe hameshā sab kuchh batā detā hai, khāh bāt barī ho yā chhotī. To phir wuh aisā koi mansūbā mujh se kyoñ chhupāe? Āp kī yih bāt sarāsar ġhalat hai.”

³ Lekin Dāūd ne qasam khā kar isrār kiyā, “Zāhir hai ki āp ko is ke bāre meñ ilm nahīn. Āp ke bāp ko sāf mālūm hai ki maiñ āp ko pasand hūn. ‘Wuh to sochte hoñge, Yūnatan ko is bāt kā ilm na ho, warnā wuh dugh mahsūs karegā.’ Lekin Rab kī aur āp kī jān kī qasam, maiñ bāre

khatre meñ hūn, aur maut se bachnā mushkil hī hai.”

⁴ Yūnatan ne kahā, “Mujhe batāeñ ki maiñ kyā karūn to maiñ use karūnga.” ⁵ Tab Dāūd ne apnā mansūbā pesh kiyā. “Kal Nae Chānd kī Īd hai, aur bādshāh tawaqqa kareñge ki maiñ un kī ziyāfat meñ sharīk hūn. Lekin is martabā mujhe parsoñ shām tak bāhar khule maidān meñ chhupā rahne kī ijāzat deñ. ⁶ Agar āp ke bāp merā patā kareñ to unheñ kah denā, ‘Dāūd ne bare zor se mujh se apne shahr Bait-laham ko jāne kī ijāzat māngī. Use barī jaldī thī, kyoñki us kā pūrā ķhāndān apnī sālānā qurbānī chaṛhānā chāhtā hai.’ ⁷ Agar āp ke bāp jawāb deñ ki ṭhīk hai to phir mālūm hogā ki ķhattrā ṭal gayā hai. Lekin agar wuh bare għusse meñ ā jāeñ to yaqīn jāneñ ki wuh mujhe nuqsān pahuñchāne kā irādā rakhte haiñ. ⁸ Barāh-e-karm mujh par mehrbānī karke yād rakheñ ki āp ne Rab ke sāmne apne ķhādim se ahd bāndhā hai. Agar maiñ wāqaī quśūrwār ṭhahrūn to āp khud mujhe mār dāleñ. Lekin kisi sūrat meñ bhī mujhe apne bāp ke hawāle na kareñ.”

⁹ Yūnatan ne jawāb diyā, “Fikr na kareñ, maiñ kabhī aisā nahīn karūnga. Jab bhī mujhe ishārā mil jāe ki merā bāp āp ko qatl karne kā irādā rakhtā hai to maiñ zarūr āp ko fauran ittalā dūngā.” ¹⁰ Dāūd ne pūchhā, “Agar āp ke bāp għusse meñ jawāb deñ to kaun mujhe ķhabar pahuñchāegā?”

¹¹ Yūnatan ne jawāb meñ kahā, “Āeñ ham nikal kar khule maidān meñ jāeñ.” Donoñ nikle ¹² to Yūnatan ne Dāūd se kahā, “Rab Isrāil ke

Khudā kī qasam, parsoṇ is waqt tak maiṇ apne bāp se bāt mālūm kar lūṅgā. Agar wuh āp ke bāre meṇ achchhī soch rakhe aur maiṇ āp ko ittalā na dūn 13 to Rab mujhe sakht sazā de. Lekin agar mujhe patā chale ki merā bāp āp ko mār dene par tulā huā hai to maiṇ āp ko is kī ittalā bhī dūṅgā. Is sūrat meṇ maiṇ āp ko nahīn rokūṅgā balki āp ko salāmatī se jāne dūṅgā. Rab usī tarah āp ke sāth ho jis tarah wuh pahle mere bāp ke sāth thā. 14 Lekin darkhāst hai ki mere jīte-jī mujh par Rab kī-sī mehrbānī karen̄ tāki maiṇ mar na jāun̄. 15 Mere khāndān par bhī hameshā tak mehrbānī karen̄. Wuh kabhī bhī āp kī mehrbānī se mahrūm na ho jāe, us waqt bhī nahīn jab Rab ne āp ke tamām dushmanoṇ ko rū-e-zamīn par se miṭā diyā hogā.”

16 Chunāñche Yūnatan ne Dāūd se ahd bāndh kar kahā, “Rab Dāūd ke dushmanoṇ se badlā le.”

17 Wuh bolā, “Qasam khāen̄ ki āp yih ahd utne pukhtā irāde se qāym rakheṇge jitnī āp mujh se muhabbat rakhte hain̄.” Kyoñki Yūnatan Dāūd ko apnī jān ke barābar azīz rakhtā thā.

18 Phir Yūnatan ne apnā mansūbā pesh kiyā. “Kal to Nae Chānd kī Īd hai. Jaldī se patā chalegā ki āp nahīn āe, kyoñki āp kī kursī ķhālī rahegī.

19 Is lie parsoṇ shām ke waqt khule maidān meṇ wahān chale jāen̄ jahān pahle chhup gae the. Patthar ke dher ke qarīb baiṭh jāen̄. 20 Us waqt maiṇ ghar se nikal kar tīn tīr patthar ke dher kī taraf chalāūṅgā goyā meṇ kisī chīz ko nishānā banā kar mashq kar rahā hūn̄. 21 Phir maiṇ laṛke ko tīroṇ ko le āne ke lie bhej dūṅgā. Agar maiṇ use batā dūn, ‘Tīr urlī taraf paṛe hain̄, unheṇ jā

kar le āo' to āp khauf khāe baǵhair chhupne kī jagah se nikal kar mere pās ā sakeṇge. Rab kī hayāt kī qasam, is sūrat meṇ koī կhatrā nahīn hogā. ²² Lekin agar maiṇ laṛke ko batā dūn, 'Tīr parlī taraf paṛe hain' to āp ko fauran hijrat karnī paṛegī. Is sūrat meṇ Rab կhud āp ko yahān se bhej rahā hogā. ²³ Lekin jo bāten ham ne āj āpas meṇ kī hain Rab կhud hameshā tak in kā gawāh rahe."

Sāūl kī Dāūd se Alāniyā Dushmanī

²⁴ Chunānche Dāūd khule maidān meṇ chhup gayā. Nae chānd kī Īd āī to bādshāh ziyāfat ke lie baiṭh gayā. ²⁵ Māmūl ke mutābiq wuh dīwār ke pās baiṭh gayā. Abinair us ke sāth baithā thā aur Yūnatan us ke muqābil. Lekin Dāūd kī jagah կhālī rahī.

²⁶ Us din Sāūl ne bāt na chherī, kyoṇki us ne sochā, "Dāūd kisī wajah se nāpāk ho gayā hogā, is lie nahīn āyā."

²⁷ Lekin agle din jab Dāūd kī jagah phir կhālī rahī to Sāūl ne Yūnatan se pūchhā, "Yassī kā beṭā na to kal, na āj ziyāfat meṇ sharīk huā hai. Kyā wajah hai?" ²⁸ Yūnatan ne jawāb diyā, "Dāūd ne bare zor se mujh se Bait-laham jāne kī ijāzat māngī. ²⁹ Us ne kahā, 'Mehrbānī karke mujhe jāne deñ, kyoṇki merā կhāndān ek կhās qurbānī chaṛhā rahā hai, aur mere bhāī ne mujhe āne kā hukm diyā hai. Agar āp ko manzūr ho to barāh-e-karm mujhe apne bhāiyoṇ ke pās jāne kī ijāzat deñ.' Yihī wajah hai ki wuh bādshāh kī ziyāfat meṇ sharīk nahīn huā."

30 Yih sun kar Sāūl āpe se bāhar ho gayā. Wuh garjā, “Harāmzāde! Mujhe ķhūb mālūm hai ki tū ne Dāūd kā sāth diyā hai. Sharm kī bāt hai, tere lie aur terī mān ke lie. **31** Jab tak Yassī kā betā zindā hai tab tak na tū aur na terī bādshāhat qāym rahegī. Ab jā, use le ā, kyoñki use marnā hī hai.”

32 Yūnatan ne kahā, “Kyoñ? Us ne kyā kiyā jo sazā-e-maut ke lāyq hai?” **33** Jawāb men Sāūl ne apnā nezā zor se Yūnatan kī taraf phaiñk diyā taki use mār dāle. Yih dekh kar Yūnatan ne jān liyā ki Sāūl Dāūd ko qatl karne kā pukhtā irādā rakhtā hai. **34** Baڑe ǵhusse ke ālam men wuh khaṛā huā aur chalā gayā. Us din us ne khānā khāne se inkār kiyā. Use bahut dukh thā ki merā bāp Dāūd kī itnī be'izzatī kar rahā hai.

35 Agle din Yūnatan subah ke waqt ghar se nikal kar khule maidān men us jagah ā gayā jahān Dāūd se milnā thā. Ek laṛkā us ke sāth thā. **36** Us ne laṛke ko hukm diyā, “Chalo, us taraf bhāgnā shurū karo jis taraf maiñ tīroñ ko chalāüngā taki tujhe mālūm ho ki wuh kahān haiñ.” Chunānche laṛkā daurne lagā, aur Yūnatan ne tīr itne zor se chalāyā ki wuh us se āge kahīn dūr jā girā. **37** Jab laṛkā tīr ke qarīb pahuñch gayā to Yūnatan ne āwāz dī, “Tīr parlī taraf hai. **38** Jaldī karo, bhāg kar āge niklo aur na ruko!” Phir laṛkā tīr ko uṭhā kar apne mālik ke pās wāpas ā gayā. **39** Wuh nahīn jāntā thā ki is ke pīchhe kyā maqsad hai. Sirf Yūnatan aur Dāūd ko ilm thā.

40 Phir Yūnatan ne kamān aur tīroñ ko laṛke ke sapurd karke use hukm diyā, “Jāo, sāmān

le kar shahr meñ wāpas chale jāo.” ⁴¹ Laṛkā chalā gayā to Dāūd patthar ke ḫer ke junūb se nikal kar Yūnatan ke pās āyā. Tīn martabā wuh Yūnatan ke sāmne muñh ke bal jhuk gayā. Ek dūsre ko chūm kar donoñ khūb roe, khāskar Dāūd. ⁴² Phir Yūnatan bolā, “Salāmatū se jāen! Aur kabhī wuh wāde na bhuleñ jo ham ne Rab kī qasam khā kar ek dūsre se kie hain. Yih ahd āp ke aur mere aur āp kī aur merī aulād ke darmiyān hameshā qāym rahe. Rab khud hamārā gawāh hai.”

Phir Dāūd rawānā huā, aur Yūnatan shahr ko wāpas chalā gayā.

21

Dāūd Nob meñ Akhīmalik ke pās Thahartā Hai

¹ Dāūd Nob meñ Akhīmalik Imām ke pās gayā. Akhīmalik kāñpte hue us se milne ke lie āyā aur pūchhā, “Āp akele kyoñ āe hain? Koī āp ke sāth nahīn.” ² Dāūd ne jawāb diyā, “Bādshāh ne mujhe ek khās zimmedārī dī hai jis kā zikr tak karnā manā hai. Kisī ko bhī is ke bāre meñ jānanā nahīn chāhie. Maiñ ne apne ādmiyon ko hukm diyā hai ki fulān fulān jagah par merā intazār kareñ. ³ Ab mujhe zarā batāeñ ki khāne ke lie kyā mil saktā hai? Mujhe pāñch roṭiyān de deñ, yā jo kuchh bhī āp ke pās hai.”

⁴ Imām ne jawāb diyā, “Mere pās ām roṭī nahīn hai. Maiñ āp ko sirf Rab ke lie makhsūsshudā roṭī de saktā hūn. Shart yih hai ki āp ke ādmī pichhle dinon meñ auraton se hambistar na hue hoñ.” ⁵ Dāūd ne use tasallī de

kar kahā, “Fikr na kareñ. Pahle kī tarah hameñ is muhimm ke daurān bhī auratoñ se dūr rahnā parā hai. Mere faujī ām muhimmoñ ke lie bhī apne āp ko pāk rakhte haiñ, to is dafā wuh kahīn zyādā pāk-sāf haiñ.”

⁶ Phir imām ne Dāūd ko makhsūsshudā roṭiyān dīn yānī wuh roṭiyān jo mulāqāt ke khaime men Rab ke huzūr rakhī jātī thīn aur usī din tāzā roṭiyōñ se tabdīl huī thīn. ⁷ Us waqt Sāūl ke charwāhoñ kā Adomī inchārj Doeg wahān thā. Wuh kisī majbūrī ke bāis Rab ke huzūr thahrā huā thā. Us kī maujūdagī men ⁸ Dāūd ne Akhīmalik se pūchhā, “Kyā āp ke pās koī nezā yā talwār hai? Mujhe bādshāh kī muhimm ke lie itnī jaldī se nikalnā parā ki apnī talwār yā koī aur hathiyār sāth lāne ke lie fursat na milī.”

⁹ Akhīmalik ne jawāb diyā, “Jī hai. Wādī-e-Ailā men āp ke hāthon māre gae Filistī mard Jālūt kī talwār mere pās hai. Wuh ek kapre men liptī mere bālāposh ke pīchhe parī hai. Agar āp use apne sāth le jānā chāheñ to le jāeñ. Mere pās koī aur hathiyār nahīn hai.” Dāūd ne kahā, “Is qism kī talwār kahīn aur nahīn miltī. Mujhe de deñ.”

Dāūd Filistī Bādshāh ke pās

¹⁰ Usī din Dāūd āge niklā tāki Sāūl se bach sake. Isrāīl ko chhoṛ kar wuh Filistī shahr Jāt ke bādshāh Akīs ke pās gayā. ¹¹ Lekin Akīs ke mulāzimoñ ne bādshāh ko āgāh kiyā, “Kyā yih mulk kā bādshāh Dāūd nahīn hai? Isī ke bāre men Isrāīlī nāch kar gīt gāte haiñ, ‘Sāūl ne hazār halāk kie jabki Dāūd ne das hazār.’ ”

12 Yih sun kar Dāūd ghabrā gayā aur Jāt ke bādshāh Akīs se bahut ḫarne lagā. **13** Achānak wuh pāgal ādmī kā rūp bhar kar un ke darmiyān ajīb ajīb harkateñ karne lagā. Shahr ke darwāze ke pās jā kar us ne us par betuke-se nishān lagāe aur apnī dāṛhī par rāl ṭapakne dī.

14 Yih dekh kar Akīs ne apne mulāzimoñ ko jhiṛkā, “Tum is ādmī ko mere pās kyoñ le āe ho? Tum khud dekh sakte ho ki yih pāgal hai. **15** Kyā mere pās pāgalon kī kamī hai ki tum is ko mere sāmne le āe ho tāki is tarah kī harkateñ kare? Kyā mujhe aise mehmān kī zarūrat hai?”

22

Adullām ke Ghār aur Moāb Men

1 Is tarah Dāūd Jāt se bach niklā aur Adullām ke ghār meñ chhup gayā. Jab us ke bhāiyon aur bāp ke gharāne ko is kī ḫabar milī to wuh Bait-laham se ā kar wahān us ke sāth jā mile. **2** Aur log bhī jaldī se us ke gird jamā ho gae. Aise jo kisī musībat meñ phaṇse hue the yā apnā qarz adā nahīn kar sakte the aur aise bhī jin kā dil talkhī se bharā huā thā. Hote hote Dāūd taqrīban 400 afrād kā rāhnumā ban gayā.

3 Dāūd Adullām se rawānā ho kar Mulk-e-Moāb ke shahr Misfāh chalā gayā. Us ne Moābī bādshāh se guzārish kī, “Mere mān-bāp ko us waqt tak yahān panāh den jab tak mujhe patā na ho ki Allāh mere lie kyā irādā rakhtā hai.” **4** Wuh apne mān-bāp ko bādshāh ke pās le āyā, aur wuh utnī der tak wahān ṭahre jitnī der Dāūd apne pahāṛī qile meñ rahā.

⁵ Ek din Jād Nabī ne Dāūd se kahā, “Yahānī pahārī qile menī mat raheñ balki dubārā Yahūdāh ke ilāqe menī wāpas chale jāeñ.” Dāūd us kī sun kar hārat ke jangal menī jā basā.

Sāūl Nob ke Imāmoñ se Badlā Letā Hai

⁶ Sāūl ko ittalā dī gaī ki Dāūd aur us ke ādmī dubārā Yahūdāh menī pahuñch gae hain. Us waqt Sāūl apnā nezā pakare jhāū ke us darakht ke sāy menī baiñhā thā jo Jibiyā kī pahārī par thā. Sāūl ke irdgird us ke mulāzim khaṛe the. ⁷ Wuh pukār uṭhā, “Binyamīn ke mardo! Suneñ, kyā Yassī kā beṭā āp sab ko khet aur angūr ke bāgh degā? Kyā wuh fauj menī āp ko hazār hazār aur sau sau afrād par muqarrar karegā? ⁸ Lagtā hai ki āp is kī ummīd rakhte hain, warnā āp yoñ mere khilāf sāzish na karte. Kyonki āp menī se kisī ne bhī mujhe yih nahīn batāyā ki mere apne beṭe ne is ādmī ke sāth ahd bāndhā hai. Āp ko merī fikr tak nahīn, warnā mujhe ittalā dete ki Yūnatan ne mere mulāzim Dāūd ko ubhārā hai ki wuh merī tāk menī baiñh jāe. Kyonki āj to aisā hī ho rahā hai.”

⁹ Doeg Adomī Sāūl ke afsaron ke sāth wahānī kharā thā. Ab wuh bol uṭhā, “Main ne Yassī ke beṭe ko dekhā hai. Us waqt wuh Nob menī Akhīmalik bin Akhītūb se milne āyā. ¹⁰ Akhīmalik ne Rab se dariyāft kiyā ki Dāūd kā aglā qadam kyā ho. Sāth sāth us ne use safr ke lie khānā aur Filistī mard Jālūt kī talwār bhī dī.”

¹¹ Bādshāh ne fauran Akhīmalik bin Akhītūb aur us ke bāp ke püre khāndān ko bulāyā. Sab Nob menī imām the. ¹² Jab pahuñche to Sāūl bolā, “Akhītūb ke beṭe, suneñ.” Akhīmalik ne

jawāb diyā, “Jī mere āqā, hukm.” ¹³ Sāūl ne ilzām lagā kar kahā, “Āp ne Yassī ke betē Dāūd ke sāth mere ķhilaf sāzisheň kyoň kī haiň? Batāeň, āp ne use roṭī aur talwār kyoň dī? Āp ne Allāh se dariyāft kyoň kiyā ki Dāūd āge kyā kare? Āp hī kī madad se wuh sarkash ho kar merī tāk meň baiṭh gayā hai, kyoňki aj̄ to aisā hī ho rahā hai.”

¹⁴ Akhīmalik bolā, “Lekin mere āqā, kyā mulāzimoň meň se koī aur āp ke dāmād Dāūd jaisā wafādār sābit huā hai? Wuh to āp ke muhāfiz daste kā kaptān aur āp ke gharāne kā muazzaz membar hai. ¹⁵ Aur yih pahlī bār nahīn thā ki maiň ne us ke lie Allāh se hidāyat māngī. Is muāmale meň bādshāh mujh aur mere ķhāndān par ilzām na lagāe. Maiň ne to kisī sāzish kā zikr tak nahīn sunā.”

¹⁶ Lekin bādshāh bolā, “Akhīmalik, tujhe aur tere bāp ke pūre ķhāndān ko marnā hai.” ¹⁷ Us ne sāth khare apne muhāfizoň ko hukm diyā, “Jā kar imāmoň ko mār do, kyoňki yih bhī Dāūd ke ittahādī haiň. Go in ko mālūm thā ki Dāūd mujh se bhāg rahā hai to bhī inhoň ne mujhe ittalā na dī.”

Lekin muhāfizoň ne Rab ke imāmoň ko mār dālne se inkār kiyā. ¹⁸ Tab bādshāh ne Doeg Adomī ko hukm diyā, “Phir tum hī imāmoň ko mār do.” Doeg ne un ke pās jā kar un sab ko qatl kar diyā. Katān kā bālāposh pahnane wāle kul 85 ādmī us din māre gae. ¹⁹ Phir us ne jā kar imāmoň ke shahr Nob ke tamām bāshindoň ko mār dālā. Shahr ke mard, aurateň, bachche shirkhāroň samet, gāy-bail, gadhe aur bher-bakriyān sab us din halāk hue.

²⁰ Sirf ek hī shakhs bach gayā, Abiyātar jo Akhīmalik bin Akhītūb kā beṭā thā. Wuh bhāg kar Dāūd ke pās āyā ²¹ aur use ittalā dī ki Sāūl ne Rab ke imāmoṇ ko qatl kar diyā hai. ²² Dāūd ne kahā, “Us din jab maiñ ne Doeg Adomī ko wahān dekhā to mujhe mālūm thā ki wuh zarūr Sāūl ko ķhabar pahuinchāegā. Yih merā hī quſūr hai ki āp ke bāp kā pūrā ķhāndān halāk ho gayā hai. ²³ Ab mere sāth raheñ aur mat dareñ. Jo ādmī āp ko qatl karnā chāhtā hai wuh mujhe bhī qatl karnā chāhtā hai. Āp mere sāth rah kar mahfūz rāheñge.”

23

Dāūd Qailā ko Bachātā Hai

¹ Ek din Dāūd ko ķhabar milī ki Filistī Qailā Shahr par hamlā karke gāhne kī jaghoṇ se anāj lüt̄ rahe haiñ. ² Dāūd ne Rab se dariyāft kiyā, “Kyā maiñ jā kar Filistiyon par hamlā karūn?” Rab ne jawāb diyā, “Jā, Filistiyon par hamlā karke Qailā ko bachā.”

³ Lekin Dāūd ke ādmī etarāz karne lage, “Ham pahle se yahān Yahūdāh meñ logoṇ kī mukhālafat se darte haiñ. Jab ham Qailā jā kar Filistiyon par hamlā kareñge to phir hamārā kyā banegā?” ⁴ Tab Dāūd ne Rab se dubārā hidāyat māngī, aur dubārā use yihī jawāb milā, “Qailā ko jā! Maiñ Filistiyon ko tere hawāle kar dūngā.”

⁵ Chunāñche Dāūd apne ādmiyon ke sāth Qailā chalā gayā. Us ne Filistiyon par hamlā

karke unheñ barī shikast dī aur un kī bher-bakriyon ko chhin kar Qailā ke bāshindoñ ko bachāyā. ⁶ Wahān Qailā meñ Abiyātar Dāūd ke logon meñ shāmil huā. Us ke pās imām kā bālāposh thā.

⁷ Jab Sāūl ko ƙhabar milī ki Dāūd Qailā Shahr meñ ṭhahrā huā hai to us ne sochā, “Allāh ne use mere hawāle kar diyā hai, kyoñki ab wuh fasīldār shahr meñ jā kar phañs gayā hai.” ⁸ Wuh apnī pūrī fauj ko jamā karke jang ke lie taiyāriyān karne lagā tāki utar kar Qailā kā muhāsarā kare jis meñ Dāūd ab tak ṭhahrā huā thā.

⁹ Lekin Dāūd ko patā chalā ki Sāūl us ke khilāf taiyāriyān kar rahā hai. Us ne Abiyātar Imām se kahā, “Imām kā bālāposh le āeñ tāki ham Rab se hidāyat māngeñ.” ¹⁰ Phir us ne duā kī, “Ai Rab Isrāīl ke Khudā, mujhe ƙhabar milī hai ki Sāūl merī wajah se Qailā par hamlā karke use barbād karnā chāhtā hai. ¹¹ Kyā shahr ke bāshinde mujhe Sāūl ke hawāle kar deñge? Kyā Sāūl wāqai ãegā? Ai Rab, Isrāīl ke Khudā, apne khādim ko batā!” Rab ne jawāb diyā, “Hān, wuh ãegā.” ¹² Phir Dāūd ne mazid dariyāft kiyā, “Kyā shahr ke buzurg mujhe aur mere logon ko Sāūl ke hawāle kar deñge?” Rab ne kahā, “Hān, wuh kar deñge.”

¹³ Lihāzā Dāūd apne taqrīban 600 ādmiyon ke sāth Qailā se chalā gayā aur idhar-udhar phirne lagā. Jab Sāūl ko ittalā milī ki Dāūd Qailā se nikal kar bach gayā hai to wahān jāne se bāz ãyā.

Yūnatan Dāūd se Miltā Hai

14 Ab Dāūd bayābān ke pahārī qiloṇ aur Dasht-e-Zīf ke pahārī ilāqe meṇ rahne lagā. Sāūl to musalsal us kā khoj lagātā rahā, lekin Allāh hameshā Dāūd ko Sāūl ke hāth se bachātā rahā. **15** Ek din jab Dāūd Horish ke qarīb thā to use ittalā milī ki Sāūl āp ko halāk karne ke lie niklā hai. **16** Us waqt Yūnatan ne Dāūd ke pās ā kar us kī hauslā-afzāī kī ki wuh Allāh par bharosā rakhe. **17** Us ne kahā, “Dareñ mat. Mere bāp kā hāth āp tak nahīn pahuñchegā. Ek din āp zarūr Isrāīl ke bādshāh ban jāeñge, aur merā rutbā āp ke bād hī āegā. Merā bāp bhī is haqīqat se khūb wāqif hai.” **18** Donoñ ne Rab ke huzūr ahd bāndhā. Phir Yūnatan apne ghar chalā gayā jabki Dāūd wahān Horish meṇ ṭhahrā rahā.

Dāūd Zīf meṇ Bach Jātā Hai

19 Dasht-e-Zīf meṇ ābād kuchh log Sāūl ke pās ā gae jo us waqt Jibiyā meṇ thā. Unhoñ ne kahā, “Ham jānte hain ki Dāūd kahān chhup gayā hai. Wuh Horish ke pahārī qiloṇ meṇ hai, us pahārī par jis kā nām Hakīlā hai aur jo Yashīmon ke junūb meṇ hai. **20** Ai bādshāh, jab bhī āp kā dil chāhe āeñ to ham use pakaṛ kar āp ke hawāle kar deñge.” **21** Sāūl ne jawāb diyā, “Rab āp ko barkat baṛhshe ki āp ko mujh par tars āyā hai. **22** Ab wāpas jā kar mazīd taiyāriyān kareñ. Patā kareñ ki wuh kahān ātā jātā hai aur kis ne use wahān dekhā hai. Kyoñki mujhe batāyā gayā hai ki wuh bahut chālāk hai. **23** Har jagah kā khoj lagāeñ jahān wuh chhup jātā hai. Jab āp ko sārī tafsīlāt mālūm hoñ to mere pās āeñ. Phir maiñ āp ke sāth wahān pahuñchūngā. Agar

wuh wāqaī wahānī kahīn ho to maiñ use zarūr dħūnq nikkälūngā, khāh mujhe pūre Yahūdāh kī chħānbīn kyoñ na karnī paṛe.”

24-25 Zif ke ādmī wāpas chale gae. Thoṛī der ke bād Sāūl bhī apnī fauj samet wahān ke lie niklā. Us waqt Dāūd aur us ke log Dasht-e-Maūn meñ Yashīmon ke junūb meñ the. Jab Dāūd ko ittalā milī ki Sāūl us kā tāqqub kar rahā hai to wuh registān ke mazīd junūb meñ chalā gayā, wahān jahān barī chaṭān nazar ātī hai. Lekin Sāūl ko patā chalā aur wuh fauran registān meñ Dāūd ke pīchhe gayā.

26 Chalte chalte Sāūl Dāūd ke qarīb hī pahuñch gayā. Ākhirkār sirf ek pahāṛī un ke darmiyān rah gaī. Sāūl pahāṛī ke ek dāman meñ thā jabki Dāūd apne logoñ samet dūsre dāman meñ bhāgtā huā bādshāh se bachne kī koshish kar rahā thā. Sāūl abhī unheñ gher kar pakaṛne ko thā **27** ki achānak qāsid Sāūl ke pās pahuñchā jis ne kahā, “Jaldī āeñ! Filistī hamāre mulk meñ ghus āe haiñ.” **28** Sāūl ko Dāūd ko chhoṛnā paṛā, aur wuh Filistiyōñ se laṛne gayā. Us waqt se pahāṛī kā nām “Alahdagī kī Chaṭān” par gayā.

29 Dāūd wahān se chalā gayā aur Ain-jadī ke pahāṛī qiloñ meñ rahne lagā.

24

Dāūd Sāūl ko Qatl Karne se Inkār Kartā Hai

1 Jab Sāūl Filistiyōñ kā tāqqub karne se wāpas āyā to use ķhabar milī ki Dāūd Ain-jadī ke registān meñ hai. **2** Wuh tamām Isrāīl ke 3,000 chīdā faujiyoñ ko le kar Pahāṛī Bakriyoñ kī

Chaṭānoṇ ke lie rawānā huā tāki Dāūd ko pakar le.

³ Chalte chalte wuh bheroṇ ke kuchh bāroṇ se guzarne lage. Wahān ek ġhār ko dekh kar Sāūl andar gayā tāki apnī hājat rafā kare. Ittifāq se Dāūd aur us ke ādmī usī ġhār ke pichhle hisse meṇ chhupe baithe the. ⁴ Dāūd ke ādmīyon ne āhistā se us se kahā, “Rab ne to āp se wādā kiyā thā, ‘Maiṇ tere dushman ko tere hawāle kar dūngā, aur tū jo jī chāhe us ke sāth kar sakegā.’ Ab yih waqt ā gayā hai!” Dāūd reṅgte reṅgte āge Sāūl ke qarīb pahuñch gayā. Chupke se us ne Sāūl ke libās ke kināre kā ɭukrā kāt liyā aur phir wāpas ā gayā. ⁵ Lekin jab apne logoṇ ke pās pahuñchā to us kā zamīr use malāmat karne lagā. ⁶ Us ne apne ādmīyoṇ se kahā, “Rab na kare ki maiṇ apne āqā ke sāth aisā sulūk karke Rab ke masah kie hue bādshāh ko hāth lagāūn. Kyoṇki Rab ne khud use masah karke chun liyā hai.” ⁷ Yih kah kar Dāūd ne un ko samjhāyā aur unheṇ Sāūl par hamlā karne se rok diyā.

Thorī der ke bād Sāūl ġhār se nikal kar āge chalne lagā. ⁸ Jab wuh kuchh fāsile par thā to Dāūd bhī niklā aur pukār uṭhā, “Ai bādshāh salāmat, ai mere āqā!” Sāūl ne pīchhe dekhā to Dāūd muṇh ke bal jhuk kar ⁹ bolā, “Jab log āp ko batāte haiṇ ki Dāūd āp ko nuqsān pahuñchāne par tulā huā hai to āp kyoṇ dhyān dete haiṇ? ¹⁰ Āj āp apnī ānkhoṇ se dekh sakte haiṇ ki yih jhūt hī jhūt hai. Ġhār meṇ āp Allāh kī marzī se mere qabze meṇ ā gae the. Mere logoṇ ne zor diyā ki maiṇ āp ko mār dūn, lekin maiṇ ne āp ko na chheṛā. Maiṇ bolā, ‘Maiṇ kabhī bhī bādshāh

ko nuqsān nahīn pahuñchāūngā, kyoñki Rab ne khud use masah karke chun liyā hai.’ ¹¹ Mere bāp, yih dekheñ jo mere hāth meñ hai! Āp ke libās kā yih ṭukṛā maiñ kāṭ sakā, aur phir bhī maiñ ne āp ko halāk na kiyā. Ab jān leñ ki na maiñ āp ko nuqsān pahuñchāne kā irādā rakhtā hūn, na maiñ ne āp kā gunāh kiyā hai. Phir bhī āp merā tāqqub karte hue mujhe mār dālne ke darpai haiñ. ¹² Rab khud faisłā kare ki kis se ghaltī ho rahī hai, āp se yā mujh se. Wuhī āp se merā badlā le. Lekin khud maiñ kabhī āp par hāth nahīn uthāūngā. ¹³ Qadīm qaul yihī bāt bayān kartā hai, ‘Badkāroñ se badkārī paidā hotī hai.’ Merī nīyat to sāf hai, is lie maiñ kabhī aisā nahīn karūnga. ¹⁴ Isrāīl kā bādshāh kis ke khilāf nikal āyā hai? Jis kā tāqqub āp kar rahe haiñ us kī to koī haisiyat nahīn. Wuh murdā kuttā yā pissū hī hai. ¹⁵ Rab hamārā munsif ho. Wuhī ham donoñ kā faisłā kare. Wuh mere muāmale par dhyān de, mere haq meñ bāt kare aur mujhe be'ilzām ṭhahrā kar āp ke hāth se bachāe.”

¹⁶ Dāūd khāmosh huā to Sāūl ne pūchhā, “Dāūd mere bete, kyā āp kī āwāz hai?” Aur wuh phūṭ phūṭ kar rone lagā. ¹⁷ Us ne kahā, “Āp mujh se zyādā rāstbāz haiñ. Āp ne mujh se achchhā sulūk kiyā jabki maiñ āp se burā sulūk kartā rahā hūn. ¹⁸ Aj āp ne mere sāth bhalāī kā sabūt diyā, kyoñki go Rab ne mujhe āp ke hawāle kar diyā thā to bhī āp ne mujhe halāk na kiyā. ¹⁹ Jab kisī kā dushman us ke qabze meñ ā jātā hai to wuh use jāne nahīn detā. Lekin āp ne aisā hī kiyā. Rab āp ko us mehrbānī kā ajr de jo āp ne

āj mujh par kī hai. ²⁰ Ab maiñ jāntā hūn ki āp zarūr bādshāh ban jāeñge, aur ki āp ke zariye Isrāil kī bādshāhī qāym rahegī. ²¹ Chunāniche Rab kī qasam khā kar mujh se wādā kareñ ki na āp merī aulād ko halāk kareñge, na mere ābāī gharāne meñ se merā nām miñā deñge.”

²² Dāūd ne qasam khā kar Sāūl se wādā kiyā. Phir Sāūl apne ghar chalā gayā jabki Dāūd ne apne logon ke sāth ek pahārī qile meñ panāh le lī.

25

Samuel kī Maut

¹ Un dinon men Samuel faut huā. Tamām Isrāil Rāmā men janāze ke lie jamā huā. Us kā mātam karte hue unhoñ ne use us kī khāndānī qabr meñ dafn kiyā.

Nābāl Dāūd kī Be'izzatī Kartā Hai

Un dinon men Dāūd Dasht-e-Fārān men chalā gayā.

²⁻⁴ Maūn men Kālib ke khāndān kā ek ādmī rahtā thā jis kā nām Nābāl thā. Wuh nihāyat amīr thā. Karmil ke qarīb us kī 3,000 bheṛen aur 1,000 bakriyān thiñ. Bīwī kā nām Abījel thā. Wuh zahīn bhī thī aur khūbsūrat bhī. Us ke muqābale men Nābāl sakhtmizāj aur kamīnā thā. Ek din Nābāl apnī bheron ke bāl katarne ke lie Karmil āyā.

Jab Dāūd ko khabar milī ⁵ to us ne 10 jawānoñ ko bhej kar kahā, “Karmil jā kar Nābāl se mileñ aur use merā salām deñ. ⁶ Use batānā, ‘Allāh āp ko tawīl zindagī atā kare. Āp kī, āp ke khāndān kī aur āp kī tamām milkiyat kī salāmatī ho.

⁷ Sunā hai ki bheroṇ ke bāl katarne kā waqt ā gayā hai. Karmil meṇ āp ke charwāhe hameshā hamāre sāth rahe. Us pūre arse meṇ na unheṇ hamārī taraf se koī nuqsān pahuñchā, na koī chīz chorī huī. ⁸ Apne logoṇ se կhud pūchh len! Wuh is kī tasdīq karenge. Āj āp կhushī manā rahe haiñ, is lie mere jawānoṇ par mehrbānī karen. Jo kuchh āp կhushī se de sakte haiñ wuh unheṇ aur apne beṭe Dāūd ko de deñ.”

⁹ Dāūd ke ādmī Nābāl ke pās gae. Use Dāūd kā salām de kar unhoṇ ne us kā paighām diyā aur phir jawāb kā intazār kiyā. ¹⁰ Lekin Nābāl ne karakht lahje meṇ kahā, “Yih Dāūd kaun hai? Kaun hai Yassī kā beṭā? Ājkal bahut-se aise گhulām haiñ jo apne mālik se bhāge hue haiñ. ¹¹ Maiñ apnī rotī, apnā pānī aur katarne wāloṇ ke lie zabah kiyā gayā gosht le kar aise āwārā phirne wāloṇ ko kyoṇ de dūn? Kyā patā hai ki yih kahān se ē haiñ.”

¹² Dāūd ke ādmī chale gae aur Dāūd ko sab kuchh batā diyā. ¹³ Tab Dāūd ne hukm diyā, “Apnī talwāreṇ bāndh lo!” Sab ne apnī talwāreṇ bāndh līn. Us ne bhī aisā kiyā aur phir 400 afrād ke sāth Karmil ke lie rawānā huā. Bāqī 200 mard sāmān ke pās rahe.

Abījel Dāūd kā Ghussā Thandā Kartī Hai

¹⁴ Itne meṇ Nābāl ke ek naukar ne us kī bīwī ko ittalā dī, “Dāūd ne registān meṇ se apne qāsidoṇ ko Nābāl ke pās bhejā tāki use mubārakbād deñ. Lekin us ne jawāb meṇ garaj kar unheṇ gāliyān dī haiñ, ¹⁵ hālānki un logoṇ kā hamāre sāth sulūk hameshā achchhā rahā hai. Ham aksar

rewaṛoṇ ko charāne ke lie un ke qarīb phirte rahe, to bhī unhoṇ ne hameṇ kabhī nuqsān na pahuñchāyā, na koī chīz chorī kī. ¹⁶ Jab bhī ham un ke qarīb the to wuh din rāt chārdīwārī kī tarah hamārī hifāzat karte rahe. ¹⁷ Ab soch leṇ ki kyā kiyā jāe! Kyoñki hamārā mālik aur us ke tamām ghar wāle bare ɭhatre meṇ hain. Wuh khud itnā sharīr hai ki us se bāt karne kā koī fāydā nahiñ.”

¹⁸ Jitnī jaldī ho sakā Abījel ne kuchh sāmān ikaṭṭhā kiyā jis meṇ 200 roṭiyān, mai kī do mashkeṇ, khāne ke lie taiyār kī gaī pāñch bheṛeṇ, bhune hue anāj ke sāṛhe 27 kilogrām, kishmish kī 100 aur anjīr kī 200 ṭikkiyān shāmil thiñ. Sab kuchh gadhoṇ par lād kar ¹⁹ us ne apne naukarōṇ ko hukm diyā, “Mere āge nikal jāo, maiñ tumhāre pīchhe pīchhe āūṅgī.” Apne shauhar ko us ne kuchh na batāyā. ²⁰ Jab Abījel pahāṛ kī ḣr̥ meṇ utarne lagī to Dāūd apne ādmīyon samet us kī taraf baṛhte hue nazar āyā. Phir un kī mulāqāt huī. ²¹ Dāūd to abhī tak bare ɭhusse meṇ thā, kyoñki wuh soch rahā thā, “Is ādmī kī madad karne kā kyā fāydā thā! Ham registān meṇ us ke rewaṛoṇ kī hifāzat karte rahe aur us kī koī bhī chīz gum na hone dī. To bhī us ne hamārī nekī ke jawāb meṇ hamārī be'izzatī kī hai. ²² Allāh mujhe sakht sazā de agar maiñ kal subah tak us ke ek ādmī ko bhī zindā chhoṛ dūn!”

²³⁻²⁴ Dāūd ko dekh kar Abījel jaldī se gadhe par se utar kar us ke sāmne muñh ke bal jhuk gaī. Us ne kahā, “Mere āqā, mujhe hī quśūrwār thahrāeṇ. Mehrbānī karke apnī ɭhādimā ko

bolne deñ aur us kī bāt suneñ. ²⁵ Mere mālik us sharīr ādmī Nābāl par zyādā dhyān na deñ. Us ke nām kā matlab ahmaq hai aur wuh hai hī ahmaq. Afsos, merī un ādmīyon se mulāqāt nahīn huī jo āp ne hamāre pās bheje the. ²⁶ Lekin Rab kī aur āp kī hayāt kī qasam, Rab ne āp ko apne hāthon se badlā lene aur qātil banane se bachāyā hai. Aur Allāh kare ki jo bhī āp se dushmanī rakhte aur āp ko nuqsān pahuñchānā chāhte haiñ unheñ Nābāl kī-sī sazā mil jāe. ²⁷ Ab guzārish hai ki jo barkat hameñ milī hai us meñ āp bhī sharīk hoñ. Jo chīzeñ āp kī khādimā lāi hai unheñ qabūl karke un jawānoñ meñ taqsim kar deñ jo mere āqā ke pīchhe ho lie haiñ. ²⁸ Jo bhī ghaltī huī hai apnī khādimā ko muāf kījye. Rab zarūr mere āqā kā gharānā hameshā tak qāym rakhegā, kyonki āp Rab ke dushmanoñ se lar̄te haiñ. Wuh āp ko jīte-jī ghaltiyān karne se bachāe rakhe. ²⁹ Jab koī āp kā tāqqub karke āp ko mār dene kī koshish kare to Rab āp kā Khudā āp kī jān jāndāron kī thailī meñ mahfūz rakhegā. Lekin āp ke dushmanoñ kī jān wuh falākhan ke patthar kī tarah dūr phaink kar halāk kar degā. ³⁰ Jab Rab apne tamām wāde pūre karke āp ko Isrāīl kā bādshāh banā degā ³¹ to koī aisī bāt sāmne nahīn āegī jo ḥokar kā bāis ho. Mere āqā kā zamīr sāf hogā, kyonki āp badlā le kar qātil nahīn bane honege. Guzārish hai ki jab Rab āp ko kāmyābī de to apnī khādimā ko bhī yād karen.”

³² Dāūd bahut khush huā. “Rab Isrāīl ke Khudā kī tārif ho jis ne āj āp ko mujh se milne ke lie bhej diyā. ³³ Āp kī basīrat mubārak hai! Āp

mubārak hain, kyoñki āp ne mujhe is din apne hāthon se badlā le kar qātil banane se rok diyā hai. ³⁴ Rab Isrāil ke Khudā kī qasam jis ne mujhe āp ko nuqsān pahuñchāne se rok diyā, kal subah Nābāl ke tamām ādmī halāk hote agar āp itnī jaldī se mujh se milne na ātīn.”

³⁵ Dāūd ne Abījel kī peshkardā chīzeñ qabūl karke use ruķhsat kiyā aur kahā, “Salāmatī se jāeñ. Maiñ ne āp kī sunī aur āp kī bāt manzūr kar lī hai.”

Rab Nābāl ko Sazā Detā Hai

³⁶ Jab Abījel apne ghar pahuñchī to dekhā ki bahut raunaq hai, kyoñki Nābāl bādshāh kī-sī ziyāfat karke ķushiyān manā rahā thā. Chūñki wuh nashe meñ dhut thā is lie Abījel ne use us waqt kuchh na batāyā.

³⁷ Aglī subah jab Nābāl hosh meñ ā gayā to Abījel ne use sab kuchh kah sunāyā. Yih sunte hī Nābāl ko daurā paṛ gayā, aur wuh patthar-sā ban gayā. ³⁸ Das din ke bād Rab ne use marne diyā. ³⁹ Jab Dāūd ko Nābāl kī maut kī ķhabar mil gaī to wuh pukārā, “Rab kī tārif ho jis ne mere lie Nābāl se laṛ kar merī be'izzatī kā badlā liyā hai. Us kī mehrbānī hai ki maiñ ġhalat kām karne se bach gayā hūn jabki Nābāl kī burāī us ke apne sar par ā gaī hai.”

Abījel kī Dāūd se Shādī

Kuchh der ke bād Dāūd ne apne logoñ ko Abījel ke pās bhejā tāki wuh Dāūd kī us ke sāth shādī kī darkhāst pesh kareñ. ⁴⁰ Chunāñche us ke mulāzim Karmil meñ Abījel ke pās jā kar bole, “Dāūd ne hameñ shādī kā paigħām de kar bhejā

hai.” ⁴¹ Abījel khaṛī huī, phir muñh ke bal jhuk kar bolī, “Maiṇ un kī khidmat meṇ hāzir hūṇ. Maiṇ apne mālik ke ḥādimoṇ ke pānw dhone tak taiyār hūṇ.”

⁴² Wuh jaldī se taiyār huī aur gadhe par baiṭh kar Dāūd ke mulāzimoṇ ke sāth rawānā huī. Pāñch naukarāniyān us ke sāth chalī gaīn. Yoṇ Abījel Dāūd kī bīwī ban gaī.

⁴³ Ab Dāūd kī do bīwiyān thīn, kyoñki pahle us kī shādī Akhīnūsam se huī thī jo Yazrael se thī. ⁴⁴ Jahān tak Sāūl kī betī Mīkal kā tālluq thā Sāūl ne use Dāūd se le kar us kī dubārā shādī Faltiyel bin Lais se karwāī thī jo Jallīm kā rahne wālā thā.

26

Dāūd Sāūl ko Dūsrī Bār Bachne Detā Hai

¹ Ek din Dasht-e-Zif ke kuchh bāshinde dubārā Jibiyā men Sāūl ke pās ā gae. Unhoṇ ne bādshāh ko batāyā, “Ham jānte haiṇ ki Dāūd kahān chhup gayā hai. Wuh us pahāṛī par hai jo Hakīlā kahlātī hai aur Yashīmon ke muqābil hai.” ² Yih sun kar Sāūl Isrāīl ke 3,000 chīdā faujīyoṇ ko le kar Dasht-e-Zif men gayā tāki Dāūd ko ḫhūnd nikāle. ³ Hakīlā Pahāṛī par Yashīmon ke muqābil wuh ruk gae. Jo rāstā pahāṛ par se guzartā hai us ke pās unhoṇ ne apnā kaimp lagāyā. Dāūd us waqt registān men chhup gayā thā. Jab use khabar milī ki Sāūl merā tāqqub kar rahā hai ⁴ to us ne apne logoṇ ko mālūm karne ke lie bhejā. Unhoṇ ne wāpas ā kar use ittalā dī ki bādshāh wāqaī apnī fauj samet registān men pahuinch gayā hai. ⁵ Yih sun kar Dāūd khud

nikal kar chupke se us jagah gayā jahān Sāūl kā kaimp thā. Us ko mālūm huā ki Sāūl aur us kā kamāndar Abinair bin Nair kaimp ke ain bīch meñ so rahe hairñ jabki bāqī ādmī dāyrā banā kar un ke irdgird so rahe hairñ.

6 Do mard Dāūd ke sāth the, Akhīmalik Hitti aur Abīshai bin Zarūyāh. Zarūyāh Yoāb kā bhāī thā. Dāūd ne pūchhā, “Kaun mere sāth kaimp meñ ghus kar Sāūl ke pās jāegā?” Abīshai ne jawāb diyā, “Maiñ sāth jāūngā.” **7** Chunānche donoñ rāt ke waqt kaimp meñ ghus āe. Soe hue faujiyoñ aur Abinair se guzar kar wuh Sāūl tak pahuñch gae jo zamīn par leṭā so rahā thā. Us kā nezā sar ke qarīb zamīn meñ gaṛā huā thā. **8** Abīshai ne āhistā se Dāūd se kahā, “Āj Allāh ne āp ke dushman ko āp ke qabze meñ kar diyā hai. Agar ijāzat ho to maiñ use us ke apne neze se zamīn ke sāth chhed dūn. Maiñ use ek hī wār meñ mār dūngā. Dūsre wār kī zarūrat hī nahīn hogī.”

9 Dāūd bolā, “Na kar! Use mat mārnā, kyonki jo Rab ke masah kie hue khādim ko hāth lagāe wuh quśūrwār thahregā. **10** Rab kī hayāt kī qasam, Rab khud Sāūl kī maut muqarrar karegā, khāh wuh būrhā ho kar mar jāe, khāh jang meñ larte hue. **11** Rab mujhe is se mahfūz rakhe ki maiñ us ke masah kie hue khādim ko nuqsān pahuñchāūn. Nahīn, ham kuchh aur karenge. Us kā nezā aur pānī kī surāhī pakaṛ lo. Āo, ham yih chīzen apne sāth le kar yahān se nikal jāte hairñ.” **12** Chunānche wuh donoñ chīzen apne sāth le kar chupke se chale gae. Kaimp meñ kisī

ko bhī patā na chalā, koī na jāgā. Sab soe rahe, kyoñki Rab ne unheñ gahrī nīnd sulā diyā thā.

¹³ Dāūd wādī ko pār karke pahārī par chārh gayā. Jab Sāūl se fāsilā kāfī thā ¹⁴ to Dāūd ne fauj aur Abinair ko ūñchī āwāz se pukār kar kahā, “Ai Abinair, kyā āp mujhe jawāb nahīn deinge?” Abinair pukārā, “Āp kaun haiñ ki bādshāh ko is tarah kī ūñchī āwāz deñ?” ¹⁵ Dāūd ne tanzan jawāb diyā, “Kyā āp mard nahīn haiñ? Aur Israīl meñ kaun āp jaisā hai? To phir āp ne apne bādshāh kī sahīh hifāzat kyoñ na kī jab koī use qatl karne ke lie kaiimp meñ ghus āyā? ¹⁶ Jo āp ne kiyā wuh ḥīk nahīn hai. Rab kī hayāt kī qasam, āp aur āp ke ādmī sazā-e-maut ke lāyq haiñ, kyoñki āp ne apne mālik kī hifāzat na kī, go wuh Rab kā masah kiyā huā bādshāh hai. Khud dekh leñ, jo nezā aur pānī kī surāhī bādshāh ke sar ke pās the wuh kahān haiñ?”

¹⁷ Tab Sāūl ne Dāūd kī āwāz pahchān lī. Wuh pukārā, “Mere beṭe Dāūd, kyā āp kī āwāz hai?”

¹⁸ Dāūd ne jawāb diyā, “Jī, bādshāh salāmat. Mere āqā, āp merā tāqqub kyoñ kar rahe haiñ? Maiñ to āp kā khādim hūn. Maiñ ne kyā kiyā? Mujh se kyā jurm sarzad huā hai? ¹⁹ Guzārish hai ki merā āqā aur bādshāh apne khādim kī bāt sune. Agar Rab ne āp ko mere ḥhilāf uksāyā ho to wuh merī ḡhallā kī nazar qabūl kare. Lekin agar insān is ke pīchhe haiñ to Rab ke sāmne un par lānat! Apnī harkatoñ se unhoñ ne mujhe merī maurūsī zamīn se nikāl diyā hai aur natīje meñ maiñ Rab kī qaum meñ nahīn rah saktā. Haqīqat meñ wuh kah rahe haiñ, ‘Jāo, dīgar mābūdoñ kī pūjā karo!’ ²⁰ Aisā na ho ki maiñ watan se aur

Rab ke huzūr se dūr mar jāūn. Isrāīl kā bādshāh pissū ko ḍhūnd nikālne ke lie kyon nikal āyā hai? Wuh to pahāṛoṇ meñ merā shikār tītar ke shikār kī tarah kar rahe haiṇ.”

²¹ Tab Sāūl ne iqrār kiyā, “Maiṇ ne gunāh kiyā hai. Dāūd mere bete, wāpas āeṇ. Ab se maiṇ āp ko nuqsān pahuñchāne kī koshish nahīn karūṅga, kyoñki āj merī jān āp kī nazar meñ qīmtī thī. Maiṇ baṛī bewuqūfī kar gayā hūn, aur mujh se baṛī ghaltī huī hai.”

²² Dāūd ne jawāb meñ kahā, “Bādshāh kā nezā yahān mere pās hai. Āp kā koī jawān ā kar use le jāe. ²³ Rab har us sha᳚hs ko ajr detā hai jo insāf kartā aur wafādār rahtā hai. Āj Rab ne āp ko mere hawāle kar diyā, lekin maiṇ ne us ke masah kie hue bādshāh ko hāth lagāne se inkār kiyā. ²⁴ Aur merī duā hai ki jitnī qīmtī āp kī jān āj merī nazar meñ thī, utnī qīmtī merī jān bhī Rab kī nazar meñ ho. Wuhī mujhe har musībat se bachāe rakhe.” ²⁵ Sāūl ne jawāb diyā, “Mere bete Dāūd, Rab āp ko barkat de. Āindā āp ko baṛī kāmyābī hāsil hogī.”

Is ke bād Dāūd ne apnī rāh lī aur Sāūl apne ghar chalā gayā.

27

Dāūd Dubārā Akīs ke pās

¹ Is tajrabe ke bād Dāūd sochne lagā, “Agar maiṇ yihīn ṭhahar jāūn to kisi din Sāūl mujhe mār dālegā. Behtar hai ki apnī hifāzat ke lie Filistiyōṇ ke mulk meñ chalā jāūn. Tab Sāūl pūre Isrāīl meñ merā khoj lagāne se bāz āegā, aur

maiñ mahfūz rahūngā.” ² Chunāñche wuh apne 600 ādmiyon ko le kar Jāt ke bādshāh Akīs bin Māok ke pās chalā gayā. ³ Un ke khāndān sāth the. Dāūd kī do bīwiyān Akhīnūsam Yazraelī aur Nābāl kī bewā Abījel Karmili bhī sāth thīn. Akīs ne unheñ Jāt Shahr meñ rahne kī ijāzat dī. ⁴ Jab Sāūl ko khabar milī ki Dāūd ne Jāt meñ panāh lī hai to wuh us kā khoj lagāne se bāz āyā.

⁵ Ek din Dāūd ne Akīs se bāt kī, “Agar āp kī nazar-e-karm mujh par hai to mujhe dehāt kī kisī ābādī meñ rahne kī ijāzat den. Kyā zarūrat hai ki maiñ yahāñ āp ke sāth dārul-hukūmat meñ rahūn?” ⁶ Akīs muttafiq huā. Us din us ne use Siqlāj Shahr de diyā. Yih shahr us waqt se Yahūdāh ke bādshāhoñ kī milkiyat meñ rahā hai. ⁷ Dāūd ek sāl aur chār mahīne Filistī mulk meñ tħahrā rahā.

⁸ Siqlāj se Dāūd apne ādmiyoñ ke sāth muķhtalif jaghoñ par hamlā karne ke lie nikaltā rahā. Kabhī wuh Jasūriyoñ par dhāwā bolte, kabhī Jirziyoñ yā Amālīqiqiyoñ par. Yih qabile qadīm zamāne se Yahūdāh ke junūb meñ Shūr aur Misr kī sarhad tak rahte the. ⁹ Jab bhī koī maqām Dāūd ke qabze meñ ā jātā to wuh kisī bhī mard yā aurat ko zindā na rahne detā lekin bher-bakriyoñ, gāy-bailoñ, gadhoñ, ūn̄toñ aur kaproñ ko apne sāth Siqlāj le jātā.

Jab bhī Dāūd kisī hamle se wāpas ā kar bādshāh Akīs se miltā ¹⁰ to wuh pūchhtā, “Āj āp ne kis par chhāpā mārā?” Phir Dāūd jawāb detā, “Yahūdāh ke junūbī ilāqe par,” yā “Yarah-miyeliyoñ ke junūbī ilāqe par,” yā “Qīniyoñ ke junūbī ilāqe par.” ¹¹ Jab bhī Dāūd kisī ābādī par

hamlā kartā to wuh tamām bāshindoṇ ko maut ke ghāṭ utār detā aur na mard, na aurat ko zindā chhor kar Jāt lātā. Kyoṇki us ne sochā, “Aisā na ho ki Filistiyon ko patā chale ki maiñ asal meñ Isrāīlī ābādiyon par hamlā nahīn kar rahā.”

Jitnā waqt Dāūd ne Filistī mulk meñ guzārā wuh aisā hī kartā rahā. ¹² Akīs ne Dāūd par pūrā bharosā kiyā, kyoṇki us ne sochā, “Ab Dāūd ko hameshā tak merī khidmat meñ rahnā paregā, kyoṇki aisī harkatoṇ se us kī apnī qaum us se sakht mutanaffir ho gaī hai.”

28

¹ Un dinoṇ meñ Filistī Isrāīl se laṛne ke lie apnī faujeṇ jamā karne lage. Akīs ne Dāūd se bhī bāt kī, “Tawaqquo hai ki āp apne faujiyon samet mere sāth mil kar jang ke lie niklenge.”

² Dāūd ne jawāb diyā, “Zarūr. Ab āp khud dekheṇge ki āp kā khādim kyā karne ke qabil hai!” Akīs bolā, “Thīk hai. Pūrī jang ke daurān āp mere muhāfiz hōnge.”

Sāūl Jādūgarnī kī Taraf Rujū Kartā Hai

³ Us waqt Samuel intaqāl kar chukā thā, aur pūre Isrāīl ne us kā mātam karke use us ke ābāī shahr Rāmā meñ dafnāyā thā.

Un dinoṇ meñ Isrāīl meñ murdoṇ se rābitā karne wāle aur ḡaibdān nahīn the, kyoṇki Sāūl ne unheṇ pūre mulk se nikāl diyā thā.

⁴ Ab Filistiyon ne apnī lashkargāh Shūnīm ke pās lagāī jabki Sāūl ne tamām Isrāiliyon ko jamā karke Jilbuā ke pās apnā kaimp lagāyā.

⁵ Filistiyon kī baṛī fauj dekh kar wuh sakht dahshat khāne lagā. ⁶ Us ne Rab se hidāyat

hāsil karne kī koshish kī, lekin koī jawāb na milā, na khāb, na muqaddas qurā dālne se aur na nabiyon kī mārifat. ⁷ Tab Sāūl ne apne mulāzimon ko hukm diyā, “Mere lie murdon se rābitā karne wālī dhūndo tāki maiñ jā kar us se mālūmāt hāsil kar lūn.” Mulāzimon ne jawāb diyā, “Ain-dor meñ aisī aurat hai.”

⁸ Sāūl bhes badal kar do ādmiyon ke sāth Aindor ke lie rawānā huā.

Rāt ke waqt wuh jādūgarnī ke pās pahuñch gayā aur bolā, “Murdon se rābitā karke us rūh ko Pātāl se bulā deñ jis kā nām maiñ āp ko batātā hūn.” ⁹ Jādūgarnī ne etarāz kiyā, “Kyā āp mujhe marwānā chāhte haiñ? Āp ko patā hai ki Sāūl ne tamām g̱haibdānoñ aur murdon se rābitā karne wāloñ ko mulk meñ se miṭā diyā hai. Āp mujhe kyoñ pha̱nsānā chāhte haiñ?” ¹⁰ Tab Sāūl ne kahā, “Rab kī hayāt kī qasam, āp ko yih karne ke lie sazā nahīn milegī.” ¹¹ Aurat ne pūchhā, “Maiñ kis ko bulāuñ?” Sāūl ne jawāb diyā, “Samuel ko bulā deñ.”

¹² Jab Samuel aurat ko nazar āyā to wuh chīkh uṭhī, “Āp ne mujhe kyoñ dhokā diyā? Āp to Sāūl haiñ!” ¹³ Sāūl ne use tasallī de kar kahā, “Dareñ mat. Batāeñ to sahī, kyā dekh rahī haiñ?” Aurat ne jawāb diyā, “Mujhe ek rūh nazar ā rahī hai jo chaṛhtī chaṛhtī zamīn meñ se nikal kar ā rahī hai.” ¹⁴ Sāūl ne pūchhā, “Us kī shakl-o-sūrat kaisī hai?” Jādūgarnī ne kahā, “Choghe meñ liptā huā būrhā ādmī hai.”

Yih sun kar Sāūl ne jān liyā ki Samuel hī hai. Wuh munh ke bal zamīn par jhuk gayā.

¹⁵ Samuel bolā, “Tū ne mujhe Pātāl se bulwā

kar kyoñ muztarib kar diyā hai?” Sāūl ne jawāb diyā, “Maiñ bařī musībat meñ hūn. Filistī mujh se lař rahe hain, aur Allāh ne mujhe tark kar diyā hai. Na wuh nabiyon kī mārifat mujhe hidāyat detā hai, na ḥāb ke zariye. Is lie maiñ ne āp ko bulwāyā hai tāki āp mujhe batāeñ ki maiñ kyā karūn.”

¹⁶ Lekin Samuel ne kahā, “Rab ḥhud hī tujhe chhoř kar terā dushman ban gayā hai to phir mujh se dariyāft karne kā kyā fāydā hai? ¹⁷ Rab is waqt tere sāth wuh kuchh kar rahā hai jis kī peshgoī us ne merī mārifat kī thi. Us ne tere hāth se bādshāhī chhīn kar kisī aur yānī Dāūd ko de dī hai. ¹⁸ Jab Rab ne tujhe Amāliqiyon par us kā sakht ḡhazab nāzil karne kā hukm diyā thā to tū ne us kī na sunī. Ab tujhe is kī sazā bhugtnī paregī. ¹⁹ Rab tujhe Isrāīl samet Filistiyon ke hawāle kar degā. Kal hī tū aur tere beṭe yahān mere pās pahuñcheinge. Rab terī pūrī fauj bhī Filistiyon ke qabze meñ kar degā.”

²⁰ Yih sun kar Sāūl sakht ghabrā gayā, aur wuh gir kar zamīn par darāz ho gayā. Jism kī pūrī tāqat khatm ho gaī thi, kyoñki us ne pichhle pūre din aur rāt rozā rakhā thā.

²¹ Jab jādūgarnī ne Sāūl ke pās jā kar dekhā ki us ke roṅgṭe khaṛe ho gae hain to us ne kahā, “Janāb, maiñ ne āp kā hukm mān kar apnī jān khatre meñ dāl dī. ²² Ab zarā merī bhī sunēñ. Mujhe ijāzat deñ ki maiñ āp ko kuchh khānā khilāūn tāki āp taqwiyat pā kar wāpas jā sakeñ.” ²³ Lekin Sāūl ne inkār kiyā, “Maiñ kuchh nahīn khāūngā.” Tab us ke ādmīyon ne aurat ke sāth mil kar use bahut samjhāyā, aur āk̄hirkār us

ne un kī sunī. Wuh zamīn se uṭh kar chārpāī par baiṭh gayā. ²⁴ Jādūgarnī ke pās moṭā-tāzā bachhṛā thā. Use us ne jaldī se zabah karwā kar taiyār kiyā. Us ne kuchh āṭā bhī le kar gūndhā aur us se bekhamīrī roṭī banāī. ²⁵ Phir us ne khānā Sāūl aur us ke mulāzimōn ke sāmne rakh diyā, aur unhoṇ ne khāyā. Phir wuh usī rāt dubārā rawānā ho gae.

29

Filistī Dāūd par Shak Karte Hain

¹ Filistiyōn ne apnī faujoṇ ko Afīq ke pās jamā kiyā, jabki Isrāiliyoṇ kī lashkargāh Yazrael ke chashme ke pās thī. ² Filistī sardār jang ke lie nikalne lage. Un ke pīchhe sau sau aur hazār hazār sipāhiyoṇ ke guroh ho lie. Ākhir meṇ Dāūd aur us ke ādmī bhī Akīs ke sāth chalne lage.

³ Yih dekh kar Filistī kamāndaroṇ ne pūchhā, “Yih Isrāilī kyoṇ sāth jā rahe hain?” Akīs ne jawāb diyā, “Yih Dāūd hai, jo pahle Isrāilī bādshāh Sāūl kā faujī afsar thā aur ab kāfi der se mere sāth hai. Jab se wuh Sāūl ko chhoṭ kar mere pās āyā hai maiṇ ne us meṇ aib nahīn dekhā.”

⁴ Lekin Filistī kamāndar ḡhusse se bole, “Use us shahr wāpas bhej deṇ jo āp ne us ke lie muqarrar kiyā hai! Kahīn aisā na ho ki wuh hamāre sāth nikal kar achānak ham par hī hamlā kar de. Kyā apne mālik se sulah karāne kā koī behtar tarīqā hai ki wuh apne mālik ko hamāre kaṭe hue sar pesh kare? ⁵ Kyā yih wuhī Dāūd nahīn jis ke bāre meṇ Isrāilī nāchte hue

gāte the, ‘Sāūl ne hazār halāk kie jabki Dāūd ne das hazār?’”

⁶ Chunāñche Akīs ne Dāūd ko bulā kar kahā, “Rab kī hayāt kī qasam, āp diyānatdār hain, aur merī khāhish thī ki āp Isrāīl se larne ke lie mere sāth nikleñ, kyoñki jab se āp merī khidmat karne lage hain maiñ ne āp meñ aib nahīn dekhā. Lekin afsos, āp sardāron ko pasand nahīn hain. ⁷ Is lie mehrbānī karke salāmatī se laut̄ jāeñ aur kuchh na karen jo unheñ burā lage.”

⁸ Dāūd ne pūchhā, “Mujh se kyā ghaltī huī hai? Kyā āp ne us din se mujh meñ nuqṣ pāyā hai jab se maiñ āp kī khidmat karne lagā hūn? Maiñ apne mālik aur bādshāh ke dushmanoñ se larne ke lie kyon nahīn nikal saktā?”

⁹ Akīs ne jawāb diyā, “Mere nazdik to āp Allāh ke farishte jaise achchhe hain. Lekin Filistī kamāndar is bāt par bazid hain ki āp Isrāīl se larne ke lie hamāre sāth na nikleñ. ¹⁰ Chunāñche kal subah-sawere uṭh kar apne ādmiyoñ ke sāth rawānā ho jānā. Jab din charhe to der na karnā balki jaldī se apne ghar chale jānā.”

¹¹ Dāūd aur us ke ādmiyoñ ne aisā hī kiyā. Agle din wuh subah-sawere uṭh kar Filistī mulk meñ wāpas chale gae jabki Filistī Yazrael ke lie rawānā hue.

30

Siqlāj kī Tabāhī aur Dāūd kā Badlā

¹ Tīsre din jab Dāūd Siqlāj pahuñchā to dekhā ki shahr kā satyānās ho gayā hai. Un kī

ghairmaujūdagī meñ Amālīqiyōñ ne Dasht-e-Najab meñ ā kar Siqlāj par bhī hamlā kiyā thā. Shahr ko jalā kar ² wuh tamām bāshindoñ ko chhoṭoñ se le kar巴ron tak apne sāth le gae the. Lekin koī halāk nahin̄ huā thā balki wuh sab ko apne sāth le gae the. ³ Chunānche jab Dāūd aur us ke ādmī wāpas āe to dekhā ki shahr bhasm ho gayā hai aur tamām bāl-bachche chhin gae hain̄. ⁴ Wuh phūt phūt kar rone lage, itne roe ki ākhirkār rone kī sakat hī na rahī. ⁵ Dāūd kī do bīwiyoñ Akhīnūsam Yazraelī aur Abījel Karmilī ko bhī asīr kar liyā gayā thā.

⁶ Dāūd kī jān bare khatre meñ ā gaī, kyonki us ke mard ġham ke māre āpas meñ use sangsār karne kī bāten̄ karne lage. Kyonki bete-betīyoñ ke chhin jāne ke bāis sab sakht ranjīdā the. Lekin Dāūd ne Rab apne Khudā meñ panāh le kar taqwiyat pāī. ⁷ Us ne Abiyātar bin Akhīmalik ko hukm diyā, “Qurā dālne ke lie imām kā bālāposh le āen̄.” Jab imām bālāposh le āyā ⁸ to Dāūd ne Rab se dariyāft kiyā, “Kyā maiñ luṭeron kā tāqqub karūn? Kyā maiñ un ko jā lūngā?” Rab ne jawāb diyā, “Un kā tāqqub kar! Tū na sirf unheñ jā legā balki apne logoñ ko bachā bhī legā.” ⁹⁻¹⁰ Tab Dāūd apne 600 mardon ke sāth rawānā huā. Chalte chalte wuh Basor Nadī ke pās pahuñch gae. 200 afrād itne niqāh ho gae the ki wuh wahīn ruk gae. Bāqī 400 mard nadī ko pār karke āge barhe.

¹¹ Rāste meñ unheñ khule maidān meñ ek Misrī ādmī milā aur use Dāūd ke pās lā kar kuchh pānī pilāyā aur kuchh rotī, ¹² anjir kī tikki kā ṭukṛā aur kishmish kī do ṭikkiyān khilāin̄.

Tab us kī jān meñ jān ā gaī. Use tīn din aur rāt se na khānā, na pānī milā thā. ¹³ Dāūd ne pūchhā, “Tumhārā mālik kaun hai, aur tum kahān ke ho?” Us ne jawāb diyā, “Main Misrī ghulām hūn, aur ek Amālīqī merā mālik hai. Jab maiñ safr ke daurān bīmār ho gayā to us ne mujhe yahān chhoṛ diyā. Ab maiñ tīn din se yahān parā hūn. ¹⁴ Pahle ham ne Karetiyon yānī Filistiyon ke junūbī ilāqe aur phir Yahūdāh ke ilāqe par hamlā kiyā thā, khāskar Yahūdāh ke junūbī hisse par jahān Kālib kī aulād ābād hai. Shahr Siqlāj ko ham ne bhasm kar diyā thā.”

¹⁵ Dāūd ne sawāl kiyā, “Kyā tum mujhe batā sakte ho ki yih luṭere kis taraf gae hain?” Misrī ne jawāb diyā, “Pahle Allāh kī qasam khā kar wādā karen ki āp mujhe na halāk kareñge, na mere mālik ke hawāle kareñge. Phir maiñ āp ko un ke pās le jāūngā.” ¹⁶ Chunānche wuh Dāūd ko Amālīqī luṭeron ke pās le gayā. Jab wahān pahuñche to dekhā ki Amālīqī idhar-udhar bikhre hue baṛā jashn manā rahe hain. Wuh har taraf khānā khāte aur mai pīte hue nazar ā rahe the, kyoñki jo māl unhoñ ne Filistiyon aur Yahūdāh ke ilāqe se lūṭ liyā thā wuh bahut zyādā thā.

¹⁷ Subah-sawere jab abhī thoṛī raushnī thi Dāūd ne un par hamlā kiyā. Larte larte agle din kī shām ho gaī. Dushman hār gayā aur sab ke sab halāk hue. Sirf 400 jawān bach gae jo ūnṭon par sawār ho kar farār ho gae. ¹⁸ Dāūd ne sab kuchh chhuṛā liyā jo Amālīqiyon ne lūṭ liyā thā. Us kī do bīwiyan bhī sahīh-salāmat

mil gaīn. ¹⁹ Na bachchā na buzurg, na betā na betī, na māl yā koī aur lūtī huī chīz rahī jo Dāūd wāpas na lāyā. ²⁰ Amālīqiyon ke gāy-bail aur bher-bakriyān Dāūd kā hissā ban gaīn, aur us ke logoṇ ne unheṇ apne rewaṛoṇ ke āge āge hānk kar kahā, “Yih lūṭe hue māl meṇ se Dāūd kā hissā hai.”

Māl-e-Ĝhanīmat kī Taqsīm

²¹ Jab Dāūd apne ādmīyoṇ ke sāth wāpas ā rahā thā to jo 200 ādmī niḍhāl hone ke bāis Basor Nadī se āge na jā sake wuh bhī un se ā mile. Dāūd ne salām karke un kā hāl pūchhā. ²² Lekin bāqī ādmīyoṇ meṇ kuchh sharāratī log buṛbuṛāne lage, “Yih hamāre sāth larne ke lie āge na nikle, is lie inheṇ lūṭe hue māl kā hissā pāne kā haq nahīn. Bas wuh apne bāl-bachchoṇ ko le kar chale jāeṇ.”

²³ Lekin Dāūd ne inkār kiyā. “Nahīn, mere bhāiyo, aisā mat karnā! Yih sab kuchh Rab kī taraf se hai. Usī ne hameṇ mahfūz rakh kar hamlā-āwar luteroṇ par fatah bakhshī. ²⁴ To phir ham āp kī bāt kis tarah māneṇ? Jo pīchhe rah kar sāmān kī hifāzat kar rahā thā use bhī utnā hī milegā jitnā ki use jo dushman se larne gayā thā. Ham yih sab kuchh barābar barābar taqsīm karenge.”

²⁵ Us waqt se yih usūl ban gayā. Dāūd ne ise Isrāilī qānūn kā hissā banā diyā jo āj tak jārī hai. ²⁶ Siqlāj wāpas pahuṇchne par Dāūd ne lūṭe hue māl kā ek hissā Yahūdāh ke buzurgoṇ ke pās bhej diyā jo us ke dost the. Sāth sāth us ne paighām bhejā, “Āp ke lie yih tohfā Rab ke

dushmanoṇ se lūṭ liyā gayā hai.” ²⁷ Yih tohfe us ne zail ke shahron meñ bhej die: Baitel, Rāmāt-najab, Yattīr, ²⁸ Aroīr, Sifmot, Istimua, ²⁹⁻³¹ Rakal, Hurmā, Bor-asān, Atāq aur Habrūn. Is ke alāwā us ne tohfe Yarahmiyeliyoṇ, Qīniyoṇ aur bāqī un tamām shahron ko bhej die jin meñ wuh kabhī thahrā thā.

31

Sāūl aur Us ke Beṭoṇ kā Anjām

¹ Itne meñ Filistiyon aur Isrāiliyon ke darmiyān jang chhiṛ gaī thī. Larte larte Isrāili farār hone lage, lekin bahut-se log Jilbuā ke pahāṛī silsile par shahīd ho gae.

² Phir Filistī Sāūl aur us ke beṭoṇ Yūnatan, Abīnadāb aur Malkishua ke pās jā pahuñche. Tīnoṇ beṭe halāk ho gae ³ jabki larāī Sāūl ke ird-gird urūj tak pahuñch gaī. Phir wuh tīrandāzoṇ kā nishānā ban kar burī tarah zaķhmī ho gayā.

⁴ Us ne apne silāhbardār ko hukm diyā, “Apnī talwār miyān se khīñch kar mujhe mār dāl, warnā yih nāmakhtūn mujhe chhed kar be'izzat karenge.” Lekin silāhbardār ne inkār kiyā, kyonki wuh bahut darā huā thā. Ākhir meñ Sāūl apnī talwār le kar ķhud us par gir gayā.

⁵ Jab silāhbardār ne dekhā ki merā mālik mar gayā hai to wuh bhī apnī talwār par gir kar mar gayā. ⁶ Yoṇ us din Sāūl, us ke tīn beṭe, us kā silāhbardār aur us ke tamām ādmī halāk ho gae.

⁷ Jab Maidān-e-Yazrael ke pār aur Dariyā-e-Yardan ke pār rahne wāle Isrāiliyon ko ķhabar milī ki Isrāili fauj bhāg gaī aur Sāūl apne beṭoṇ

samet mārā gayā hai to wuh apne shahron ko chhoṛ kar bhāg nikle, aur Filistī chhoṛे hue shahron par qabzā karke un meñ basne lage.

⁸ Agle din Filistī lāshon ko lūṭne ke lie dubārā maidān-e-jang meñ ā gae. Jab unheñ Jilbua ke pahāṛī silsile par Sāūl aur us ke tīnoñ beṭe murdā mile ⁹ to unhoñ ne Sāūl kā sar kāṭ kar us kā zirābaktar utār liyā aur qāsidoñ ko apne pūre mulk meñ bhej kar apne butoñ ke mandir meñ aur apnī qaum ko fatah kī ittalā dī. ¹⁰ Sāūl kā zirābaktar unhoñ ne Astārāt Dewī ke mandir meñ mahfūz kar liyā aur us kī lāsh ko Bait-shān kī fasīl se laṭkā diyā.

¹¹ Jab Yabīs-jiliyād ke bāshindoñ ko ḫabar milī ki Filistiyon ne Sāūl kī lāsh ke sāth kyā kuchh kiyā hai ¹² to shahr ke tamām laṛne ke qābil ādmī Bait-shān ke lie rawānā hue. Pūrī rāt chalte hue wuh shahr ke pās pahuñch gae. Sāūl aur us ke beṭoñ kī lāshoñ ko fasīl se utār kar wuh unheñ Yabīs ko le gae. Wahān unhoñ ne lāshoñ ko bhasm kar diyā ¹³ aur bachī huī haḍdiyoñ ko shahr meñ jhāū ke darakht ke sāy meñ dafnāyā. Unhoñ ne rozā rakh kar pūre hafte tak un kā mātam kiyā.

**Kitab-i Muqaddas
The Holy Bible in Urdu, Urdu Geo Version, Roman
Script**

copyright © 2019 Urdu Geo Version

Language: (Urdu)

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-05-06

PDF generated using Haiola and XeLaTeX on 11 Nov 2022 from source files dated 7 May 2022

123ff8cb-27b3-5817-a02a-22e67145fd30